

Ŧi iwatyaj jém Apóstolyaj

Jesucristo ijÿcunúc iga icutsatpa Dios iAnama

1 Mánamigo Teófilo, jém wintípíc toto manjáyáy títam iwat Jesús y títam iñquej dende wiñtí ²hasta jém jama cuando químgacpa siñyucmi. Antes que químgacpa siñyucmi iñquejáy jém apóstolyaj, jém icupiñnewiip, tí wiap iwatyaj. Iñquejáy con jém Dios iAnama. ³Jesic cuando yaj iñasca jém yaachaji iga mu iccaata, iwiñquejáy eybic jém icuyujciwiñ iga vivo. Cuarenta jama iwiñquejáy jém ipixiñtam wáti veces iga iixyajiñ iga da caane. Iñmadáy jutsap iñjac Dios jém ityajwiip yíp naxyucmi.

Jesús químpa siñyucmi

⁴Tum jama cuando añtuumaneyajum jém icuyujciwiñ, jém Jesús iñquím iga odoy putyajíñ jém attebet Jerusalén. Iñímáy iga: —Añjooci hasta que cupacpa juuts mijÿcámayñe jém tanJatuj Dios juuts ich mannímáyñe. ⁵Mannímáy iga jém Xiwan acchíjópca con ni, pero da jáypa michiifamtap jém Dios iAnama.

⁶Jesic jém añtuumaneyajwiip icwácayaja jém Jesús:

—¿Que yípti rato mojpa inijac yíp tannaxyucmi Israel?

⁷Jesús icutsoñ, iñímáy:

—Michítam da wiap iñjodónata jucha ni júp jama iwatpa jém tanJatuj Dios, iwatpa con ipimi juuts je ixunpa. ⁸Pero mimichítam impictsoñtámpa jém Dios ipimi. Michiifamtap jém Dios iAnama iga wiap inijmadáy jém pixiñtam títam iñix iga ich añwatne. Mojpa inijmatta Jerusalén, icuwiñti jém naxyucmi de Judea, hasta jém naxyucmi de Samaria, y hasta más juumi, icuwiñti de yíp naxyucmi.

⁹Cuando yaj iñmadáy jém icuyujciwiñ, naquímta Jesús siñyucmi. Iganam síp iámyaj, ucsitogoy. Dam i más iix. ¹⁰Iganam iámyajpa jut químpa Jesús siñyucmi, jeeti rato miñ iwaganateñ wisten pixiñ, agui popo ipuctucu. ¹¹Iñímáy: —MiGalileapic mipixiñtam, ¿tiiga miámquímnetá siñyucmi? Yíptim Jesús, jém químnnewiip siñyucmi, jempicítim miñgacpa eybic.

Cupiñta jém Matías iga tsýyiñ juuts jém Judas

¹²Jesic setyaj Jerusalén de jém cotsic iñÿyi Olivos. Ijuumi juuts nimpá jém ley iga wiap tanwiñtum jecuy jama. ¹³Cuando núcyaj

jém atebet Jerusalén, químyaj jém yucmipic piso. Tigiyay jém cuarto jém iñúcsneyajwiip. Jemum íftim Peto, Jacobo, Xiwan, Anti, Felipe, Tomax, Bartolo, Mateo, jém tungac Jacobo jém Alfeo imaníc, Ximój Zelote y Judas jém Jacobo ífiwi. ¹⁴ Añtuumaneyaj iga seguido iwatyajpa oración con tumtí ijxi. Jemum íftim jém yomtam; jém Malía, jém Jesús iga con Jesús ífiwitam.

¹⁵ Jesic tum jama iganam añtuumaneyaj, teñchucum jém Peto jém pixiñtamanjom, ityaj jem como ciento veinte. Nimpa jém Peto:

¹⁶—Mimichfam mantíwitam, tienes que cupacpa jém Dios inmatí juuts nim jém David cuando inquejáy jém Dios iAnama tí miñpa. Inmatpa iga jém Judas iciñjucotpa jém Jesús iga matstaiñ. ¹⁷ Jém Judas íf ídic con aichfam jém docepíc jém Jesús icuyujciwiñ. Tanwaganayoxatampa ídic. ¹⁸ Juyta tum jaca nas con jém tumiñ jém icoñwiyñewiip iga imalwadáy jém Jesús. Ocmi mutsneactin, tojansaj ipuu, cupudáy. ¹⁹ Cuando ijodónjayay tí inasca jém Judas, jém Jerusalénpic pixiñtam icniyyayaj jém nas Acéldama. Jeeyaj inmatimi nimtooba jém nas jém niipiñ chowa. ²⁰ Porque nimpa jém Salmojom jut jayñeta:

Da oomíyapa ichíy jém inas.

Da i nicpa ífi jem.

Nimpatim:

Tungac tsíyapa iga iwatpa jém iyoxacuy.

²¹ Jesic nimpatim jém Peto: —Siip tanjcupinpa tum de jém tanwaganaiñtwiip seguido cuando

siiba tánOmi Jesús con taichfam, ²² dende icchin jém Xiwan hasta químgac Jesús sinyucmi. Tum de taichfam tsíyapa juuts tum testigo iga numa pisneum jém tánOmi Jesús de jut íf jém caaneyajwiip.

²³ Jesic cupinpa wisten de jeeyaj.

Tum jém José, iníyi Barsabás, iníyifim Justo. Jém tungac iníyi Matías. ²⁴ Jesic los demás injwejpátyajpa Dios. Nimyajpa: —MánOmi, mich inixpigáypa itumpiy jém pixiñtam iganama. Añquejaayi juppíc de yíp wisten mich injcupin ²⁵ iga iwadiñ jém yoxacuy juuts jém apóstolyaj jém injcutsatnewiip. Togoy jém Judas iga tsam imalwat. Nic jut ipictsonpa jém icastigo.

²⁶ Jesic iwatyajpa tum sorteo. Icoñwiy jém Matías, cupineta. Accámta con jém once apóstolyaj.

Quando miñpa jém Dios iAnama

2 Cuando núc jém jama de pentecostés, añtuumaneyaj tumtí lugar itumpiy jém icupicneyajwiip Jesús. ² Jeefi rato imatonjay tum mijpic añjiyi sinyucmi juuts tum mijpic sawa. Tsam pimi jupa. Tigiy jém injiyi ticjom jut coñyay jeeyaj. ³ Jesic iixyay jáyan juctianquíni. Nawécta jém juctianquíni, núcyaj cada tumtum jém pixiñtam icobacyucmi. ⁴ Ipictsonjay jém Dios iAnama, tsam iniif iganamanjom. Mojpa inmat tungac inmatimi juuts ipimíyapa jém Dios iAnama.

⁵ Jém tiempo añtuumaneyaj Jerusalén jém Israelpic pixiñtam iga iwatyajpa juuts jém icostumbre iga ijisyajpa Dios. Miñneyaj

de itumpiy nación icuwífi yíp naxyucmi. ⁶Cuando imatoņyay iga tsam pimi ĵupa, aņtuumaņeyay itumpiy jém pixiñtam. Tsam ciņyay, da icutiıyıy tí iwatyajpa porque cada tumtum imatoņ iga ĵıyyajpa jeeyay iņmafiimi. ⁷Tsam ipooñajjamyaj, ámaņjacyaj. Nanímayyajtap entre jeeyaj:

—¿Que da itumpiy jém siıppic ĵıyyajpa Galileapic pixiñtam?

⁸¿Junim ammatontámpa iga ĵıypa annuntaañmafiimi? ⁹Yiim íftim jém pixiñtam de tuņgac naxyucmi. Miññeyaj de jém naxyucmi de Partia, de Media, de Elam, de Mesopotamia, de Judea, de jém naxyucmi de Capadocia, de jém Ponto y de jém naxyucmi de Asia. ¹⁰Íftim de Frigia, de Panfilia, de Egipto y de jém naxyucmi de África jém más juumipic de Cirene. Íftim jém Romapic pixiñtam jém yaguiñpic miññe. Íftim jém nunta Israelpic pixiñtam y jém tuņgapic pixiñtam jém moĵwiip icupic jém judíos iņquímayooyi. ¹¹Íftim jém pixiñtam de Creta y de Arabia. Ammatontá aichámpic anaņmafiimi iga aņmadayyajpa jém wıtampic cosa jém tawadayñewiip Dios.

¹²Itumpiy agui ipooñajjamyaj. Da icutiıyıy tí wiap iĵısyaj. Nacwácyajtap:

—¿Yíp tí nimtooba?

¹³Pero tuņgac ixaayıyyajpa. Nimpa:
—Yıpyaj uquiyaj.

Tí inímáy Peto jém pixiñtam

¹⁴Pero jém Peto teñchucum con jém once apóstolyaj. Pimi ĵıy. Inímáy jém aņtuumaņeyajwiip:

—MiJudeapic mipixiñtam con inñumpiy jém miıftañwiip Jerusalén, wiĵodónataami tí mannímáypa. Matontáami. ¹⁵Yıp pixiñtam da uquiyaj juuts michfam inñistámpa porque yaguiñ taif a las nueve de la mañana. ¹⁶Iwatyajpa jempic porque asfam nimpa jém wiñicpic profeta jém Joel:

¹⁷Jém iņañpigam ĵama, nimpa Dios, anchiiba ánAnama jém pixiñtam.

Michfam inñaymanictam y jém inñommanictam iņmatyajpa ich anaņmafi.

Jém woñjaychixfam iixyajpa poñ.

Jém wiđaytam maıwıñayajpa.

¹⁸Anchiiyajpa jém ánAnama jém acuyoxayajpáppic jém pixiñtam y jém yomtám iga iņmatyajpa ich anaņmafi.

¹⁹Siņyucmi manañquejáypa jém impooñajjampáppic jém đapic oypa inñix.

Naxyucmi manañquejáypatim seña.

Jém seña juuts niipiñ, juuts jucti, juuts ucşoço.

²⁰Jém ĵama pıchpa ichoça, jém poya tsıypa juuts niipiñ antes que núcpa jém ĵama iga miñpa jém inñomi.

Jesigam agui wiıquejpa jém Dios ipimi.

²¹Jesic tanĴatıņ Dios iciacputpa itumpiy jém iņwejpátyajpáppic jém tánOmi inñiyimi.

²²Nimítim jém Peto:

—MiIsraelpic mipixiñtam, amatónaytaami tí mannímáypa. Tsam wiıquejpa mimichtámanjjom

iga Dios icutsat jém Jesús jém Nazaretpic pìxiñ. Dios ichi ipìmi iga wiap iwat jém ðapic oypa tánix, jém wibic milagro y jém seña. Michfam inwìjodotam. ²³Pero michfam ða inwadáy caso iga Dios icutsat jém Jesús. Inçiijuçcotta jém enemigo iciijom. Iñasca jempic porque dende wiñigam ixunpa Dios iga mimichfam inçiijuçcottámpa jém malopic pìxiñtam iciijom iga accaataiñ cunusyucmi. ²⁴Pero Dios icpis. Iciacput. Porque ða wiap iga caaneeba ichý. ²⁵Jém wiñicpic anjagooyi David inmatpa de Jesús cuando nimpa:

Siempre ánixpa jém ánOmi anwiñjom.

Awaganaít aich iga odoy aciñiñ.

²⁶Jeeyucmi ich agui amaymay ánanamanjom.

Ananmatpa jém wibic anmáti porque agui amaymay.

Jeeyucmi ða aciñpa iga acaaba porque anjodoñ iga apispa.

²⁷ManJatuñ Dios, mich ða inñhacpa ánanama jém lugar juí íf jém caaneyajwiip.

Ðaítim inñjácpa iga púcpa imíjtay jém micuyoxapáppic jém Cuáyñewiip iAnama.

²⁸Ananquejay jém tuñ jém ananicpáppic juí ampictsonpa jém vida.

Agui amaymay iga nicpa awagaií con mimich.

Jempam nimpa jém David cuando inmatpa de Cristo.

²⁹Jesic nimítim Peto:

—Mantiwítam, tsam wiñquejpa iga caaneum jém tanjatunwewe David, cumtá jém tsaajosjom. Hasta siip yiim íf jém tsaajos.

³⁰Pero jém David tum jém Dios inmatciwiñ idic. Ijodoñ iga Dios ijycamayñe iga tum jém iocmanic, jém naypáppic ocmi, jeam jém Cristo. Tsýpa juuts jém más mijpic anjagooyi. ³¹Jém David iixñe íf miñpa dende wiñigam. Inmatpa iga pispa jém Cristo. Nimpa iga jém íanama ða tsýpa juí íf jém caaneyajwiip, jém imíjtay ða púcpa. ³²Yíptim Jesús icpis jém tanJatuñ Dios. Aichtam antumpiytam ánixñeta. Jeeyucmi atsýta juuts testigo. ³³Ocmi nanicta sinyucmi jém Dios inwimi. Ipicton jém Dios iAnama juuts ijycamayñe iJatuñ. Jém siippic inñix y immatoñne, jeétim Dios iAnama iwat. ³⁴Porque ða je jém David quím sinyucmi, pero nim jém David:

Jém tanJatuñ Dios inímáy jém tánOmi Cristo:

“Miñi micoñi ananwimi,

³⁵ hasta que ich manacçoñwýpa jém inñenemigo.”

³⁶MiIsraelpic mipixiñtam, wijodónataami iga yíptim Jesús, jém michtampic incunúnta cunusyucmi, Dios iccám jém tánOmi y jém Cristo.

³⁷Cuando mimatoñyaj íf nimpa jém Peto, agui anyácyaj íanamanjom jém pìxiñtam. Tsam icwácyajpa jém Peto con jém tunçac apóstolyaj. Inímayyajpa: —Mantiwítam, çífi wiap anwatta?

³⁸Jesic ocmi jém Peto icutson. Inímáy:

—Cucactaami inñjixi. Chinçtaami cada tumtum de mimichfam jém Jesucristo inñiyimi iga Dios miccáyáypa jém inñánca. Jesic Dios michiiba jém iAnama. ³⁹Wiñigam

Dios ijíycámayñe iga miwíwadáypa mimichítam y jém immaníctam. Iwíwadáypatim jém ítyajwiip juumi con ítumpiy jém iwíanjamyajpáppic jém tanJatuj Dios iga inwejáypa.

⁴⁰Jém Peto inmadáypa jáyan aḡmafi. Tsam pími inquímpa jém pixiñtam. Inímáy:

—Pictsoḡtaami yíp wibic aḡmafi iga micíacputtamtaḡ iga dá inwagananicpa jém togoñeyajwiip.

⁴¹Jesic jém ipictsoḡnewiip jém wibic aḡmafi acchiḡyaja. Jeetim jama tsam jáyan tigiyñeyaj, como tres mil pixiñtam. ⁴²Seguido icuyucayajpa juuts inquejayñe jém apóstolyaj. Nawínanigayyajtaḡ itumpiy de jeeyaj. Inwejpátyajpa Dios. Anḡtuumayajpa iga iwécyajpa jém caxtánañi.

Iwínascayajpa jém wiñtipic icupicneyajwiip Cristo

⁴³Cada tumtum de jeeyaj tsam icinpa Dios. Jém apóstolyaj iwatyajpa jáyan jém milagro y jém seña. ⁴⁴Itumpiy jém icupicneyajwiip Cristo ítyaj de acuerdo. Títam iniityaj icumunmichiyaj. ⁴⁵Imayajpa títam iniityaj. Iwécyajpa jém tumiñ, ichiyajpa jém dapic iniityaj iga ijuyapa títam ífógoyáy. ⁴⁶Cada jama anḡtuumayajpa jém mijpic mastíctjom con tumti ijixi. Iwécyajpa jém caxtánañi tic por tic. Wagawícyajpa. Agui maymayaj. Wibic jixi iniityaj jém íanamaḡjom. ⁴⁷Tsam icujípyajpa Dios. Jém dapic icupicpa Cristo iwíxyajpa jém icupicneyajwiip Cristo. Cada jama jém tanJatuj Dios inimiñpa jém

pixiñtam jém iciacputpáppic iga más jáyanḡp jém icupicneyajwiip.

Acpista tum cuxuj

3 Tum jama nicyajpa jém Peto y Xiwan jém mijpic mastíctjom. Nicpa iwat oración a las tres de la tarde, jesigam jém hora de oración. ²Jesic tsacta tum cuxuj jém mastíctjom aḡna. Je cuxuj mu inay. Nanicḡta tum jém puerta inḡa iniyi jém Wibic Puerta. Jemum tsacta cada jama iga iwágayíñ tumiñ jém tigiyajpáppic jém mijpic mastíctjom. ³Cuando jém cuxuj iix iga tigiyapa jém Peto y jém Xiwan, iwágay tumiñ. ⁴Jesic jém Peto y Xiwan íammatsyaj jém cuxuj. Jém Peto inímáy jém pixiñ:

—Aámmatsi.

⁵Jém cuxuj icupic, íammats jém Peto. Ijispá iga ichiiba tumiñ. ⁶Pero Peto inímáy:

—Da anaj plata ni oro, pero manchiiba jém anaiwíip. Jém Jesucristo de Nazaret iniyimi manímáypa: Tsucumi. Wítim.

⁷Ocmi jém Peto imatsáy ici, jém inwímipic, ijíctsum. Jeeti rato wítsiyum jém cuxuj ipuy. ⁸Teñchucumum jém cuxuj, yóyquímpa, mojum wífi. Tigiy jém mastíctjom con jeeyaj. Wípa, yóyquímpa, icujípa tanJatuj Dios. ⁹Itumpiy jém pixiñtam iix jém cuxujpic idic iga wítpam y icujípa Dios. ¹⁰Iixpicyajpa iga jeetim jém pixiñ jém iwácpáppic tumiñ jém mastícaḡna juí íf jém Wibic Puerta. Agui tineaḡjacyaj, agui ipooḡanjamyaj cuando iix íf inasca jém pixiñ.

**Títam inmat jém Peto jém
corredor de Salomón**

¹¹Jesic jém cuxuj, jém acpisnetawiiip, da ichactooba jém Peto y Xiwan. Poyimi miñyaj jém pixiñtam, aņtuumayajpa jém Salomón icorredor juť ityaj jém Peto y Xiwan. Agui ámanjacyaj.

¹²Cuando iix iga agui aņtuumayajpa jém pixiñtam jém Peto inímáy:

—MiIsraelpic mipixiñtam, źtiiga ampoonaņjamtámpa, tiiga agui anámtámpa? ¿Que mich inñis iga ich anacpis yíp pxiñ iga wiap anacwit con ich ampimi? ¿Que inñispa iga tsam wibic apixiñ? Odoy jisi jempic. Porque Dios icpis. ¹³Jém wiñicpic tanjatunwewetam jém Abraham, jém Isaac y jém Jacob tsam ijisyajpa tanJatun Dios. Jeeťim Dios siip iwat así iga taņcujiptamiñ jém iManic Jesucristo, jém michpic inĉiijunĉotta jém aņjagooyi icijjom iga accaataiñ. Cuando jém Pilato icutsigaytooba idic, mimichťam da inñicta. ¹⁴Da inñicta iga cutsigayťaiñ jém wibic pxiñ jém dapic táņcaiy. Pero inwácta iga cutsigayťaiñ tum accaoypaap. ¹⁵Jempam iniccaata jém tachiipáppic jém tamvida. Pero Dios icpis de juť it jém caaneyajwiip. Aichťam atsíyťa juuts atestigo iga numa pisneum.

¹⁶Yípiťim Jesús inñiyimi acpiťa yíp pxiñ jém siippic inñix, michťam inñixpicta. Witsíy porque icupic iga jém Jesús wiap iyoxpát. Inasca así juť inámpacneta.

¹⁷Mantiwitam, anjodoņ iga immalwadáy jém Jesús porque da inĉutiyyíy iga Dios icutsat. Đatim icutiyyiyaj jém ininĉagooyítam.

¹⁸Itumpiy jém wiñicpic Dios inĉmatĉiwiñ niñyaj iga tienes que yaachwattap jém Cristo jém icutsatnewiiip Dios. Siip Dios iccupacneum juuts niñyaj jeeyaj.

¹⁹Jeeyucmi manñmáypa: Cucaci inñixi, tsaci iga immalwatpa, jesic jém tanJatun Dios miccáyaypa jém inťaņca. Michiiba tum wibic maymáyaj iñanamajjom,

²⁰micutsadáypa jém Cristo jém icupiņnewiiip dende wiñgam para mimichťam. ²¹Siip nic iti siñyucmi jém Jesucristo. Jenum tsíy hasta que iwitsacpa itumpiy cosa juuts nim jém wiñicpic aņmatĉiwiñ jém cuáyñewiiip. ²²Jempigam inímáy Moisés jém wiñicpic tanjatunwewetam: “Jém tanJatun Dios ictsucumpa tum jém profeta entre mimichťam juuts acutsat aich. Matonťaami itumpiy títam miñmáypa jém profeta. ²³Porque itumpiy jém đapic iwadáypa caso yíp aņmatĉiwiñ iga icupicpa, actogoyťap, toptap de jém nación de Israel.”

²⁴Itumpiy jém wiñicpic aņmatĉiwiñ dende jém Samuel hasta siip, inmatyajpa iga iwatpa Dios juuts tánixpa siip. ²⁵Mimichťam inĉjatunwewetam jém wiñicpic aņmatĉiwiñ. Dios ijycámáy iga miwíwadáypa. Iwat tum trato con jém wiñicpic taņwewetam cuando inímáy jém Abraham así: “Tum jém mich immānic tsam iwíwadáypa itumpiy jém pixiñtam icuwíťi yíp naxyucmi.” ²⁶Cuando Dios icpis jém iManic Jesucristo, wiñťi micutsadáy iga miwíwadáyaiñ mimichťam. Ixunpa Dios iga inĉhaguñ iga immalwatpa cada tumtum de mimichťam.

Nanicta jem Peto y Xiwan
jem anjagooyi iwiñjom

4 Iganam jem Peto y Xiwan inmadayyaja jem pixiñtam, miñyaj jem panijyaj. Wagamiñyaj con jem policia icomandante y con jem saduceoyaj. ²Tsam jójneyaj porque jem Peto y Xiwan inquejáypa jem pixiñtam iga acpistap jem caaneyajwiip porque pisneum jem Jesús de juí íf jem caaneyajwiip. ³Ocmi matsta jem Peto y Xiwan, cotta cárcel porque tsuuyim. Hasta icuquejama ciipinjap. ⁴Pero tsam jáyan jem imatoñneyajwiip jem Peto inmatí icupicyaj jem Cristo. Jeetim jama icupicyaj como cinco mil pixiñtam.

⁵Icuquejama anuumayaj Jerusalén jem Israelpic anjagooyiyaj, con jem wídaytam, con jem escribaspic maestroyaj. ⁶Íftim jem Anás jem cobacpic panij anjagooyi. Íftim jem Caifás, jem Xiwan, jem Alejandro y ítumpiy jem cobacpic panij ítíwitam. ⁷Jesic cutsatta jem policia iga inimíñiñ jem Peto y Xiwan jem anjagooyiyaj iwiñjom. Acwáta:

—¿Í ipimimi, í iñiyimi inwatpa jexpic cosa?

⁸Jesic Peto tsam iniit jem Dios íAnama. Inímáy:

—Manañjagooyíam, miIsraelpic miwídaytam, ⁹mich anacwácpa jutsa mu iwíwadayta jem cuxujpic ídic, jutsa micpista. ¹⁰Siip manañmadáypa michám inwiñjom iga ítumpiy jem Israelpic pixiñtam ijodónayajiñ iga Jesucristo icpis yíp píxiñ yimpic íf inwiñjom. Acpista jem Jesús iniyimi, jem Nazaretpic.

Jeetim píxiñ mimichám injunúnta cunusyucmi. Pero Dios icpis de juí íf jem caaneyajwiip. ¹¹Yíftim Jesús tsíy juuts tum wibic tsa para jem tic. Pero michám, jem mílicwattampápic, impatsayít. Pero siip yíftim tsa imatspacne jem tic. ¹²Da í tunzac wíapaap taciapcut icuwífi yíp naxyucmi. Dios da icutsat tunzac píxiñ iga taciapcutpa.

¹³Jem anjagooyiyaj agui ipooñanjamyaj porque iix iga da ciñpa inmat jem Peto y Xiwan. Icutiyyiyaj iga da cuyujne, siiba juuts cualquier píxiñ. Jesic icutiyyiyaj iga jáy iwaganasi jem Jesús. ¹⁴Iixyajtím iga iwaganateñ jem cuxujpic ídic, jeeyucmi da wíap inñim iga migooyi. ¹⁵Quebacputta jem Peto y Xiwan con jem cuxujpic ídic iga jem anjagooyiyaj wíaiñ ijisyaj tí wíap iwatyaj. ¹⁶Jesic nanímayyajtá entre jeeyaj:

—¿Tí wíap tanwat con yíp pixiñtam? Porque itumpiy jem ityajwiip Jerusalén iwíjodonj iga iwat tum wibic milagro. Da wíap tanayam. ¹⁷Pero iga odom más juumi niguiñ yíp anmatí, jesic tannímáypa iga: Manchiiba tum mijpic castigo siiga seguido ininmatpa yíp Jesús iniyimi.

¹⁸Jesic ocmi anwejayta jem Peto y Xiwan jem anjagooyicim. Nímayta:

—Odoy más anmatí jem Jesús iniyimi. Odoy anmadaayi jem pixiñtam jexpic anquímayoyi.

¹⁹Pero jem Peto y Xiwan inímáy jem anjagooyi:

—Jistaami michám inyaac siiga más wí iga mancupicpa mimichám o iga ancupicpa Dios. ²⁰Aichám da wíap antsacta iga anañmattámpa tí ánixñe y tí ammatoñne.

²¹ Jesic eybíc inímayyaj jém anjagooyi iga ichiiba castigo siiga dá ichacpa iga inmatpa. Pero dá i wiá michi castigo porque itumpiy jém pixiñtam tsam icujípyajpa Dios porque iix tí inasca jém cuxujpic idíc. Ocmi cutsigayta jém Peto y Xiwan. ²² Jém pixiñ jém wadayñetawiiip jém milagro, jém acpisnetawiiip, iniitum más de cuarenta iamtiy.

Jém icupicneyajwiiip Jesús iwágayyajpa Dios iga iyoxpádiñ

²³ Cuando cutsigayñetawum jém Peto y Xiwan, nicyaj jut it icompañeroyaj. Inmadáy itumpiy títam inímayyaj jém panij anjagooyiyaj y jém Israelpic wídaytam. ²⁴ Cuando imatonyaj tí inímáy jém Peto, itumpiy jém Jesús icuyujciwiñ con tumti jixi moj inwejpátyaj Dios. Nímyajpa:

—ManJatun Dios, mich inwat jém siñ, jém nas, jém lamar y itumpiy jém itwiiip yíim. ²⁵ Wiñigam jém incyuxapaap jém David ijaychac mich iniñmáti. Mich inAnama iyoxpát iga ijay. Inímáy:

¿Tíiga tsam jóyñeyaj jém naciónyaj jém dapic icupicyajpa Dios?

¿Tíiga tsam ijisquímpa jém pixiñtam jém cosa dá para tí wí, jém dapic i iyoxpátpa?

²⁶ Antuumayaj jém reyyaj con yíp naxyucmipic anjagooyi. Nicyaj en contra de jém tanJatun Dios, nicyaj en contra de jém Cristo jém icutsatnewiiip Dios.

²⁷ Numa antuumayaj yíp Jerusalén jém Herodes y jém Poncio

Pilato, jém tungac pixiñtam jém dapic je de Israel con jém Israelpic pixiñtam. Nicyajpa en contra de jém wibíc imManic Jesús jém michpic iniccám iga Ciacpudoypaap. ²⁸ Jeeyaj cupacpa iwatyaj juuts mich inñisne iga inascaaba jém imManic. ²⁹ Siip manJatun Dios, ixi yíp pixiñtam. Nímyajpa iga achiiba tum mijpic castigo. Mançuyoxatámpa. Ayoxpáttaami iga wiap ananmat iniñmáti. Acamamwadaayi ánanama iga odoy aciñiñ. ³⁰ Achii jém impimi iga anacpíspa jém mímnewiiip, iga anwatpa jém milagro y jém seña jém Jesucristo iniyimi, jém wibíc imManic.

³¹ Cuando yaj inwejpátyaj Dios, pími tsigóypa jém tic jut antuumaneyaj. Itumpiy jém pixiñtam tsam iniityaj jém Dios iAnama. Dá cñiyajpa iga inmatpa jém Dios inmáti.

Itumpiy cosa icumunmichiyaj

³² Itumpiy jém icupicneyajwiiip tumti ijixi y tumti ianama. Dá i ijíspa iga imíchi icutum títam iniityaj. Ijísipa iga itumpiy cosa icumunmichiyaj. ³³ Jém apóstolyaj seguido inmatpa iga pisneum jém tánOmi Jesús. Tsam wiap inmat porque Dios ichi jém ipimi y tsam tóyoyajpa. ³⁴ Dá i jém yaachayajpáppic. Porque itumpiy jém iniitwiiip inas o itic, imáy iga inimiñpa jém tumiñ. ³⁵ Ipictonj jém apóstolyaj, iwécayajpa, ichiyajpa cada tumtum de jeeyaj iga ijuypa títam ifogóyáy. ³⁶ It idíc tum levitapic pixiñ inñiyi José. Nay jém isla de Chipre. Jém apóstolyaj iccámayyaj inñiyi, Bernabé. Jém

iñiyi nimtooba jem yoxpádoypaap.
³⁷Yíp pìxiñ inií idíc tum jaca
 nas, ocmi imáy. Inimiñ jem tumiñ,
 iciijunçodáy jem apóstolyaj iciijom.

Jém Ananías y Safira itájca

5 Jemum íttim tum pìxiñ iñiyi
 Ananías con iwichomo Safira.
 Imáyyajtim tum jaca nas. ²Pero yíp
 pìxiñ iñnéc uxaj jem nas ichowa.
 Jém iyomo íttim de acuerdo con
 iwídaya. Nìmyaj iga yicsájam
 ichowa jem nas. Jém pìxiñ miñ
 ichagáy jem apóstolyaj ipuyciim.
³Jesic Peto iñímáy jem Ananías:
 —MiAnanías, ¿tiiga tigiy jem
 Wocciwiñ iñanamajom iga
 immigóyápa jem Dios iAnama iga
 iññéctsy uxaj jem nas ichowa?
⁴¿Que da immiichi jem nas
 cuando dánam immáyñe, cuando
 immáyñeum immiichiitim jem
 ichowa? ¿Tiiga iñjisa iga iñwatpa
 jempic? Immigóyáy Dios, da
 immigóyáy tum pìxiñ. ⁵Cuando
 imatoñ tí nimpa jem Peto, actiñ
 jem Ananías, jemti caanas. Jesic
 tsam pimi cñyay itumpiy jem
 imatoñneyajwiip tí iñasca jem pìxiñ.
⁶Tsucumyay jem woñjaychixtam,
 iñmonyaj jem tsúts, nic icumyay.
⁷Cuando nasne tres hora, miñ
 jem Ananías iwichomo, da ijodonj
 tí nasne. ⁸Jesic jem Peto icwác jem
 yomo:

—Anímaayi, ¿numa jesájam
 ichowa jem nas jutsañ achí jem
 iñwídaya?

Nim jem yomo:

—Numa jesájam.

⁹Jesic Peto iñímáy:

—¿Tiiga iñwatta de acuerdo con
 iñwídaya iga iñcutitspa jem Dios

iAnama? Jemum miñiyaj añsicmi
 jem oyñewiip icum jem iñwídaya.
 Siip michgacfi nicpa micum.

¹⁰Jeefi rato actiñ jem yomo jem
 Peto ipuyciim. Caanas. Cuando
 tigiyay jem woñjaychixtam
 caaneum jem yomo. Ítopyay, nic
 icum tum lado juí cumnetá jem
 iwídaya. ¹¹Tsam pimi cñneyaj
 itumpiy jem icupicneyajwiip
 Cristo con jem imatoñneyajwiip tí
 iñascayaj.

Wattap jáyan jem milagro y seña

¹²Jém apóstolyaj iwatyaj
 jáyan jem milagro y seña jem
 pìxiñtámajom. Anuumaneyaj
 itumpiy de jeeyaj jem mijpic
 mastic icorredor iñiyi Salomón.
¹³Pero jem dápic icupicpa Cristo
 ni tum da iñpitsneyaj, pero tsam
 iwixyaypa jem Dios ipixiñtam.
¹⁴Jém icupicneyajwiip Cristo más
 jáyanap. Jém pìxiñtam y yomtam
 cada jama más icupicyajpa jem
 Dios iñmáti. ¹⁵Ítopyajpa jem
 mimneyajwiip con ichees. Nicpa
 ichacyaj calle iga cuando naspá
 jem Peto, ictsýayíñ jem icumunçi
 algunos de jeeyaj. ¹⁶Inimiñyajpatim
 jem mimneyajwíppic jem
 tungac attebetay jem ityajwiip
 nocojom Jerusalén. Inimiñyaj
 jem mimneyajwiip y jem
 imatsneyajwiip jem mal espíritu.
 Cupisayyaj itumpiy.

Matstá jem Peto y Xiwan

¹⁷Jesic jem cobapic
 panij anjagooyi con jem
 iwaganaityajwiip, jem saduceopic
 pìxiñtam, tsam pimi icujóyiyay.

¹⁸Matstá jem apóstolyaj, cotta

cárcel. ¹⁹Pero jeefim tsuu Dios icutsat tum sɨnyucmɨpic pɨxiñ iga inɨáyiñ jém cárcel. Topta jém apóstolyaj. Nímayta:

²⁰—Nigi miteñi jém mɨjpic masticjom. Anmadayyaj jém pɨxiñtam iga Dios ichiitooba jém jomipic vida.

²¹Cuando imatonyaj jém apóstolyaj, icuquejama, tsúyítim, tigiyaj jém mɨjpic masticjom, moj inquejáy jém pɨxiñtam.

Jesic jeefim jama an̄tuumaneyaj jém cobacpic panij con itumpiy jém Israelpic anjagooyiyaj y jém wiđaytam iga iwatyajpa tum mɨjpic junta. Piimiyta jém policía iga niguiñ itopyaj cárcel jém presoyaj.

²²Pero cuando jém policía núc jém cárcel, da ipátyaj jém preso. Jesic eybic setyaj. Miñ inmadáy jém anjagooyi. ²³Nimayja:

—Cuando anúc jém cárcel tsam wian̄pajne y jém guardia ichan̄wɨwatne cuenta jém cárcel ipuerta. Cuando anánáy jém cárcel da i ampát.

²⁴Cuando imaton̄ ti inímáy jém policía, agui ipooñanjamyaj jém panij anjagooyiyaj con jém mastic icomandante. Da icutiyyiyaj ti naspa y hasta juť cuyajpa yíp asunto.

²⁵Jeefi rato miñ tum pɨxiñ, inmadáy jém anjagooyi:

—Jém wisten pɨxiñ, jém michfampic impajta cárcel, siip íf jém mɨjpic masticjom. Síp iccuyuj jém pɨxiñtam.

²⁶Jesic jém comandante con ipolicía nic imétsyaj jém apóstolyaj. Inimiñyaj, pero da imalwadáy porque tsam cɨñneyaj. Ijɨspa iga

inácscayajpa tsaami jém pɨxiñtam.

²⁷Cuando inimiñyaj, nanicta jém anjagooyiyaj iwiñjom, jém Sanhedrín. Jesic jém cobacpic panij inímáy:

²⁸—¿Da mannímayñeum iga odooy an̄mati yíp pɨxiñ iniyimi? ¿Pero tí sıp in̄wat? Icuwífi yíp Jerusalén núc jém inin̄máfi. ¿Que mich antsagaytooba la culpa iga accaata yíp pɨxiñ?

²⁹Jesic jém Peto con jém tungac apóstolyaj icutsonyaj. Inímayyaj: —Más wɨ iga an̄cupicpa Dios que iga an̄cupicpa jém pɨxiñtam. ³⁰Jém wiñicpic tan̄wewetam ijɨsyajpa Dios. Jeefim Dios icpis jém Jesús jém michpic iniccaata, in̄cunúnta cunusyucmi. ³¹Pero Dios ininic sɨnyucmi, iccoñ in̄wimi. Iccám iga Mɨjpic in̄Jagooyi, iccám iga jém Ciacpudoypaap. Iwadáy jempic iga ichiiba lugar jém Israelpic pɨxiñtam iga icucacpa ijɨxi iga wadaytap perdón jém itán̄ca. ³²Aichtam atsíyta juuts tum testigo iga numa pis jém Cristo, quím eybic sɨnyucmi. Tsíyítim juuts tum testigo jém Dios iAnama jém ichiñewiip Dios jém icupicneyajwiip.

³³Cuando imatonyaj ti nimpa jém Peto, tsam jóyñeyaj jém anjagooyi. Tsam iccaayajtooba. ³⁴Pero entre jeeyaj itím idic tum fariseopic pɨxiñ in̄yi Gamaliel. Tum accuyujoypaap de jém Israelpic an̄químayoyi. Jém pɨxiñtam tsam iwɨxyajpa. Teñchucum, ipiimíy jém policía iga iquebacpuđiñ tum rato jém apóstolyaj. ³⁵Ocmi inímáy jém anjagooyiyaj:

—MiIsraelpic mipɨxiñtam, nawattamtaji cuenta. Cuidado

iga immalwadáypa yíp pixiñtam.
³⁶Jiſtaami iga pecam tsucum jém Teudas, tum pixiñ tsiyítip juuts tum mijpic añjagooyi. Initsucum como cuatrocientos pixiñtam. Ocmi accaata jém pixiñ y jém itúnjyaywiip cutogóyayaj. Jemum cuyaj. ³⁷Más ocmi cuando wattap jém censo, tsucum jém Judas, tum Galileapic pixiñ. Initsucum tsam jáyap pixiñtam. Pero ocmi accaatañim. Cupóyayaj itumpiy jém itúnjyaywiip. ³⁸Jeeyucmi mannímáypa, tsaci yíp pixiñtam. Odooy moogiyi. Porque siiga yíp añquímayooyi pixiñtam ijixquimi, cuyajpa. ³⁹Pero siiga yíp pixiñtam iniidáy Dios ijixi, mich da wiap inictogoy. Nawattamtaji cuenta. Cuidado iga iníñatámpa Dios.
⁴⁰Jesic itumpiy jém añjagooyiyaj icupicyaj juuts nim jém Gamaliel. Ocmi añwejayta jém apóstolyaj, cótsyajta, nímayyajta iga odooy más añmati Jesús iniyimi. Ocmi cutsigayyajta. ⁴¹Jém apóstolyaj putyaj jém añjagooyi iwíñjom. Agui maymayyaj porque Dios ijíc iga yaachwatyajta jém Jesús icuyucmi. ⁴²Jesic cada jama accuyujóypa jém mijpic masticjom y jém itiganjomayaj. Da ichacpa iga inmatpa jém wibic añmati iga Jesús je jém Cristo.

Accámta siete jém iyoxpáppic jém apóstolyaj

6 Jém tiempo tsam jáyanap jém Dios ipixiñtam. Icupicyajpañim jém griegopic pixiñtam. Jeeyaj agui jyyajpa acontra de jém Israelpic pixiñtam porque inejawégáypa jém

cunoytam iwíccuy cuando iwécpa jém wíccuy cada jama. ²Ocmi jém apóstolyaj inuumawatyaj itumpiy jém icupicneyajwiip jém Cristo. Inímayyaj:

—Da wi iga antsactámpa iga anañmatpa jém Dios inmati iga acwígoytámpa. ³Jeeyucmi mantiwitam, métstaami siete de mimichtam jém wibic pixiñtam, jém jixiywiip, jém tsampic iniit jém Dios iAnama. Accámtaami iga iwatpa jém yoxacuy iga iwécpa jém wíccuy. ⁴Pero aichtam seguido anañwejpáttámpa Dios, anañquejpa jém Dios inmati.

⁵Jesic itumpiy jém Dios ipixiñtam ityaj de acuerdo iga iwatyajpa juuts nímuyaj jém apóstolyaj. Cupiñta jém Esteban. Jém pixiñ tsam iniit jém Dios iAnama. Cupiñyajtáñim Felipe, Prócoro, Nicanor, Timón, Parmenas y jém Nicolás. Jém Nicolás miñ de jém Antioquía. Je tigiyñe idíc iga icupicpa jém Israelpic añquímayooyi. ⁶Ocmi namiñta icusiete jém pixiñtam hasta jut it jém apóstolyaj iga inwejpádáypa Dios para jeeyaj. Cada tumtum de jeeyaj jém apóstolyaj ichicunúgáy icobac.

⁷Jesic tsam jáyanap jém Dios inmati, núcpa yim jeexic. Tsam jáyanapñim jém Dios ipixiñtam jém atebet Jerusalén. Wañi jém Israelpic panij icupicyajñim.

Matstá jém Esteban

⁸Jém Esteban tsam iniit jém Dios ipimi y tsam iniit jém wibic tóyooyi. Agui iwatpa jém milagro y jém seña jém pixiñtamanjom.

⁹Jesic algunos jém pixiñtam miñ

iníñayaj jém Esteban. Miñyay algunos de jém sinagoga de jém Libertinopic pixiñtam. Miñyajím de jém naxyucmi de Cirene, de jém naxyucmi de Alejandría, de jém Cilicia y de jém Asia. Moj íñacayaj jém Dios inmafi con jém Esteban.

¹⁰Pero jém pixiñtam da wia micoñwíy jém Esteban porque tsam jixííy. Jém Dios iAnama iyoxpát iga tsam wia micutsoj. ¹¹Jém áñayajpáppic con Esteban iyojpa algunos pixiñtam iga icumigóypa jém Esteban. Nímyaj:

—Ich ammatonj iga yíp Esteban imalnímáy jém Moisés inquímayooyi. Tsam icujypatím Dios.

¹²Jém áñayajpáppic con Esteban icujíñáy jém pixiñtam, jém Israelpic wídaytam y jém escribaspic maestroyaj. Icutuumacayaj jém Esteban, matsta, nanicta jém panij anjagooyicim.

¹³Ocmi inimiñyay tunjac jém migoypaap. Nímyaj:

—Yíp pxiñ da ichacpa iga icujypa jém tammastic. Tsam icujypatím jém Moisés inquímayooyi.

¹⁴Ammatonta iga nímpa iga Jesús jém Nazaretpic pxiñ imíswatpa jém tammastic y icucagáypa jém costumbre jém tatsagayñewiip Moisés.

¹⁵Jesic ítumpiy jém coñayjwiip jem, agui íamyajpa jém Esteban. Íxyaj iga ancac jém íamooyi juuts tum sinyucmipic pxiñ.

Nacupjtap jém Esteban

7 Jesic jém cobapic panij anjagooyi icwác jém Esteban. Inímáy:

—¿Que numa inwat juuts nímyajpa?

²Jém Esteban inímáy:

—Mantíwítam, minjagooyítam, amatonjtaami. Jém wibic tanDios iwiñquejáy jém wiñcpic tanwewe jém Abraham. Iwiñquejáy jém naxyucmi de Mesopotamia cuando danam nicne ífi jém naxyucmi de Harán. ³Dios inímáy: “Puti jém inñaxyucmi. Tsaci jém iníwítam. Nicim jém naxyucmi iga manaquejáypa.” ⁴Ocmi jém Abraham put jém naxyucmi de Caldea jut íf idic. Nic ífi jém naxyucmi de Harán. Jemigam ca jém ijatun. Ocmi Dios inimiñ jém Abraham hasta yim jut taitta siip.

⁵Pero Dios da ichi ni tum jaca nas jém imichipic ni jut icteñpa ipuy. Pero ijycamayñe iga ichiiba jém nas y cuando caaneum, tsýpa jém nas para jém imanictam. Pero cuando ijycamáy iga ichiiba jém nas da inií imaníc ni tum. ⁶Dios inímáy: “Jém immanictam nicpa jém tunjac naxyucmi. Nicpa ífi juuts juumipic pixiñtam. Tsýyajpa iga esclavo, yaachwatyjtap cuatrocientos amtiy.” ⁷Nimpatím Dios: “Ich anchiiba castigo jém pixiñtam jém ityajwiip jém naxyucmi jut natsýyajta iga esclavo. Jesic cuando putyajpa jemíc, miñyajpa eybic yíp naxyucmi iga acuyoxap.” ⁸Dios iwat tum trato con jém Abraham. Inímáy iga iwadáyin jém marca de circuncisión jém imanictam juuts tum seña iga Dios iwadayñe jém trato con jeeyaj. Jeeyucmi cuando nay jém imaníc Isaac, cuando iniifum ocho día, jém Abraham iwadáy imaníc jém marca

de circuncisión. Ocmi cuando manigíyum jém Isaac, iwadáyítm jempic jém imaníc Jacob. Ocmi cuando manigíyum jém Jacob iwadáyítm jempic jém imanictam. Jém doce imanictam tsíyyaj juuts jatunpic de jém doce tribu de Israel.

⁹Yíp Jacob imanictam jém wiñicpic tantíwítam tsám ijóyixyaj jém ijáyuc José. Iachiyaj imáychi jém ijáyuc jém tunjac pìxiñtam. Ocmi nanicta juumi jém naxyucmi de Egipto. Pero Dios iwaganait jém José. ¹⁰Iciacput de ítumpiy jém yaachaji. Dios iyoxpát jém José iga tsám jìxiíy iga iwìxiñ jém Egiptopic rey jém Faraón. Ocmi jém Faraón iccám jém José iga gobernador de jém naxyucmi de Egipto. Chiitátm jém cargo iga injacpa jém ítajwìp jém rey ítìccìim.

¹¹Ocmi miñ tum mijpic yuu y tum mijpic yaachaji jém naxyucmi de Egipto y jém Canaán. Jém wiñicpic tantíwítam dá ipátaypa tí icútpa. ¹²Pero cuando jém Jacob ijodóna iga íf trigo Egipto icutsat imanictam, jém wiñicpic tantíwítam, iga ijuyajpa jém trigo. Yíp jém wiñitipic viaje. ¹³Ocmi eybictim icutsat imanictam Egipto. Jesic jém tunjac viaje jém José, jém máyñetawìp wiñigam, inmadayyaj iachiyaj iga ítíwi. Jesic jém rey Faraón icutiíyíy júp raza jém José. ¹⁴Jesic José inímáy ítíwítam iga: “Namiñi jém tanjatun con ítumpiy jém tantíwítam.” Jém miñneyajwìp setenta y cinco con ítumpiy imanictam. ¹⁵Jesic jempan iwat jém Jacob. Nic ífí jém naxyucmi de Egipto. Ocmi jemigam ca jém Jacob.

Más ocmi caayáítm jém imanictam jém naxyucmi Egipto. ¹⁶Cuando ca jém Jacob, naseedayta ítìcmi jém ipacyaj jém atebet Siquem. Jemum cúmayta jém ipac tum tsaajosjom. Jeeítm tsaajos ijuy wiñic jém Abraham. Imáychi tum pìxiñ imanictam, iníyi jém pìxiñ Hamor.

¹⁷Cuando núctooba jém tiempo iga cupacpa jém trato jém Diospic iwadayñe jém Abraham, jesic tsám jáyanap jém Israelpic pìxiñtam jém naxyucmi de Egipto. ¹⁸Ocmi tsucum tunjac rey jém naxyucmi de Egipto jém dapic iixpicpa jém José. ¹⁹Yíp anjagooyi tsám imigóyáy jém wiñicpic tantíwítam. Tsám imalwadáy jém tanjatunwewetam. Ipiimíy iga ichaguiñ jém imanictam, jém yaguiñpic nayñe, iga caayajñ.

²⁰Jesic jém tiempo nay jém Moisés, tum wibic tsìxi, Dios tsám iwìxpa. Jém ijatun icmìjap tres meses ítìccìim. ²¹Ocmi jém ijatun ichac jém imaníc iga caiñnam. Jesic jém Faraón iyommanic ipin jém xutu tsìxi. Icmìjap juuts inuntamanic. ²²Jeeyucmi jém Moisés tsám wìcuyujne. Iwìcutiíyíy ífumpiy jém jìxi jém ítwiip Egipto. Jém Moisés tsám wìap iwat tí quej. Tsám wìap inmat.

²³Cuando jém Moisés inií cuarenta iamíy, ijìspa inamanjom iga nicpa ijooyáy jém ítíwítam jém Israelpic pìxiñtam. ²⁴Jemum iix tum Egiptopic pìxiñ síp imalwadáy tum Israelpic pìxiñ. Jesic jém Moisés icupuj jém ítíwi. Ica jém pìxiñ, ichégáy iga imalwadáy jém ítíwi. ²⁵Jém Moisés ijìspa iga jém ítíwítam icutiíyiyñe

iga Dios icutsat jém Moisés iga iccutsigáyiñ. Pero jeeyaj da icutiyyaj. ²⁶Jesic tungagam jama jém Moisés ipát wisten jém Israelpic pixiñtam síp injayaj. Injijjac. Inímáy: “Odoy áñataami con iníwi. ¿Tíiga minicótstamtap?” ²⁷Ocmi jém áñayajpáppic idíc con ifíwi agui ijóyix jém Moisés. Inímáy: “¿I miccám juuts juez iga ananjijactámpa? ²⁸¿Que anaccaabatim aich juuts matic inicca jém Egiptopic pixiñ?” ²⁹Jesic cuando imatoñ tí nim jém pixiñ, poy jém Moisés. Nic ifí jém naxyucmi de Madián juuts tum juumipic pixiñ. Jenum nay wisten ijaymanic.

³⁰Cuando nasne cuarenta amtiy jém titsinaxyucmi, jém Moisés if idíc nocojom jém cotsic iníyi Sinaí. Jenum iix tum xutu cuy jipsa ixi. Jém juctjom iwiñquejáy tum sinyucmipic pixiñ, jém icutsatnewiip tanJatuñ Dios. ³¹Agui ipooñañjam cuando iix jém jucti. Cuando icunúc nocojom iga iwíámpa, imatoñ iga jiyja jém tanJatuñ Dios. Nimpa: ³²“Ich jém wiñcpic pixiñtam aDios. Ich jém Abraham aDios, jém Isaac aDios y jém Jacob aDios.” Jesic Moisés moj cuetsaayi. Agui cñj, da wiap injammoc jém jucti. ³³Jesic jém tanJatuñ Dios inímáy jém Moisés: “Tsaci jém inçiac porque yim juñ miññ tsam if jém Dios ipimi. ³⁴Ich ánixñe jém ampixiñtam iga tsam yaachwatyajtáp jém naxyucmi de Egipto. Ammatoñ iga agui wejyajpa. Jeeyucmi aquet naxyucmi iga ançiacputpa jeeyaj. Jesic miññi, mançutsatpa eybic jém Egipto juñ miif idíc.”

³⁵Yíptim Moisés jém tsampic ijóyixyay jém wiñcpic pixiñtam jém inímáynewiip iga: “¿I miccám juuts minjagooyi y juuts mijuez?” Yíptim Moisés Dios iccám juuts tum anjagooyi iga iciacputpa jém ipixiñtam. Wiap iwat porque ichi ipimi jém sinyucmipic pixiñ jém iixñewiip juñ yótpa jucti jém xutu cuyucmi. ³⁶Yíptim Moisés ifopyaj Egipto jém wiñcpic tantiwitam. Tsam iwat jém milagro y jém seña jém naxyucmi de Egipto, jém Tsabats Lamar y jém titsinaxyucmi juñ jáy ifi cuarenta amtiy. ³⁷Yíptim Moisés inímáy jém Israelpic pixiñtam iga: “Dios icutsatpa tungac profeta juutsim acutsat aich. Tsucumpa jém nunta tantiwitámanjom juuts ich atsumne. Cupici tí nimpa.” ³⁸Yíptim Moisés if idíc con jém wiñcpic tantiwitam jém titsinaxyucmi cuando ijíyáy jém sinyucmi pixiñ jém cotsicyucmi Sinaí. Ipiçtoñ jém vivopic Dios inmatí iga tachiiñ taichám.

³⁹Pero jém wiñcpic tantiwitam da icupicyay jém Moisés. Ijóyixyay. Ijisyay íanamanjom iga setpa eybic Egipto. ⁴⁰Inímáyay jém Aarón: “Awadaayi tum watnas jém anquejaypáppic jém tun porque da tanjodon juñ nic jém Moisés jém tatopnewiip jém naxyucmi de Egipto.” ⁴¹Ocmi jém Aarón iwat tum watnas, tum xutu xix. Iccaayajpa jém animat jém watnas iwiñjom iga iwatpa sacrificio. Agui maymayyay iga wiap iwat iciimi jém watnas. ⁴²Ocmi Dios ichaganputyay jém pixiñtam. Ichi lugar iga ijisyajpa jém matsa y

ítumpiy cosa jém tánixpáppic
sinyucmi. Jempam ijaychacne jém
librojom jém wiñicpic aḡmaḡciwiñ.
Nimpa Dios:

Mimichám milsraelpic
mipixiñtam, mich dá inicca
jém animat iga aḡwadáy
sacrificio iga anchiiba ich
aḡwiñjom

cuando jáy tawagaiḡi jém
titsinaxyucmi jém cuarenta
amḡiy.

⁴³ Inḡópcóbóypa jém watnas Moloc
con jém ipuctucmastic.

Inisiibaḡim jém watnas Renfán
imatsa

jém michpic inwatneta inḡiimi
iga inḡistámpa.

Jeeyucmi maḡquebacputtámpa
jém inñaxyucmi.

Maḡcuntsattámpa más juumi de
jém naxyucmi de Babilonia.

⁴⁴ Nimpa jém Esteban:

—Jém wiñicpic tantḡiwitam
inisiibaḡim jém puctucmastic juḡ
accáyḡap jém tsaatabla juḡ jayñeta
jém Moisés inḡuímayooyi. Jém
puctucmastic iwat jém Moisés
juuts Dios ipiimíy. Iwat juuts Dios
inḡuejáy jém cotsicyucmi. ⁴⁵ Jesic
ocmi cuando caum jém Moisés,
jém wiñicpic tantḡiwitam con jém
Josué ipictsonyay jém puctucmastic
juuts tum herencia. Ininicyay jém
tuḡgac naxyucmi iganam ífobáyáy
jém tuḡgac pixiñtam iñas. Dios
iquebacput jém tuḡgac pixiñtam
iga ichi jém nas jém wiñicpic
tantḡiwitam. Inisiiyajpa jém
puctucmastic hasta cuando tsíy jém
David juuts aḡjagooyi. ⁴⁶ Dios tsam
ífoypa jém David. Je agui iwattooba
tum mijpic tic juḡ ípa jém

tanJatuḡ Dios, jém ijispáppic jém
tanjatuḡwewe jém Jacob. ⁴⁷ Pero
jém Salomón, jém David imaníc,
iwadáy Dios tum tic, jém mijpic
mastic. ⁴⁸ Mex jém yucmipic Dios
dá ipa jém ticjom jém watnetawiḡp
ciimi, juuts nim jém wiñicpic
aḡmaḡciwiñ:

⁴⁹ Nimpa tanJatuḡ Dios: Sinyucmi
íḡ aḡcoñcuy.

Naxyucmi anaccámne ampuy.
¿Juutspic tic aḡwadaytámpa?

¿Juḡ íḡ jém lugar juḡ wiap anej?

⁵⁰ ¿Que dá ich aḡciimi aḡwat
ítumpiy jém yiimpic ítyaj?

⁵¹ Jesic jém Esteban inñmáytim
jém aḡjagooyiyaj:

—Michtam tsam malotam
inñanama juuts jém dápic icupicpa
Dios. Jém inñatsic dá matóḡóypa,
dá inḡwattooba juuts miñímáypa jém
Dios iAnama. Michtam mijextim
juuts jém wiñicpic tantḡiwitam.

⁵² ¿Juppic jém wiñicpic profeta
dá imalwadáy jém wiñicpic
tantḡiwitam? Iccaayaj jém wiñicpic
aḡmaḡciwiñ jém inḡmatnewiḡp
iga miñpa naxyucmi jém Wibic
Pixiñ jém icutsatnewiḡp Dios. Siḡp
jeetim pxiñ mich inḡwadayta
atraición. Iniccaata. ⁵³ Michtam
impictsonḡta jém Dios inḡuímayooyi
jém tacijunḡcodayñewiḡp jém
sinyucmipic pxiñ, pero da inḡwatta
juuts nimpa jém aḡquímayooyi.

Accaataḡ jém Esteban

⁵⁴ Cuando imatoḡyay jém pixiñtam
ḡi nimpa jém Esteban, tsam
ijóycayaj hasta ichiganḡjiyyajpa íḡts
jém Esteban icuyucmi. ⁵⁵ Pero jém
Esteban tsam iniif jém Dios iAnama.
Jesic amquím sinyucmi, iix juḡ íḡ

Dios. Iixfım iga teñ jém Jesús jém Dios inwimi. ⁵⁶Jesic inímáy jém pixiñfam:

—Aami. Ich ánix iga ánýñe jém siñ. Ánix jém Pixiñ jém Miññewiip Siñyucmi. Siip teñ jém Dios inwimi.

⁵⁷Pero jém pixiñfam innúcyaj jém ifatsic. Pimi jıyaypa, poyimi miñyay, inuumaçayaj jém Esteban. Imatsyay. ⁵⁸Ifopyaj jém attebet, ininicyaj anşicmi. Inácscayaj tsaami. Moj iyígayyaj jém Esteban jém icumigoyñeyajwiip iga icujıyapa Dios. Ichagayyaj iyooñi tum mañpixiñ ipuycim, inñyi Saulo, iga iwadáypa cuenta. ⁵⁹Iganam síp iyígayyaj tsaami jém Esteban, inwejpát Dios. Nimpa:

—MánOmi Jesús, pictsoñi ánanama.

⁶⁰Ocmi jém Esteban costeññeactiñ. Pimi jıyapa. Nimpa: —MánOmi, odoy tségayyaji yíp pixiñfam itánça iga amalwadáy.

Yaj nımi, caum jém Esteban.

Jém Saulo tsam icpóyıyapa jém icupicnewiip Cristo

8 Jém Saulo it de acuerdo con jém iccaaneyajwiip jém Esteban.

Jeetım jama jém ijóyixyajpáppic moj ictsucumyaj iga pimi imalwadáypa jém Dios ipixiñfam jém itıyajwiip Jerusalén. Itımpiy cupóyayyaj. Cunigayyaj yım jeexic hasta jém naxyucmi de Judea y Samaria. Tsıy Jerusalén no más jém apóstolyaj. ²Algunos jém wibic pixiñfam icum jém Esteban. Agui wejyajpa iga accaata jém pixiñ. ³Jesic jém Saulo moj iyaachwatıyaj jém Dios ipixiñfam. Nicpa iméts

tic por tic. Pimimi ijicputpa jém pixiñfam con jém yomtam. Icotıyajpa cárcel.

Añmattap jém wibic añmáñi Samaria

⁴Pero jém cupóyayyajwiip Jerusalén nic inmatıyaj jém wibic añmáñi juñ quej. ⁵Jesic jém Felipe, tum de jeeyaj, nic jém attebet Samaria. Jemum inmadáy jém pixiñtam jém Cristo inquímayooyi. ⁶Anuumaçayajpa itımpiy de jeeyaj, imatonyajpa ti nimpa jém Felipe. Tsam iwadáypa caso cuando iixyaj jém seña jém iwatnewiip. ⁷Porque acpısyajta tsam jáyay jém iniitwiip idic jém mal espíritu. Topta jém mal espíritu. Tsam pimi añwejpa mu iput. Acpısyajtañim jém tusacaneyajwiip icumıy jém cuyujıyaj. ⁸Jeeyucmi itımpiy jém itıyajwiip jém attebet tsam maymayyaj.

⁹Pero it idic jém attebet tum pixiñ inñyi, Ximoj. Icuıyucane jém magia iga inawatwadáypa jém itıwitam. Tsam imigóyáypa jém pixiñtam. Nimpa iga: “Ich tum apixiñ tsam awiap.” ¹⁰Itımpiy jém pixiñtam tsam iwadáypa caso. Icupıcyajpa jém cuyujnewiip y jém dápic cuyujne. Nimyajpa:

—Yıp pixiñ iniit jém Dios ipimi.

¹¹Tsam iwıcupıcyajpa porque dende wiñigam imigóyáypa jém pixiñtam con jém magia. ¹²Pero jesic jém Felipe inimiñ jém wibic añmáñi iga Dios injactooaba yıp naxyucmi y iga wiap taciacput jém Jesucristo inñyimi. Tsam icupıcyaj jém pixiñtam y jém yomtam. Acchınyajta. ¹³Jesic jeetım Ximoj, jém nawatpic idic, icupıctım.

Acchiŋta. Mojum ífúŋy jém Felipe. Agui ipooñanjampa cuando iix jém milagro y jém seña juuts iwatpa jém Felipe.

¹⁴Jesic cuando jém apóstolyaj jém ífyajwiip Jerusalén ijodónayaj iga jém Samariapic p̄ixiñtam ipictsonyaj jém Dios iŋmafi, icutsat jém Peto y Xiwan Samaria. ¹⁵Cuando núcyaj jém Samaria, moj iŋwejpádáy Dios para jém icupicneyajwiip Cristo iga ipictsoñiñ jém Dios iAnama. ¹⁶Porque ni tum de jeeyaj danam ipictsonne jém Dios iAnama. No más acchiñneyajta jém tánQmi Jesús iñiyimi. ¹⁷Jesic jém Peto y Xiwan ichigáy jém p̄ixiñtam icobac con ici. Jempam ipictsonyaj jém Dios iAnama.

¹⁸Jesic jém Ximoj, jém nawatpic idíc, cuando iix iga chiíta jém Dios iAnama cuando jém apóstolyaj ichigáy jém p̄ixiñtam icobac con ici, ¹⁹iñímáy:

—Manyojpa. Achiñtim jexpic p̄imi mex aich iga cuando antsigáypa tum p̄ixiñ icobac con aŋci, jesic ipictsonpañim jém Dios iAnama.

²⁰Jesic jém Peto iñímáy:

—Miwagatogóyiñ con jém iñtumiñ porque iñjspa iga jém Diospic tachiiba wiap iñjuy con tumiñ.

²¹Mich da iniñ derecho iga iŋwatpa jém Dios iyoxacuy ni da miwiap porque da wi jém iñanama jém Dios iwiñjom. ²²Tsaci jém malopic j̄ixi. Aŋwejpaati tanJatuj Dios siiga wiap miwadáy perdón jém iñfánca jém iñjñewiip iñanamanjom.

²³Porque ánix iga tsam iniñ jém cuyóyiooyi iñanamanjom juuts jém chuxñiwi tsampic tam. Jém malopic j̄ixi michenne.

²⁴Jesic jém Ximoj iñímáy jém Peto:

—Aŋwejpáttaami Dios para ich iga odoy tí annascain juuts mich annímáyñe.

²⁵Jesic yaj iŋmat jém Dios iŋmafi jemic, setyaj jém Peto y Xiwan Jerusalén. Nasyajpa wañi jém tiganjoj jém naxyucmi de Samaria. Iŋmatyajpa jém wibic aŋmafi iga Dios taciaputpa.

Jém Felipe ipát jém Etiopíapic p̄ixiñ

²⁶Jesic ocmi Dios icutsat tum siñyucmicic p̄ixiñ. Iñímáy jém Felipe:

—Tsucumi. Nicsim aŋtsapsaumi. P̄ici jém Gaza cutuj, jém tsucumnewiip Jerusalén.

Naspa jém tun jém titsinaxyucmi.

²⁷Jesic jém Felipe tsucum. Nic. Tunjom ipát tum Etiopíapic p̄ixiñ. Capun p̄ixiñ. Miñpic aŋjagooyi jém p̄ixiñ, tesorero. Iccáyáypa jém yompic aŋjagooyi ífumiñ. Jém yomo iñjacpa jém naxyucmi de Etiopía. Iñiyi jém yomo Candace. Jém p̄ixiñ oy Jerusalén iga ijjsa Dios. ²⁸Settim idíc ífcmi, coñ jém icarretajom, s̄ip imay jém libro jém ijaychacnewiip jém Isaías jém wiñicpic profeta. ²⁹Jesic jeeti rato jém Dios iAnama iñímáy jém Felipe:

—Cunuuci jém carreta, waganan̄ici.

³⁰Póyanstucum jém Felipe, cuando icunúc noco, imaton iga s̄ip imay jém libro jém ijayñewiip Isaías. Jesic jém Felipe icwác jém capun p̄ixiñ, iñímáy:

—¿Iñcutiñyíyí tí s̄ip immay?

³¹Jém p̄ixiñ iñímáy:

—¿Jutsap aŋcutiŋyíy siiga da i aŋquejáypa? Miñi tawagacoñi yíp carretajom.

³²Jem juť síp imay jém Dios iŋmaťi nimpa así:

Nanicta jém p̄ixiñ, accaata juuts tum borrego juuts tum mañborrego da aŋwejpa cuando cupoodatap, jesaneťim jém p̄ixiñ datim j̄iypa.

³³Tsam p̄imi yaachwatta, chiiťa castigo, pero da i iciipiŋ. ¿Jém imanictam, i wiap iŋmadáy

porque da jáypa cuyajpa ivida yíp naxyucmi?

³⁴Jesic jém capun p̄ixiñ icwác jém Felipe. Iñímáy:

—¿Anímaayi, ťi nimtooba yíp aŋmaťi? ¿Jém wiñicpic profeta, iŋmatpa de iyaac o iŋmatpa de tungac p̄ixiñ?

³⁵Jesic jém Felipe moj iŋmadáy jém aŋmaťi jém siippic imay. Iŋmadáy jém wibic aŋmaťi de Jesús.

³⁶Iganam waganicyajpa, núcyaj tum lugar juť it ni. Jesic jém capun p̄ixiñ iñímáy jém Felipe:

—Yiim it ni. ¿Que ich da wiap anacchiŋ?

³⁷Jém Felipe iñímáy:

—Siiga iŋcupicpa con itumpiy iñanama, wiap manacchiŋ.

Jesic jém p̄ixiñ iñímáy Felipe:

—Ich aŋcupicpa iga Jesucristo je jém Dios iMañic.

³⁸Ocmi icteñ jém icarreta.

Quetyaj, tigiyay jém niiciim.

Jém Felipe icchiŋ jém aŋjagooyi.

³⁹Cuando putyaj jém niiciim, jém Dios iAnama ininic jém Felipe.

Jém aŋjagooyi da más iix. Mojum niq̄ui, tsam maymay. ⁴⁰Jesic p̄atta

jém Felipe jém attebet Azoto. De jem moj niq̄ui. Iŋmatpa jém wibic aŋmaťi itumpiy jém attebetayaj hasta núc jém attebet Cesarea.

Jém Saulo cuando moj icupic Jesús

(Hch. 22:6-16; 26:12-18)

9 Jesic jém Saulo seguido imalwadáypa jém tánQmi ipixiñtam. Tsam icumecpa iga iccaaba. Jeeyucmi nic iám jém cobacpic panij aŋjagooyi. ²Nic iwác tum toto iga wiap itigiyyaj jém sinagogayaj jém ityajwiip jém attebet Damasco iga icuámpa jém icupicneyajwiip Cristo, jém p̄ixiñtam y yomtam iga imatspa y ininicpa Jerusalén. ³Iganam niq̄ui jém Saulo tunjom, cuando núctooba jém attebet Damasco, iix tum justic tsam p̄imi tsoepa siŋyucmi. ⁴Jesic jém Saulo actiŋ naxyucmi. Imaton tum j̄iyi. Nímayťap:

—Saulo, Saulo, ¿ťiiga anacpoypa?

⁵Jesic jém Saulo icwác. Nimpa:

—¿Mijapaap, mánQmi?

Jém j̄iyi icutsoŋ. Nimpa:

—Ich aJesús jém michpic siip anacpoy. Iñyaactim siip inimalwadayťa. Mijex juuts jém yunta jém iñeppápic jém ichenóycuy iŋquĩni.

⁶Jém Saulo tsam p̄imi cuetsáypa porque agui ciŋne. Nimpa:

—¿MánQmi, ťi iñxunpa iga aŋwatpa?

Jesic tánQmi iñímáy:

—Tsucumim, nići yíp attebet Damasco. Jemum miñímayťap ťi wiap iŋwat.

⁷Jém p̄ixiñtam, jém iwagananicpápic jém Saulo, tsam p̄imi ciŋ porque imaton jém j̄iyi,

pero da i iix. ⁸Ocmi tsucum jém Saulo juř actiņne idíc naxyucmi. Tojne jém iixcuy, pero da ixixóypa. Matsayta ici, jicteñfa. Nanicta jém attebet Damasco. ⁹Jemum tucunajama da ixixóypa. Da wíc ni da níc.

¹⁰Íf idíc Damasco tum pixiñ iñiyi Ananías, icupicnefím Cristo. Iwiñquejáy tánQmi juuts tum poñ. Iñímáy:

—iAnanías!

Jesic jém pixiñ iñímáy:

—Yiim aít, mánQmi.

¹¹Jesic iñímáy jém tánQmi:

—Tsucumi. Nici jém calle iñiyi Numa, hasta jém Judas ificciim. Acwaaci tum pixiñ de Tarso iñiyi Saulo, sıp iņwejpát Dios. ¹²Jém Saulo iixtım tum poñ. Iix iga miñpa tum pixiñ iñiyi Ananías, tiğypa jém ticjom, iccámpa ici jém Saulo icobacyucmi iga eybicțım ixixóyiñ.

¹³Jesic imatorj jém Ananías, iñímáy jém tánQmi:

—MánQmi, tsam jáyan pixiñtam aņmadayñe ti iwat yıp pixiñ iga tsam imalwadáy jém impixiñtam jém micupicneyajwiř jém attebet Jerusalén. ¹⁴Siř núcneum yiim con jeefim orde jém ichiñewiř jém cobacpic panij iga imatspa itumpiy jém iņwejpátpáppic Dios mich iñiyimi.

¹⁵Jesic jém tánQmi iñímáy jém Ananías:

—Siř nicsim. Ich aņcupiņ yıp pixiñ iga iņmadáyıñ ich anañquímayooyi jém tungacpic pixiñtam, jém tungac naxyucmi ireyyaj y jém Israelpic pixiñtam iwiñjom. ¹⁶Ich anañquejáypa iga tsam pimi yaachwattap yıp pixiñ ich aņcuyucmi.

¹⁷Ocmi jém Ananías nic jém ticciim juř if jém Saulo. Tigiy, iccám ici icobacyucmi. Iñímáy:

—Mantiwi Saulo, jém tánQmi Jesús miwiñquejáy iganam mimiñpa tunjom. Siř acutsat iga wiř iñixixóy eybic y iga tsam iniidiñ jém Dios iAnama.

¹⁸Jeefi rato actiņ iixcuyucmi juuts tiipi iñaca, wiřwum miixixóy eybic. Jesic ocmi tsucum jém Saulo, acchiřta. ¹⁹Ocmi wícum, eybic ipictsoņ ipimi. Tsáy juna jama con jém icupicneyajwiř Cristo jém attebet Damasco.

Jém Saulo iņmatpa jém wibic aņmafi Damasco

²⁰Ocmi moj iņmat jém wibic aņmafi jém sinagoga. Iņmadáy jém pixiñtam iga Jesús je jém Dios iManic. ²¹Itumpiy jém imatorjajpáppic tsam ipooñañjamyaj. Niimyajpa: —¿Que da yiptim pixiñ jem ic Jerusalén tsam icpoy jém iņwejpátpáppic Dios jém Jesús iñiyimi? ¿Que da yiptim pixiñ sıp miñne yiim iga imatspa jém pixiñtam y ininicpa jém panij aņjagooyiciim?

²²Pero jém Saulo más pimi iņmatpa jém Dios iņmafi. Je da cıřpa. Iņquejáypa iga Jesús je jém Cristo hasta imiswadáy ijixi jém judíos jém ityajwiř Damasco.

Ciřput Saulo jém attebet Damasco

²³Cuando wařña jama if jém Saulo, jém judíos iwatyaj acuerdo iga iccaayajpa. ²⁴Pero ocmi jém Saulo ijodóna iga tsuucim y siřni jém ienemigo inteñne jém puerta aņnaca

iga iccaaba cuando putpa jém attebet. ²⁵Pero jém icupicneyajwiip Cristo icotyaj jém Saulo tum mijpic coonjom. Ijímquetay tsuucim jém taani iweñañ. Jempam ciiput.

Jém Saulo nic Jerusalén

²⁶Quando núc jém Saulo jém Jerusalén, tigiytooba idic juí aņtuumaneyaj jém icupicneyajwiip Cristo. Pero itumpiy jém pixiñtam tsam icinyajpa. Da icupicpa iga jém Saulo numa icupicneum jém Cristo. ²⁷Pero jém Bernabé iwagananic jém Saulo. Nic icwiñquej jém apóstolyaj iwijnjom y inmadáypa jutsa miix jém Saulo jém tánQmi tunjom y jutsa mijyáy. Inmadáypatim iga jém Saulo da cñpa inmat jém Damasco jém Jesús iniyimi. ²⁸Jesic jemum tsíy Jerusalén jém Saulo. Mojum iwaganasiyay jeeyaj. ²⁹Seguido inmatpa jém Dios inmatí jém tánQmi iniyimi. Da cñpa. Anmatmatneyajpa, añayajpa con jém Israelpic pixiñtam jém iyyajpáppic jém griego anmatí. Pero jeeyaj tsam iccaayajtooba jém Saulo. ³⁰Quando ijodónayaj jém tantiwitam, nanicta Saulo jém attebet Cesarea y de jem cutsatta hasta íicmi jém attebet Tarso.

³¹Jesic da i imoogíypa jém Dios ipixiñtam icuwíti jém naxyucmi de Judea y de Galilea y de Samaria. Jesic más iwicutiyyiyajpa Dios inmatí jém icupicneyajwiip Cristo. Tsam iwíwatyajpa porque tsam icñpa tánQmi. Dios iAnama iyoxpátpa iga tsam jáyanap jém Dios ipixiñtam.

Acpista jém Eneas

³²Jesic jém Peto nicpa ijooyáy jém tantiwitam yim jeexic. Nicíim

ijooyáy jém icupicneyajwiip Cristo jém attebet Lida. ³³Jemum ipát tum pixiñ iniyi Eneas. Ocho amfiy mimne icheesmi. Tusacane icumij. ³⁴Jesic jém Peto inímáy:

—Eneas, Jesucristo micpispá. Tsucumi. Piñi jém immoncuy.

Jesic jeetí rato tsucum jém Eneas.

³⁵Jesic itumpiy jém pixiñtam jém ityajwiip jém attebet Lida y Sarón iixyay iga pisneum. Ichacyaj jém wiñcpic anquímayooyi, moj icupicyaj jém tánQmi.

Acpista jém Dorcas

³⁶Jeetim tiempo it idic jém attebet Jope tum yomo icupicneím Cristo. Iniyi Tabita. Jém anmatimi griego nimtooba Dorcas. Yíp yomo tsam iwíwatpa, iyoxpátpa jém yaachayajpáppic. ³⁷Jesic jeetim tiempo mimneactin jém yomo, ocmi ca. Jesic acchínayta jém imíytay. Nanicta tum cuarto jém tunjac pisoyucmi. ³⁸Jém attebet Jope da juumi de jém attebet Lida. Cuando imatonayaj iga it jém Peto jém attebet Lida, jém icupicneyajwiip Cristo icutsatyaj wísten pixiñ iga niguiñ inwejay jém Peto. Inímáy:

—Jicsciy nici jém Jope.

³⁹Jesic nic jém Peto con jém miñneyajwiip inwejay. Cuando núc jém Jope, nanicta jém cuarto juí it jém tsúts jém yucmipic piso. Itumpiy jém cunoytam intuumacaneyaj. Tsam weyjajpa. Inquejyayajpa jém Peto jém wibic tecxi y yooí jém inúnwiip jém Dorcas cuando vivonam. ⁴⁰Jesic Peto inímáy iga puđin itumpiy jém ityajwiip cuartojom. Costeñneactin,

moj inwejpát Dios. Iámseedáy jém yomo jém caanewiip, inímáy:

—Tabita, tsucumi.

Jesic jém yomo icto j iixcuy.

Cuando iix jém Peto, coñchucum.

⁴¹Jém Peto imatsáy ici, ijicstucum.

Inwejáy jém tantiwitam y jém

cunoytam. Inquejáy iga pisneum.

⁴²Icuwíti jém atebet Jope

imatoŋyaj tí inasca jém yomo. Tsam

jáyaj icupicyaj jém tánQmi. ⁴³Tsíy

jém Peto jém atebet Jope wafña

jama tum pxiñ iticciim. Iníy

Ximój jém pxiñ, icinpáppic cuero.

Jém Peto y Cornelio

10 Ít idic jém atebet Cesarea tum pxiñ iníy Cornelio. Capitán idic, injacpa tum batallón, jém grupo iníy jém Italiano. ²Yíp pxiñ ijísyajpa Dios con itumpiy jém ichixtam y itiwitam. Icinjaypa Dios. Ichiiba tumiñ jém yaachayajpáppic iga iyoxpátpa. Siempre inwejpátpa Dios. ³Tum jama como las tres de la tarde iix tum poñ. Inuntawix iga tigiy hasta juí it jém Cornelio tum sinyucmipic pxiñ jém icutsatnewiip Dios. Inímáy:

—iCornelio!

⁴Jém Cornelio agui iámpa jém sinyucmipic pxiñ, tsam pimi cinne.

Jesic icwác. Nimpa:

—¿Tí, mánQmi?

Jesic jém sinyucmipic pxiñ inímáy:

—Dios mimatoŋayneum jém inoración. Ijodon iga agui inyoxpátpa jém yaachayajpáppic y Dios tsam iwianjam. ⁵Siip cutsati algunos pxiñtam jém atebet Jope iga inwejáypa tum pxiñ iníy Ximój, iníyitím Peto. ⁶Yíp pxiñ

ít jém tungac Ximój iticciim jém icinpáppic cuero. Ít jém lamar aŋnaca. Jém pxiñ miŋmadáypa tí wiap inwat.

⁷Jesic nic jém sinyucmipic pxiñ jém inimiñnewiip jém aŋmati.

Jém Cornelio inwejáy wisten jém imozo y tum soldado. Jém soldado siempre iwatpa juuts piimiŋfap.

Ijispátim Dios. ⁸Jesic jém Cornelio inmadáy itumpiy tí iix y tí inímáy jém sinyucmipic pxiñ. Ocmi icutsat jém atebet Jope.

⁹Jesic icuquejama nic imétsyaj jém Peto. Iganam niqiyaj tunjom cuando núctoobam nocojom jém atebet Jope, jesic jeeti rato quim jém Peto jém yucmipic piso iga inwejpátpa Dios. Cugapjama.

¹⁰Pimi yuane jém Peto, agui wíctooba, pero iganam síp iwadayta iwiccuy, iix tum poñ. ¹¹lix iga aŋáy jém siŋ. Juuts tum mijpic manta jimquetta hasta naxyucmi, tsénayñeta icucuatro ifatsic. ¹²Ítyaj jém mantajom itumpiy jém animat yíp naxyucmipic, jém cuatropic ipuy, jém tsañyaj y jém jonyaj.

¹³Ocmi imatoŋ tum jiyi. Nímayta: —Peto, tsucumi, accai, cuuti.

¹⁴Pero jém Peto icutson. Nimpa: —MánQmi, da queman oypa aŋcút jém dapic wi taŋcút, ni jém nímajpáppic iga tactañcaíypa.

¹⁵Eybictim jíyayta. Nímayta: —Jém Diospic iwítsac iga wi taŋcút, da i wiap inim iga tactañcaíypa.

¹⁶Jempigam inasca tucciy. Ocmi eybictim quim jém manta sinyucmi.

¹⁷Iganam ámanjac jém Peto iga iix jém poñ, núcyaj jém tiganaca jém pxiñtam jém icutsatnewiip jém

Cornelio. Acwágooyajpa jém Ximoj íficcíim. ¹⁸ Cuando núcyaj íficcíim, pimi jiy. Icwácyaj siiga jemum íf jém Ximoj iníyííim Peto. ¹⁹ Iganam Peto síp ijis tí nimtooba jém poñ, Dios iAnama iníímáy:

—Aami, síp miméts tucuten pìxiñ. ²⁰ Tsucumi, queti jém yucmìpic piso, nicsim con jeeyaj. Odoy cìjì porque ich mañcutsadayñe.

²¹ Jesic quet jém Peto, nic íam jém tucuten pìxiñ jém icutsatnewiip jém Cornelio. Iníímáy:

—Icham jém ammétstampáppic. ¿Tíiga mimiñta yíim?

²² Jesic iníímáy jém pìxiñtam:

—Amiñta porque acutsatta jém capitán Cornelio. Je tum wibic pìxiñ, tsam iwatpa juuts ixunpa Dios. Ítumpiy jém Israelpic pìxiñtam tsam iwianjamyaj, tsam ífoyyajpa jém capitán. Da más pecam oy iwiñquejáy tum siñyucmìpic pìxiñ jém icutsatnewiip Dios. Nimpa jém siñyucmìpic pìxiñ iga miñwejayíñ íficcíim iga imatorpa jém capitán mich iníimáti. ²³ Jesic jém Peto iníímáy jém pìxiñtam:

—Tigiyi.

Jemum tsíyyaj jém tsuu con jém Peto. Icuquejama waganicyajpa jém Peto con jeeyaj. Iwagananicyajpatim algunos jém tantiwitam jém ífyajwiip jém atebet Jope. ²⁴ Jesic jém tunzagam más jama, núcyaj jém atebet Cesarea. Jemum injócneyaj jém Cornelio con algunos ífiwítam y con jém más wibic iamigoyaj jém inwejayñewiip. ²⁵ Cuando núc jém Peto jém Cornelio íficcíim, put jém Cornelio, miñ iwípicsonj.

Costeñactij jém Peto iwiñjom iga inwejpáttooba. ²⁶ Pero jém Peto ijíctsucum. Iníímáy:

—Teñchucumi. Ich apìxiñtim juuts mimich.

²⁷ Iganam siip inmatyaj, tigiyay jém Cornelio ífíctjom. Jém Peto ipát tsam jáyay pìxiñtam antuumaneyaj. ²⁸ Jesic Peto iníímáy:

—Michfam injódonj iga jém judíos inquímayooyi da ijícpa iga antuumap jém judíos con jém tunḡac pìxiñtam ni dátim ijícpa iga tigiyapa jém tunḡac pìxiñ ífíctjom. Pero Dios anquejayñe iga da wí iga tanjispá iga tum pìxiñ tactañcawatpa, da wí iga tanjispá iga tum pìxiñ da jex juuts taich. ²⁹ Jeeyucmì cuando mich anañwejay, amiñ. Da tí anjìy. Siip manacwácpa, ¿tíiga anañwejay?

³⁰ Jesic jém Cornelio iníímáy:

—Iniiítum cuatro día como yíptim hora aít anticíim. Anwatne ayuno. Anañwejpátpa Dios juuts siempre anwatpa cada cutsuuyaji. Jesic awiñquejáy tum pìxiñ tsam tsocpa ipuctucu. ³¹ Jém pìxiñ anímáy:

“MiCornelio, Dios mimatónjayñeum jém íñoración. Ijispá iga tsam inyoxpátpa jém yaachayajpáppic.”

³² Anímáyíim: “Cutsati algunos jém impìxiñtam hasta jém atebet Jope iga inimíniñ jém Ximoj iníyííim Peto. Jém pìxiñ íf jém tunḡac Ximoj íficcíim jém icinpáppic cuero jém ítwiip lamar añḡaca. Cuando núcpa, miñmadáypa tí wíap inwat.” ³³ Jeeyucmì jeetí rato ancutsat jém ampìxiñtam iga niḡuiñ miméts. Agui wí iga mimiñ. Siip tantumpiyítam taiíta yíim Dios iwiñjom. Tsam ammatonjamtooba

ítumpiy cosa juuts miñímáy jém tánOmi.

**Najíyóypa jém Peto jém
Cornelio ificciim**

³⁴Jesic jém Peto moj jiyi. Nimpa: —Numa siip tanJatun Dios da injeaixpa ni tum pixiñ. Itumpiy iixpa jextim. ³⁵Pero Dios iwipictsonpa itumpiy jém pixiñtam icuwiti yip naxyucmi siiga icinpa Dios y iwawatpa. ³⁶Dios icutsaday jém wibic anmati jém Israelpic pixiñtam. Inímáy iga tawipictsonpa tanJatun Dios porque tawiwadáy jém Jesucristo. Je tantumpiytam tánOmi. ³⁷Michtam inwijodon ti nasne jém naxyucmi de Judea. Jemigam tsucum jém Galilea cuando najíyóypa y acchíyóypa jém Xiwan. ³⁸Injodonjim iga ocmi Dios ichi jém Jesús de Nazaret jém Dios iAnama ipimi. Injodonjim iga jut quej nicpa jém Jesús, iwíwadáypa jém pixiñtam, icpisa itumpiy jém iyaachwatayjappic jém Wocciwiñ. Jém tanJatun Dios iwaganait, jeeyucmi wiap iwat jempic. ³⁹Aichtam atsíyta juuts testigo. Anixñeta itumpiy cosa juuts iwat jém atebet Jerusalén y icuwiti jém judíos inaxyucmi. Ocmi jeeyaj iccaayaj, cunúnta cunusyucmi. ⁴⁰Pero Dios icpis jém tucunajama y awiñquejayta aichtam. ⁴¹Da iwiñquejay itumpiy pixiñtam. No más awiñquejay aichtam jém acupinnetawiiip dende wiñti jém tanJatun Dios iga atsíyta juuts testigo. Awagawicta, awaganicta con je cuando pisneum de jut íf jém caaneyajwiip. ⁴²Acutsatta iga

ananmadayfamiñ jém pixiñtam y anaquejayfamiñ iga Dios iccam yiptim Jesús iga juez iga iciiinpa jém vivopic y jém caaneyajwippic. ⁴³Dende wiñgam itumpiy jém Dios inmatciwiñ inmatyajtím iga miñpa jém Jesús. Nimyajpa iga jém icupicpaap jém Jesús, wadaytap perdón jém itañca jém Jesús inñiyimi.

**Ipictonpatim Dios iAnama
jém dapic je de Israel**

⁴⁴Iganam sip inmat jém Peto, núc jém Dios iAnama. Ipictonyay itumpiy jém imatonneyajwiip jém Peto inmati. ⁴⁵Tsam ipooñanjamyajpa jém Israelpic pixiñtam jém miñneyajwiip con Peto, jém icupicnewiiip Cristo, cuando iix iga chiifitim jém Dios iAnama jém tungac pixiñtam jém dapic je de Israel. ⁴⁶Porque imatonayaj iga jiyajpa jém tungac pixiñtam inmatimi. Tsam icujípyajpa Dios. ⁴⁷Jesic Peto inímáy:

—¿I wiap inim iga da wiap tanacchin yip pixiñtam? Porque ipictonneum Dios iAnama juustim taichtam.

⁴⁸Jesic Peto ipiimiy iga acchinayajtañ jém pixiñtam jém Jesucristo inñiyimi. Ocmi cunucsayta jém Peto iga tsíyñ juna jama con jeeyaj.

**Jém Peto inmadáypa jém ifyajwiip
Jerusalén ti inasca jém atebet Jope**

11 Jesic jém apóstolyaj con jém tantiwitam, jém ifyajwiip Judea, ijodonayaj iga jém tungac pixiñtam, jém dapic je

de Israel, ipictsonyajtım jém Dios inımafi. ² Cuando set Jerusalén jém Peto, agui icujiyyaj jém Israelpic pixiñtam jém icupicneyajwiip Jesús. ³ Nimyaj:

—¿Tiiga oy injooyáy jém tungac pixiñtam jém ďapic je de Israel? ¿Tiiga miwagawícpa con jeeyaj?

⁴ Jesic jém Peto moj inımadáy fıtam inasca dende wiñti. Inımáy:

⁵—Ich aif idic jém attebet Jope. Iganam sıp anajwejpát Dios, ánix tım poñ. Ánix juuts tım mijpic manta tsénayñeta icucuatro ifatsic, jımquetta dende sınyucmi hasta jut aif. ⁶ Cuando aıwıám fı if jém mantajom, ánix yıp naxyucmipic anımat jém cuatropic ipuj, jém jimñi anımat, ifıtım jém tsañ, jém pachi y jém jonyaj. ⁷ Jesic ammaton tım jıyi. Anımayta: “Peto, tsucumi, accai, cuuti.” ⁸ Pero annımáy: “MánOmı, ich da queman aıcút jém ďapic wı taıcút jém tactañcaıypáppic.” ⁹ Jesic eybic ajıyáy jém sınyucmipic jıyi. Anımáy: “Jém Diospic iwıtsac, da wıap tannım iga da wı taıcút.” ¹⁰ Annasca tuccıy. Ocmı eybic jımquımta sınyucmi.

¹¹ Jeefı rato núcyaj tucuten pıxiñ jém ticciım jut aif idic. Tım Cesareapic pıxiñ icutsat iga miñ améts. ¹² Jém Dios iAnama anımáy iga anıguıñ con jeeyaj y iga odoy aciññiñ. Aıwagananictatım yıp seis tantıwıtam. Antımpıyıtam atıgyıta jém pıxiñ ifıcjom, tım capitán. ¹³ Aımadáy jutsa miix ifıccıım tım sınyucmipic pıxiñ. Miñ inımadáy jém capitán. Inımáy: “Cutsatı algunos pıxiñtam jém attebet Jope iga inimñiñ jém

Ximoj inıyıtım Peto. ¹⁴ Je miñpa inımadáy jutsap inııput y jutsap iciıputyaj ifımpıy jém ifıyajwiip inııccıım.” ¹⁵ Cuando moj anajmat jém Dios inımafi, ipictsonyaj jém Dios iAnama juutsım taichfam matampıctson wiñti. ¹⁶ Jesic anjıs fı tanımáy jém tánOmı. Nımpa: “Jém Xiwan acchıńóypa con ni, pero mimichtam impıctsonıtampa Dios iAnama.” ¹⁷ Siiga Dios ichi jém tungac pixiñtam jém Dios iAnama juuts tachıiñeta taichfam, jém taıcupıcnıwıip Jesucristo, ¿jesic ich aıapaap iga anıcpa contra jém tanJatıı Dios?

¹⁸ Jesic cuando imatonıyaj jém tantıwıtam, jém ifıyajwiip Jerusalén, da jıyyaj. Moj icujıpyaj Dios. Nimyaj:

—Jém tanJatıı Dios ichııtım lugar jém tungac pıxiñtam jém ďapic je de Israel iga icucacyajpa ijıxi iga iniıtıpatım jém vida jém ďapic cuyajpa.

Jém Dios ipıxiñtam jém attebet Antioquía

¹⁹ Cuando accaata jém Esteban, jeefım jama moj icpoyajta los demás jém icupicneyajwiip Cristo. Cupóyayyaj. Algunos nıcyaj hasta jém attebet Fenicia, Chipre y Antioquía. Jemıgam inımadayyaj jém wıbic aımafi jém Israelpic pıxiñtam. Pero da inımadáy jém tungac pıxiñtam jém ďapic je de Israel. ²⁰ Pero algunos jém tantıwıtam jém ifıyajwiip jém attebet Chipre y Cirene nıcyaj jém attebet Antioquía. Inımadayyaj jém tungac pıxiñtam jém ďapic je de Israel iga wıap iciıacputyaj jém

tánOmi Jesús. ²¹Jém tantiwitam tsam iniif jém tánOmi ipimi. Tsam jáyaŋ jém pxiñtam ichacyaj jém wiñicpic anquímayooyi. Moj icupicyaj jém tánOmi Jesús.

²²Cuando ijodónayaj jém Dios ipixiñtam, jém ityajwiip Jerusalén, icutsat jém Bernabé iga nguñ Antioquía. ²³Cuando núc jém Bernabé, iix iga Dios agui iwíwadayne jém pxiñtam. Jesic agui maymay jém Bernabé. Moj inquímuyaj itumpiy jém pxiñtam iga iwícupiguñ y odoŋ ichaguñ jém tánOmi inmadayooyi. ²⁴Porque jém Bernabé tum wibic pxiñ, tsam iniif jém Dios iAnama. Tsam iwícupicpa iga Dios wiap. Jeeyucmi jáyaŋ pxiñtam tigiyñeyaj iga icupicyajpa jém tánOmi Jesús. ²⁵Ocmi jém Bernabé nic jém atebet Tarso. Nic iméts jém Saulo. Cuando ipát, ininic Antioquía. ²⁶Jáy itiyaj jemum con jém Dios ipixiñtam. Oy iti tum amtiy. Inquejáy jáyaŋ pxiñtam jém Dios inmañi. Yíptim Antioquía moj iccámayajta inñiyi iga cristiano jém icupicneyajwiip Cristo.

²⁷Jeetim tiempo algunos jém profeta, jém ityajwiip Jerusalén, nic Antioquía. ²⁸Tum de jeeyaj, inñiyi Agabo, teñchucum jut antuumaneyaj jém tantiwitam. Dios iAnama icjodóna ti miñpa. Nimpa iga miñpa tum mijpic yuu icuwíti de yíp naxyucmi. Ocmi nupa cupac juuts nim, jém tiempo cuando injacpa jém Romapic anjagooyi Claudio. ²⁹Jesic ocmi jém icupicneyajwiip Cristo, jém Antioquiapic pxiñtam, moj ijisyaj iga icutsadayajpa tum yoxpádooyi jém tantiwitam jém ityajwiip Judea.

Ichiiyajpa cada tumtum jutsaŋ wiayajpa. ³⁰Jempigam iwatyaj. Cutsadayfa jém yoxpádooyi jém Dios ipixiñtam injagooyiyaj. Oy ichac jém Bernabé y Saulo.

Accaata Jacobo y paja jém Peto

12 Jeetim tiempo moj icpoy jém rey Herodes algunos jém Dios ipixiñtam. ²Accaata con espada jém Jacobo jém Xiwan itíwi. ³Cuando jém Herodes iix iga agui iwianjam jém Israelpic pxiñtam, jesic ipimíyitim iga matstaiñ mex jém Peto. Inasca jempic cuando wattaŋ jém siŋ iga cúttap jém caxtánañi sin levadura. ⁴Cuando matsta jém Peto, nanicta cárcel. Jém cárcel tsam wí watnetá cuenta con cuatro grupo de soldado. Cada grupo ityaj cuatro soldado. Jém Herodes ijispa idic iga itoppa jém Peto cuando cuyajneum jém siŋ iga iciipijpa jém pxiñtam iwiñjom. ⁵Jeeyucmi tsíy Peto jém cárcel, tsam wíwatnetá cuenta. Pero jém Dios ipixiñtam tsam pimi inwejpádáypa Dios para je.

Dios itop jém Peto jém cárcel

⁶Ocmi cuando núc jém tiempo iga jém Herodes ijispa iga itoppa jém Peto, jeetim tsuu monpa Peto cucmi de wisten soldado. Tsenne con wisten cadena. Algunos jém soldado iwatne cuenta jém cárcel ipuerta. ⁷Jeetí rato iwiñquejáy jém Peto tum siŋyucmipic pxiñ jém Diospic icutsatne. Jém cárcel ijojmi cutsoctic juuts tum jucti. Jesic jém siŋyucmipic pxiñ ichigáy jém Peto ipócpac. Ichicyus. Inñímáy:
—Jicsciy tsucumi.

Jesic wij jém cadena jém Peto iciiyucmi, cutiḡ naxyucmi. ⁸ Jém siḡyucmipic p̄ixiñ iñímáy:

—Tsencaami jém iñcinturón immijpacyucmi. Coḡi iḡciac.

Cuando yaj iwat jempic, iñímáy jém siḡyucmipic p̄ixiñ:

—Coḡi iñyoofí. Atúḡiḡi.

⁹ Jesic put jém Peto, mojum itúḡy jém siḡyucmipic p̄ixiñ. Pero da icutiḡy siiga numa tí iwatpa jém siḡyucmipic p̄ixiñ. Je iḡispa no más iga imawíñ. ¹⁰ Pero nasyaj juḡ iḡteñe jém wiñtipic soldado y jém ocmipic soldado. Cuando núcyaj juḡ it jém tḡcuy puerta jém calle aḡnaça, aḡy iyaac jém puerta. Putyaj, widaḡnasyaj tum calle, jeefi rato nic jém siḡyucmipic p̄ixiñ. Tsíy icutum jém Peto. ¹¹ Jesigam jém Peto icutiḡy iga numa. Niḡpa:

—Siḡ aḡcutiḡy iga numa jém tánQmi icutsat tum siḡyucmipic p̄ixiñ iga aciacputpa jém Herodes iciḡom con jém Israelpic p̄ixiñtam iciḡom jém amalwadayp̄appic idic.

¹² Iganam síp iḡis jém Peto tí iñasca, nic jém Malía íficciim. Jém yomo jém Xiwan iapa iñiyítim Marco. Jem tsam jáyaḡ p̄ixiñtam aḡtuumaneyaj. Síp iwatyaj oración. ¹³ Cuando jém Peto ífics jém puerta, miñ iḡtson tum woñi iñiyi Rode.

¹⁴ Imatónactiḡy iga Peto iḡiyi. Pero jém woñi da iḡy jém tic. Tsam maymay, póyaḡsucum, nic jojmi iga iḡmadáy jém aḡtuumaneyajwiḡp iga núcneum jém Peto jém puerta aḡnaça. ¹⁵ Pero jeeyaj iñímáy jém woñi:

—Mich miloco.

Pero jém woñi niḡpa:

—iNuma, da je migooyi!

Jesic niḡyajpa jém p̄ixiñtam: —¿Que da je Petoḡim ianama?

¹⁶ Seguido íficspa puerta jém Peto. Cuando iḡy jém puerta jém p̄ixiñtam, iixyaj jém Peto, tsam p̄imi ámanjacyaj. ¹⁷ Pero jém Peto iwat seña con ici iga odoy jiyyajíñ. Moj iḡmadáy jutsa miḡop tánQmi jém cárcel. Iñímáy jém p̄ixiñtam: —Aḡmadaytaami jém Jacobo y los demás jém tantiwitam.

Ocmi put jém Peto, nic tuḡgac lugar.

¹⁸ Icuquejama p̄imi cuḡiñayñeyaj jém soldadoyaj porque da iḡodon tí iñasca jém Peto. ¹⁹ Jém Herodes icutsat jém soldado iga inimíñiñ jém Peto, pero da ipát. Jesic jém Herodes iḡwejay jém soldado jém iwatneyajwiḡp cuenta jém cárcel. Iciḡipḡ. Ocmi ip̄imáy iga accaayajtañ itumpiy de jeeyaj. Jesic put jém Herodes jém naxyucmi de Judea, nic íti jém atbet de Cesarea.

Ca jém Herodes

²⁰ Jesic jém Herodes tsam p̄imi iḡyoxpa jém p̄ixiñtam jém ityajwiḡp jém atbet de Tiro y Sidón. Pero jém p̄ixiñtam iwatyaj acuerdo con jém Blasto, tum miḡpic̄tim anjagooyi, icuyoxap jém rey Herodes. Iyojyaj jém Blasto iga iyoxpáñ. Iacunucsay iga odoy imoogiyyajíñ jém rey porque jém p̄ixiñtam ip̄iça iwiccuy jém rey Herodes iñaxyucmi. ²¹ Jém Herodes iḡwejay jém p̄ixiñtam. Iñímáy júp jama miñyajíñ. Jesic jém jama icot jém rey ipuctucu. Nic coñi jém icõñcuyucmi juḡ ciḡp̄iḡyopa. Moj najíyooyi. ²² Jesic jém p̄ixiñtam,

jém inwejayñeyajwiip, tsam pimi jyyajpa, tsam icujípyajpa jém Herodes. Nimyaj:

—Yiimpic jýpa dá je pxiñ, tum dios.

²³Jeefi rato tanJatuj Dios icutsat tum siñyucmipic pxiñ iga icmimneñ jém Herodes porque dá icujípa Dios. Más iwianjam iga cujíptaiñ iyaac. Jempigam ca. Jém tsuuquiñ icútyaj.

²⁴Pero jém tánQmi inquímayooyi más jáyanap. Anmattap jutinquej jém anmafi.

²⁵Jesic jém Bernabé y Saulo cuando cuyaj jém iyoxacuy, putyaj Jerusalén. Setyaj iticmi. Iwagananicajpa jém Xiwan iniyitim Marco.

**Jém Bernabé y Saulo mojpa
iwat jém yoxacuy iga ininicipa
Dios inmafi juumi**

13 Jesic jemigam jut antuumayajpa jém Dios ipixiñtam, jém atebet Antioquia, ityaj jém Dios inmatciwiñ y jém wibic maestroyaj. Ityaj jém Bernabé; jém Ximoy iniyitim Niger; jém Lucio, jém Cirenepic pxiñ; jém Manaén, icuyoxap idic jém Herodes jém gobernador de Galilea; itim jém Saulo. ²Tum jama cuando antuumaneyaj jém pxiñtam iga ijspa jém tánQmi y iwatyajpa ayuno, Dios iAnama inímáy jém pxiñtam:

—Tsaci aparte yip Bernabé y Saulo jém ancupinewiip iga acuyoxap.

³Iwatyaj ayuno jém Dios ipixiñtam, inwejpáyaj Dios, iccámayyaj ici jém Bernabé y Saulo icobacyucmi. Jesic nanquímajta.

**Jém apóstolyaj inmatyajpa jém
Dios inmafi jém atebet Chipre**

⁴Jesic Dios iAnama icutsat jém Bernabé y Saulo. Nicyaj jém atebet Seleucia. Jemum tigiyaj barcojom iga nicpa jém isla de Chipre.

⁵Cuando núc jém atebet Salamina, moj inmat jém Dios inmafi jém judíos imasticjom, jém sinagoga. Iwagananicajtim jém Xiwan iga iyoxpátpa. ⁶Inmatyaj yim jeexic icuwiti jém isla de Chipre. Núcayaj jém atebet Pafos. Jemum ipát tum nawat iniyi Barjesús. Nimpa iga tum Israelpic inmatciwiñ, pero je tum migoypaap. ⁷Jém nawat it idic con jém gobernador Sergio Paulo. Yip anjagooyi tsam jixiíy. Inwejay jém Bernabé y Saulo porque agui imatontooba jém Dios inmafi. ⁸Pero jém nawat, iniyitim Elimas, nicpa en contra de jém Bernabé y Saulo. Dá ichiitooba lugar jém gobernador iga icupiguñ Cristo. ⁹Jesic jém Saulo, iniyitim Pablo, tsam iniit jém Dios iAnama. Iwíammats jém nawat. ¹⁰Inímáy:

—Mimigoypaap, tsam malopic mipixiñ, Wocciwiñ mimanic. Mich tsam mienemigo de itumpiy jém wítampic cosa. Agui inwótpa jém tánQmi inquímayooyi jém numapic. ¹¹Siip jém tánQmi michiiba castigo. Siip micáchtiap. Juna jama dá wiap inix jém jama ichoca.

Jesic jeefi rato imats juuts tum oma jém iixcuy, cupiicha. Mojpa iméts i wiap ijictēñ. ¹²Cuando jém gobernador iix ti inasca jém pxiñ, icupic Cristo. Agui ipooñanjampa cuando imaton jém tánQmi inquímayooyi.

**Jém Pablo y Bernabé nicyaj
jém tungac Antioquía jém
atbet de Pisidia**

¹³Ocmi jém Pablo con icompañeroyaj tigiy barcojom, putyaj jém atbet Pafos. Nicyaj jém atbet Perge jém naxyucmi de Panfilia. Pero jém Xiwan ichaganput iga iwaganasiiba jeeyaj, set Jerusalén. ¹⁴Ocmi nasyaj jém atbet Perge, núcyaj jém tungac Antioquía jém itwiip jém naxyucmi de Pisidia. Jemum tum jevcuy jama tigiyaj jém sinagoga, coñyaj. ¹⁵Jém sinagoga injagooyiyaj imayyaj jém Dios injmati, jém Moisés injquimayooyi y jém ijaychacnewiip jém wiñicpic aňmatciwiñ. Cuando yaj imayyaj, jesic jém anjagooyiyaj icutsadáy aňmati jém Pablo. Nímayta:

—Mantiwitam, siiga iniit ti iññimaytooba ypyaj pixiñtam iga iniñquimpa, siibam wiap iniñmadáy.

¹⁶Jesic jém Pablo teñchucum. Iwat tum seña con ici iga odoy i jýyiñ, moj injmadáy:

—MiIsraelpic mipixiñtam y mimichítam injcñtampáppic tanJatun Dios, matonntaami. ¹⁷TanJatun Dios, jém Israelpic pixiñtam iDios, icupiñ jém wiñicpic tanjatunwewetam. Tsam icjáyanayaj jém tanwewetam cuando oy itiyaj jém naxyucmi Egipto juuts juumipic pixiñtam. Ocmi itop jém naxyucmi de Egipto con ipimi. ¹⁸Dios iyaachý iga tsam imalwatyajpa jeeyaj cuando jáy itiyaj cuarenta amfiy jém titsinaxyucmi. ¹⁹Ocmi Dios ictogoy

siete nación jém ityajwiip jém naxyucmi de Canaán iga chiitap jém nas jém tanjatunwewetam. ²⁰Jesic ocmi Dios iccám jém juezyaj iga injacyajpa jém Israelpic pixiñtam cuatrocientos cincuenta amfiy. Injacyajpa jém juezyaj hasta que núc jém tiempo de Samuel jém Dios injmatciwiñ. ²¹Ocmi iwacyaj tum nunta rey iga injaguñ. Jesic Dios iccám jém Saúl juuts rey iga injacpa cuarenta amfiy. Jém Saúl, jém Cis imaníc, tsucum de jém tribu de Benjamín. ²²Ocmi Dios itop jém Saúl. Accámta jém David iga rey. Nimpa Dios: “Ampát jém David jém Isaí imaníc. Jém ijxi jextim juuts aich. Iwatpa juuts ich aňwianjam.” ²³Yítim David iocmanic maníc jém Jesús, jém iciacputpáppic jém Israelpic pixiñtam. Dios ictsucum juuts tajycamayne wiñigam. ²⁴Antes que miñpa jém Jesús, jém Xiwan injmadáy itumpiy jém Israelpic pixiñtam iga icucacyajiñ ijxi y iga acchiñyajtaiñ. ²⁵Cuando dam jáyñe iga caaba jém Xiwan, nimpa: “Ich dá aje jém michpic inñjspa iga miñpa. Pero ocmi miñpa antuñiañciim tum pixiñ más wiap que aich. Ich dá ipati iga aňwijáypa iciac ipuyucmi.”

²⁶Mantiwitam, jém Abraham mimanictam, jém injcñtampáppic Dios, taichítam tacutsadayta jém wibic aňmati iga taciacputpa Dios. ²⁷Jém ityajwiip Jerusalén y jém injagooyiyaj dá ijodonayaj iga Jesús je jém icutsatnewiip Dios. Datim icutiñiyayajpa cuando imayyajpa cada jevcuy jama jém aňmati jém ijaychacnewiip jém wiñicpic

aḡmafcīiwiñ. Cuando accaatā jém Jesús, cupacpa iwat juuts ním jém wiñicpic aḡmafcīiwiñ. ²⁸Mex ḡa ipádayyaj itáŋca jém Jesús iga accaatāiñ, jém pixiñtam iwágáy jém Pilato iga accaatāiñ. ²⁹Cuando jém pixiñtam yaj imalwadayyaj jém Jesús juuts ijaychacne jém wiñicpic aḡmafcīiwiñ, icquetyaj jém icunusyucmi, icumyaj.

³⁰Pero Dios icpis de jūt it̄ jém caaneyajwiip. ³¹Wat̄ña jama iwiñquejáy jém icuyujcīiwiñ jém iwaganamiññewiip de Galilea a Jerusalén. Siip jeeyaj tsíyyaj juuts testigo iga iḡmadayyajpa jém pixiñtam iga n̄uma pisneum.

³²Siip aichtam manañquejáypa jém wibic aḡm̄ati jém Diospic ijyicamayñe jém wiñicpic tanjatun̄wewetam. ³³Siip Dios iccupac jém promesa para taichtam jém wiñicpic pixiñtam tam̄anictam. Iccupac Dios cuando icpis jém Jesús, juuts jaychacnet̄a jém salmo dos. Nimpa:

Mich mam̄anic.

Yíp jama manchi jém vida.

³⁴Jém tan̄jatun̄ Dios ijyichacne iga icpisp̄a jém im̄anic de jūt it̄ jém caaneyajwiip iga jém im̄ijt̄ay ḡa p̄ucpa. Yīimpic n̄impa jūt jaychacnet̄a:

Manyaachañjampa,
man̄wiwadáypa juuts
anjyicamayñe jém David.

³⁵Jeeyucmi n̄imp̄atim̄ jém tun̄gac salmo:

ḡa an̄j̄c̄pa iga p̄ucpa im̄ijt̄ay
jém acuyoxapaap,
jém tsampic antoypa.

³⁶N̄uma jém David ts̄am icuyoxa jém it̄īwitam juuts iw̄añj̄am Dios.

Ocmi ca, cum̄ta jūftim cumneyaj jém ījatun̄wewe, p̄uc jém im̄ijt̄ay. ³⁷Pero jém icpisnewiip Dios, ḡa p̄uc jém im̄ijt̄ay. ³⁸Mant̄iwitam, jod̄oḡataami iga ȳip̄tim̄ Jesús iñiyimi miḡmadayfamt̄ap iga Dios miwadayf̄ampa perdón jém iñt̄añca. ³⁹Yíp p̄ixiñ iñiyimi it̄umpiȳ jém icupicneyajwiip Jesús wadayf̄ap perdón it̄umpiȳ jém it̄añca jém ḡapic wīap iw̄itsagáy jém Moisés iḡquímayooyi. ⁴⁰Nawattamt̄aji cuenta mimichtam iga ḡa iññascaaba juuts ijaychacne jém wiñicpic aḡmafcīiwiñ. Nimpa yīimpic:

⁴¹Mimalopic mipixiñtam, ts̄am iñiccat̄ampa jém wibic cosa.

Núcpa jama iga agui
miám̄añjacpa, pero
mitogoypa.

Porque ich̄ aDios aḡwatpa tum̄
m̄ijpic cosa jém tiempo de
mimichtam.

Pero mimichtam ḡa
iḡcupict̄ampa mex̄ ī
miḡmadáypa.

⁴²Iganam putyaj jém Pablo con icompañeroyaj jém sinagoga, jesic jém pixiñtam iñimayyaj:

—Yíp tun̄gac jejcuy jama miñi
añmadayf̄aami eybic jém siippic
ammaton̄ta.

⁴³Cuando cupudayyaj de jūt aḡtuum̄aneyaj, jesic ts̄am j̄áyan̄ jém judíos con jém tun̄gac pixiñtam, jém iw̄añj̄am̄ayjap̄appic jém Moisés iḡquímayooyi, it̄úñiyyajpa jém Pablo y Bernabé. Jesic jeeyaj iḡquimpa jém pixiñtam iga seguido icupiguiñ y odoy ichaguiñ jém Dios it̄óyooyi.

⁴⁴Jesic jém tun̄gac semana jém jejcuy jama aḡtuum̄ayajpa

casi itumpiy jém ityajwiip jém attebet iga imatonyajpa jém Dios inmafi. ⁴⁵Pero cuando jém judíos iix iga anjtuumaneyaj tsam jáyan pixiñtam, jesic tsam najajoyyajpa, moj imalmalnımayyaj jém Pablo. Nımyajpa iga tsam migóypa. ⁴⁶Jém Pablo y Bernabé da cıñpa inmat. Inımáy:

—Tienes que wiñti

manajmadáypa jém Dios inmafi mimichtam miİsraelpic mipixiñtam. Pero como da impictsonjtooba jém vida jém dápic cuyajpa, siip ananıgáypa jém wıbıic ajmafi jém tungac pixiñtam jém dápic je de Israel. ⁴⁷Porque jempigam tanımáy jém tanJaturj Dios. Nımpa yiımpic:

Manaccám juuts tum wıbıic jucti para jém tungac pixiñtam jém dápic je de Israel.

Manjutsatpa iga ininıcpa jém wıbıic ajmafi iga Dios icıacputtooba jém pixiñtam icuwıfi yıp naxyucmi.

⁴⁸Jesic cuando imatonyaj jém tungac pixiñtam, jém dápic je de Israel, agui maymayyaj. Nımyajpa: —ıYıp Dios inmafi tsam wı!

Jesic icupıcyaj itumpiy jém icupıñnewıip Dios iga ipıctsonyajıñ jém vida jém dápic cuyajpa. ⁴⁹Jesic ajmattap jém Dios inmafi icuwıfi jém naxyucmi de Pisidia. ⁵⁰Pero jém judíos tsam ijóyixyajpa jém wıbıic ajmafi. Moj ıctsum iga icpóyiyajpa jém Pablo y Bernabé. Jém malopic judíos inımáy jém wıbıic yomtam con jém mıjpic anjagooyıyaj iga iyoxpáđıñ. Jesic moj icpóyiyaj hasta icquebacputyaj jém naxyucmi de Pisidia. ⁵¹Jesic cuando putyaj jém Pablo y Bernabé,

icunebayyaj jém pótpót ipuyucmi iga quejiñ iga jém pixiñtam da ipıctsonyaj jém Dios inmafi. Ocmi nıcyaj jém attebet Iconio. ⁵²Pero jém icupıcneyajwiip Cristo jém attebet Antioquía tsam maymayyaj. Tsam iniıtyaj Dios iAnama.

**Jém Pablo y Bernabé
ıf jém attebet Iconio**

14 Jesic jém attebet Iconio jém Pablo y Bernabé wagatıgyıyaj jém judíos isınagoga. Como tsam wıap inmatyaj jém wıbıic ajmafi, tsam jáyan pixiñtam icupıcyaj jém Cristo. İcupıcyajtim jém judíos con jém griegopic. ²Pero jém judíos, jém dápic icupıcpa, tsam pımi imalnımayyaj jém Pablo y Bernabé. İcjóyixyajtim jém tungac pixiñtam jém dápic je de Israel. ³Jeeyucmi tsıyyaj jemum jém Pablo y Bernabé wafña jama. Da cıñpa inmat porque ijodon iga iyoxpátpa jém tánQmi. Numa Dios inquejáypa jém pixiñtam iga da migóypa jém Pablo cuando inmatpa de jém Dios itóyooyi. Chiıfatım jém Dios ipımi iga wıap iwat jém milagro y jém seña jém dápic oypa tánix. ⁴Pero nawıcyajta jém pixiñtam jém ityajwiip jém attebet. Algunos iwıanjıamyaj jém judíos inquımayooyı, algunos iwıanjıamyaj jém apóstol inquımayooyı. ⁵Ocmi jém judíos con jém tungac pixiñtam iwatyaj acuerdo con jém anjagooyıyaj iga imalwadayyajpa jém Pablo y Bernabé, iga inıncsayajpa tsaamı. ⁶Pero jém Pablo y Bernabé cuando ijodonıyay, poyyaj, nıcyaj jém attebet Listra y Derbe jém naxyucmi de Licaonia.

Nasyaj ífumpiy jém attebetyaj jém nocojompic íf⁷ iga inmatyajpa jém wibic aḡmafi.

**Yígayta tsaami jém Pablo
jém attebet Listra**

⁸Jém attebet Listra coñ tum cuxuj calle aḡḡaca. Da nunca wiap iwií porque cuxuj miñay. ⁹Jém pixiñ súp imatoḡ tí nímpa jém Pablo. Jesic jém Pablo iámmats, iix iga tsam icupicpa iga Dios wiap icpis. ¹⁰Jesic jém Pablo ijyáypa pími. Nímpa: —iTsucumi, numteñi!

Jém pixiñ teñchucum, yóyquím, mojum wiíi. ¹¹Cuando jém pixiñtam iixyay tí iwat jém Pablo, pími jyyajpa jém Licaoniapic aḡmatimi. Nímuyajpa:

—Quetneum wisten diosyay, jex juuts pixiñ.

¹²Ijisyaj jém pixiñtam iga jém Bernabé jém dios Júpiter y jém Pablo jém dios Mercurio porque je agui aḡmatpa. ¹³Jém panij, jém icuyoxapáppic jém dios Júpiter, iniíi imastíc jém attebet aḡḡaca. Inimiñ jutēn xix tsam iwíaccuyajne con jém moya. Jém panij con jém pixiñtam iccaayajtooba jém xix juuts tum sacrificio jém Pablo iwiñjom iga ijisyajpa juuts tum dios.

¹⁴Pero jém apóstolyaj, jém Pablo y Bernabé, cuando icutiyyay tí iwatpa jém pixiñtam, jesic ichicujac jém iyooíi. Tigiy jém pixiñtamanjom, moj jiyi pími.

¹⁵Nímpa:

—iMipixiñtam! ¿Tíiga inwattámpa jempic? Ich apixiñ juuts mimichám. Jeeyucmi amiñ iga manactsactámpa jexpic jixi jém dápic tayoxpátpa. Cupici jém

vivopic Dios jém iwatnewiip siḡ, nas y lamar. Ífumpiy jém Dios iwaíi. ¹⁶Wiñigam Dios ijíc iga ífumpiy jém pixiñtam iwatyajpa con ijixi juuts ixunpa iyaac. ¹⁷Pero dende wiñigam tanquejáypa juutspic Dios jém tanJatuḡ Dios. Tsam tawiwadáypa. Icchijóypa tuj iga tanaíftámpa wibic cosecha. Tachiiba títam tanjútpa iga tamaymáyp.

¹⁸Mextim inmadáypa jempic, jém Pablo tsam táḡca ictsac jém pixiñtam iga iccaaba jém xix iga iwadáypa sacrificio jém Pablo y Bernabé iwiñjom.

¹⁹Ocmi miñyajtim jem jém malopic judíos, jém ityajwiip jém Antioquía y jém Iconio. Moj icumigoyyay jém pixiñtam iga Pablo icujyypa Dios. Jesic iccupicyaj, iyigayyay tsaami jém Pablo. Ijicputyaj anjicmi de jém attebet. ²⁰Pero cuando icuyuciiwiñ inḡtuumacayaj jém Pablo, eybic tsucum, tigiy jém attebet. Jém tungac jama put jém attebet con jém Bernabé, nicyaj jém attebet Derbe. ²¹Ocmi cuando yaj inmat jém wibic aḡmafi jém attebet Derbe, tsam jáyan tigiyay iga icupicyajpa Cristo. Jesic set jém attebet Listra, jém Iconio y jém Antioquía. ²²Cuando nasyaj jém tungac attebetyaj tsam iyoxpátpa jém icupicneyajwiip Cristo. Inquímpa iga odoy ichaguñ jém Dios inmafi. Inímayajpatim iga tienes que tayaachwattap y tacutitstap iga tanúcpa juí íf Dios. ²³Accámta tum anjagooyi cada mastícjom juí anḡtuumayajpa jém Dios ipixiñtam. Jesic jém Pablo y

Bernabé cuando yaj iwat oración y ayuno, iciijunꝓcot jém anjagooyiyaj jém tánQmi iciijom iga iwatyajiñ cuenta jém icupicneyajwiip Cristo.

**Jém Pablo y Bernabé setpa
Antioquía y Siria**

²⁴Ocmi nasyajpa jém naxyucmi de Pisidia, núcyaj jém naxyucmi de Panfilia. ²⁵Iñmatyaj jém Dios inmaṭi jém attebet Perge. Ocmi nicyaj hasta tum attebet inñyi Atalia. ²⁶Jemum tigiyaj tum barcojom. Set eybic jém Antioquía, jém attebet juṭ tsucumyaj, juṭ jém tantiwitam iciijunꝓcotyaj jém Dios iciijom iga iwatpa cuenta con jém wibic tóyooyi cuando nicpa iwat jém yoxacuy jém siipic cuyajneum. ²⁷Cuando núcyaj jém Antioquía, inṭuumawatyaj jém Dios ipixiñtam. Jesic jém Pablo y Bernabé inmadayyaj itumpiy juuts iwadáy Dios. Inmadáytim itumpiy jutsap ináyáy jém puerta jém tánQmi para jém tunꝓac pixiñtam jém dápic je de Israel iga wiñiñtim icupicyaj. ²⁸Jesic jeeyaj tsíyyaj waṭi jama con jém tantiwitam.

Anṭuumayaj jém apóstolyaj Jerusalén

15 Jesic algunos pixiñtam, jém ityajwiip idic Judea, miñyaj Antioquía. Moj inquejayyaj jém tantiwitam iga dá taciaputtap siiga dá tampictsonpa jém marca de circuncisión jém ictsucumnewiip jém Moisés. ²Jesic jém Pablo y Bernabé ányaj con jém inimiñneyajwiip jém migooyi. Jesic cupiñta jém Pablo y Bernabé con tunꝓac más pixiñtam iga nicpa iwitsac jém asunto Jerusalén con

jém apóstolyaj y jém wiḏaytam, jém injacpáppic jém Dios ipixiñtam.

³Jesic jém Dios ipixiñtam jém ityajwiip Antioquía oy ijaganꝓsacyaj tunꝓjom. Ocmi nasyaj jém Fenicia y Samaria. Inmadayyaj jutsa micupicyaj jém tunꝓac pixiñtam jém dápic je de Israel. Agui maymayyaj itumpiy jém tantiwitam cuando imatonꝓaj.

⁴Cuando núcyaj Jerusalén jém Pablo y Bernabé, iwipictsonꝓaj jém Dios ipixiñtam. Iwipictsonꝓajtim jém apóstolyaj y jém wiḏaytam. Moj inmadayyaj titam iwadáy Dios con jeeyaj. ⁵Pero jemum itim jutem jém fariseoyaj, icupicyajtim jém Jesucristo inquímayooyi. Teñchucum, nimyajpa:

—Jém tunꝓac pixiñtam jém dápic je de Israel tienes que iwatpaṭim jém marca de circuncisión cuando mojpa icupic Jesús. Tienes que iwatpaṭim juuts nimpa jém Moisés inquímayooyi.

⁶Ocmi anṭuumayaj jém apóstolyaj con jém wiḏaytam. Moj iñisyaj siiga wí iga tanꝓatpa juuts nimpa jém fariseoyaj. ⁷Cuando yajum ánjajiyaj, teñchucum jém Peto. Inímáy:

—Mantiwitam, michtam inḏodon iga dá más pecam Dios acupin de mimichámanꝓom iga ananmadáypa jém wibic anmaṭi jém tunꝓac pixiñtam jém dápic je de Israel iga icupicyajiñ mex jeeyaj. ⁸Dios ijodon ti tanꝓispa tánanamanꝓom. Tanquejay iga jém tunꝓac pixiñtam numa icupicyajpaṭim Cristo porque chiiyajta jém Dios iAnama juustim taichtam. ⁹Dios dá inñejaixpa jém pixiñtam. Iixpa jém tunꝓac pixiñtam jextim juuts taichtam. Dios iccuáyáy

ianama porque icupicpatim Cristo mex jeeyaj. ¹⁰Jesic fiiga da incupicpa ti iwatpa Dios. ¿Tiiga inictsiimap jem tantiwitam con jem wiñicpic anquimayooyi? Porque ni taichtam ni jem wiñicpic tanjatunwewetam da wiap tanaccupac juuts nimpa jem wiñicpic anquimayooyi. ¹¹Pero taichtam tançupicpa iga Jesucristo taciacputpa porque tsam tatoypa. Tachiiba jem toyooyi juuts tum xaja. Jempictim iwadaypa Dios jem tungac pixiñtam.

¹²Jesic itumpiy jem pixiñtam jut antuumaneyaj dam jiyaj. Moj icumatoriyaj iganam iñmatpa jem Pablo y Bernabé jutsa miyoxpat Dios iga iwat jem milagro y seña entre jem tungac pixiñtam, jem dapic je de Israel. ¹³Cuando yaj nimiay, teñchucum jem Jacobo, inimay jem pixiñtam:

—Mantiwitam, amatorñtaami.

¹⁴Tañmaday jem Peto jutsa miwivaday Dios jem tungac pixiñtam cuando moj ipictsonyay jem Dios iñmati. Cupinyajtatim jutem de jeeyaj iga tsyyajpa juuts jem Dios ipixiñtam. ¹⁵Cuando iwat jempic, ictsypa jem añmati juuts ijaychacne jem wiñicpic añmatciwiñ. Nimpa yiimpic:

¹⁶Jesic yaj inasca jempic, amiñgacpa eybic iga añwitsagaypa jem David itic jem actiñnewiip.

Añwatsetpa jomipic jem misanewiip, eybic anacteñpa.

¹⁷Añwatpa jempic iga jem tungac pixiñtam imetsyajiñ Dios. Jesic itumpiy jem cupiñnetawiip, jem dapic de Israel, tsyyaj juuts ich ampixiñtam.

¹⁸Nimpa jem tanjatun Dios: Tsam wiñigam jodñata iga naspa jempic.

¹⁹Nimpafim Jacobo:

—Jeeyucmi ich animpa wi iga da tammoogypa jem tungac pixiñtam jem dapic je de Israel cuando ichacpa jem wiñicpic jixi iga icupicyajiñ Dios. ²⁰Wi iga tanjayaypa tum toto iga ichaguñ iga icupicpa jem watnas, iga odoy pejoyiñ, odoy icudiñ jem animat jem pencanewiip ni jem jupcanewiip y odoy icudiñ jem niipiñ. ²¹Dende wiñigam it jem iñmatpappic jem Moisés inquimayooyi cada tiganjoj. Maytap jem añmati cada jejcuy jama jem sinagoga.

²²Jesic jem apóstolyaj con itumpiy de jem Dios ipixiñtam con jem wiñaytam ijsiyaj iga icupinyajpa wisten pixiñ de jeeyaj iga icutsatpa Antioquia con jem Pablo y Bernabé. Jesic cupiñta jem Judas iniyiñ Barsabás y tum pixiñ iniyi Silas. Yip wisten tsy iga jem Dios ipixiñtam injagooyiyaj. ²³Icutsat tum toto con jeeyaj.

Nimpa:

“Aichtam aapóstoltam, con jem wiñaytam, con itumpiy jem tantiwitam jem ityajwiip yim, mançutsadaypa watidios, mantiwitam, jem miiftañwiip jem atebet Antioquia y jem naxyucmi de Siria y Cilicia. ²⁴Anjodoñaneta iga oyne yiimpic pixiñtam, pero aichtam da añcutsatneta. Yipyaj mimigoyaypa, micujñaypa con jem iñmati. Mipiimiyapa iga inwadñ jem marca de circuncisión y iga odoy inchaguñ jem Moisés

inquímayooyi. ²⁵Jeeyucmi aņcumunĵista iga aņcupiņpa wisten p̄ixiñ aichfampic iga niguiñ miámta con jém Bernabé y jém Pablo jém tantoypáppic. ²⁶Yíp wisten p̄ixiñ wałciy accaatatooba jém tánŌmi Jesucristo icuyucmi. ²⁷Jeeyucmi maņcutsadáypa jém Judas y Silas iga nicpa miņmadáy iyaac itũmpiy juuts manjáyáypa yíp totoyucmi. ²⁸Dios iAnama dá iwianĵam iga manactsiim̄ap con jém miĵpic aņquímayooyi y aichtám anĵistámpatim ĵempic. Manaņmadáypa tí ixunpa Dios iga taņwatpa: ²⁹Odoy cuuti jém animat imayi, jém accaanetawiip jém watnas iwiñjom, jém watnetawiip sacrificio. Odoy cuuti jém niĵpiñ ni jém animat jém pencanewiip. Odoy pejooyi. Odoy ts̄ici tuņgac yomo. Siiga seguido iņwatpa juuts nimpa yíp aņquímayooyi, jesic iņwiwatpa. Jesaņĵam manjáyáy.”

Nicyajpa Antioquía jém cuatro p̄ixiñ

³⁰Jesic yaj inquímyaj, mojum niquiyaj jém cuatro p̄ixiñtam jém attebet Antioquía. Cuando núcyaj, iņtuumawatyaj itũmpiy jém Dios ip̄ixiñtam. Iciĵjuņcodayaj jém toto. ³¹Cuando yaj imayyaj jém toto, jém tant̄iwitam agui maymayyaj porque tsam iyoxpát jém toto. ³²Jém Judas y Silas profetayaj, chiiyajt̄a jém ĵixi iga wiap iņmat jém Dios iņmaťi. Tsam iņmadayyajpa jém p̄ixiñtam tí ixunpa Dios. Tsam iyoxpátpa iga iw̄icupicyajpa y dá ichacyajpa jém wibic aņmaťi. ³³Jesic jáy wagaĵiyaj. Cuando yaj iwat iyoxacuy, jém tant̄iwitam inquímyaj iga setpa eybic ĵuťim tsucumyaj. ³⁴Pero

jém Silas iĵis iga ts̄itypa Antioquía. ³⁵Ts̄iyyajťim jém Pablo y Bernabé. Dá ichacyaj iga najfýoypa y iņquejáypa jém p̄ixiñtam jém tánŌmi iņmadayooyi. Jemum ts̄iyyajťim waťi jém tant̄iwitam.

Jém Pablo eybic nicpa juumi

³⁶Dá waťna jama jáyĵiyaj, jém Pablo iñimáy jém Bernabé: —Nicpa tanjójáy eybic jém tant̄iwitam itũmpiy jém attebet ĵuť moj tanaņmat jém tánŌmi iņmadayooyi iga tanĵodónap ĵutsane iĵiyaj.

³⁷Jém Bernabé

iwagananictoobaťim jém Xiwan iñiyitim Marcos. ³⁸Pero jém Pablo dá iwianĵam iga iwagananicpa jém Xiwan porque ichagaņput jém yoxacuy jém attebet Panfilia. ³⁹Ocmi jém Pablo aņayaj con jém Bernabé. Mex jeegacti natsagaņputyajt̄a. Jém Bernabé ininic jém Marcos. Tigiy barcojom, waganicyaj jém isla de Chipre. ⁴⁰Jesic jém Pablo icupiņ jém Silas. Nicyaj. Jesic jém tant̄iwitam inquímyaj, iņwejpátyaj tanĴatuņ Dios iga iyoxpádiñ. ⁴¹Nasyajpa jém naxyucmi de Siria y Cilicia. Ĵuť quej nicpa iyoxpát jém Dios ip̄ixiñtam iga más wiain iwatyaj juuts ixunpa Dios.

Waganicpa jém Timoteo con jém Pablo y Silas

16 Jesic jém Pablo y Silas nicyaj jém attebet Derbe y Listra. Jemum ipát tũm p̄ixiñ jém icupicnewiip Cristo iñiyi Timoteo. Jém iapa tũm Israelpic yomo, tsam icupicpaťim Cristo. Jém iĵatuņ tũm

griegopíc p̄ixiñ. ²Jém tantiwitam jém it̄yajw̄iip Lистра y jém Iconio tsam iw̄ixyaypa jém Timoteo.

³Jém Pablo iwagananictooba jém Timoteo. Jeeyucmi iwadáȳim jém marca de circuncisión iga odo y ijóyixiñ jém judíos jūt̄ n̄icyajpa jém Pablo. Porque ijodon̄yay iga jém ijat̄uḡ griegopíc p̄ixiñ. ⁴Jesic n̄icyaj, nasyajpa w̄at̄i jém at̄betet. Iḡquejayyaypa t̄i w̄iap̄ iwatyaj juuts ip̄im̄y jém apóstolyaj y jém w̄idaȳtam jém it̄yajw̄iip Jerusalén.

⁵Jesic jūt̄ aḡtuum̄ayajpa Dios ip̄ixiñtam más̄tim icup̄icyajpa. Cada jama más̄ jáȳaḡap.

Im̄aw̄iñix Pablo tum Macedoniapic p̄ixiñ

⁶Jém Dios iAnama dá ij̄gáy iga iḡmatpa jém Dios iḡmat̄i jém naxyucmi de Asia. Jeeyucmi w̄idaḡnasyaj jém naxyucmi de Frigia y Galacia. ⁷Ocmi núcyaj jūt̄ tsucum jém naxyucmi de Misia. De jem ij̄isyajpa iga t̄iḡypa jém naxyucmi de Bitinia. Pero Dios iAnama dá̄tim ij̄gáy iga iḡmatyaypa jém Dios iḡmat̄i jem. ⁸Jesic icuw̄idayyaj jém naxyucmi de Misia, n̄icyaj naxwiñ jém at̄betet Troas jém lamar aḡnaça. ⁹Jesic tsuuciim jém Pablo iix tum poñ. Iix iga jemum teñ tum Macedoniapic p̄ixiñ. Iacunuc̄s̄aypa. In̄im̄áy:

—Nasi ȳim̄ Macedonia, miñi ayoxp̄áttaami.

¹⁰Mu iix jém poñ, jicsciy anaw̄itsactamt̄a iga anictámpa Macedonia. An̄jodón̄ata iga num̄a aḡwejáy Dios iga niguiñ anaḡmat jém w̄ibic aḡmat̄i Macedonia.

Cuando it̄yaj Filipos jém Pablo y Silas

¹¹Atigiȳta barcojom jém at̄betet Troas. An̄umnicta jém isla de Samotracia. Tun̄gagam jama anúcta jém at̄betet Neápolis. ¹²De jem anicta hasta Filipos, tum Romapic colonia. Je jém más̄ mij̄pic at̄betet de jém parte de Macedonia. Jáy āit̄itam jemum juna jama. ¹³Tum jejcuy jama aputta aḡsicmi de jém at̄betet. Anicta tum ni aḡnaça. Anúcta tum lugar jūt̄ siempre iḡwejp̄atyajpa Dios. Acoñta, moj anaḡmadayyaj jém Dios iḡmat̄i jém yomtam jém aḡtuumaneyajw̄iip jem. ¹⁴Tum de jeeyaj in̄iyi Lidia. Jém yomo tsucum jém at̄betet Tiatira. Im̄aypa jém w̄ibic puct̄ucu jém color morado. Tsam ij̄ispa Dios. Iw̄imatoḡpa jém Dios iḡmat̄i. Jém tánQmi iḡáyáy jém yomo ianama iga iwadáȳiñ caso t̄i n̄impa jém Pablo. ¹⁵Jesic acchiḡta jém Lidia. Acchiḡyajt̄at̄im it̄umpiy jém it̄yajw̄iip it̄icciim. Ocmi icunuc̄s̄ay jém Pablo. In̄im̄áy:

—Siiga in̄j̄ispa iga aḡw̄icupic jém tánQmi, miñi mich̄iyi ich anticciim.

Jesic aḡcupicta, at̄s̄ȳta.

¹⁶Jesic tungagam jama anictámpa eybic jém lugar jūt̄ iwatyajpa oración. Tun̄jom ampát tum woñi juyñeta, tum esclava. Iniit̄ tum mal espíritu. Jém woñi tum sabio. Iméts̄pa suerte. Tsam iw̄icoñw̄ȳyapa tumiñ para jém iomi jém ijuyñew̄iip. ¹⁷Ȳip woñi moj atún̄iyta aichtam. P̄imi j̄iyapa jém woñi, n̄impa:

—Yíp pixiñtam icuyoxap jém yucmipic Dios. Injmatyajpa jutsap taciacput Dios.

¹⁸Jempam iwat jém woñi wañña jama. Ocmi jém Pablo ijóyca. Iámseedáy, inímáy jém mal espíritu:

—Jém Jesucristo iniyimi manímáypa, puti yíp woñi ianamanjom.

Jeetí rato jém mal espíritu ichacum jém woñi.

¹⁹Pero mu iix jém woñi iomi iga dá más iconwíypa tumiñ, jesic matsta jém Pablo y Silas. Nanicta jém anjagooyicim jém plaza aynaca. ²⁰Iciijucot jém juez iciijom. Nimpa jém woñi iomi:

—Yípyaj judíos tsam iccujíñáypa jém pixiñtam jém ityajwiip tánattebet. ²¹Inquejpa tum aynquímayooyi jém dapic wiap tanucuyucata porque taichfam taRomapic tapixiñtam.

²²Ocmi tsucumyaj jém pixiñtam iga iquejajwadayajpa jém Pablo. Jém juez ipimíy iga ichodayajijn iyootí iga cótstain con waycuy.

²³Pimi icótsyaj, ocmi icotyaj cárcel. Pimiyta jém carcelero iga iwíwadiñ cuenta. ²⁴Cuando ipictson jém orde, icot jém Pablo y Silas jém más jojmipic cuarto de jém cárcel. Codayta ipuy tum cuycotcuyjom, acmatsta tum cadena.

²⁵Cuando núc cugapsu, jém Pablo y Silas iwatyajpa oración; iwánayajpa Dios tum himno. Jém tunjac preso imatonyajpa. ²⁶Jeetí rato tsam pimi yiispa jém nas. Tsam pimi ixics jém cárcel. Jeetí rato ányá itumpiy jém ipuerta. Ányayaj itumpiy jém cuycotcuy

icadena, cutsigayyaja itumpiy jém preso. ²⁷Jesigam yus jém carcelero. Iix iga ányañeum itumpiy jém cárcel ipuerta. Itop imachiti iga nacaatap iyaac porque iispa iga cupóyayñeyajum itumpiy jém preso. ²⁸Pero jém Pablo pimi ijíyáy. Inímáy:

—Odooy wati jempic. Da apoyñeta, antumpiytam aítta yim.

²⁹Jesic jém carcelero iwác justí. Tigiy poyimi jém cárcel. Pimi cuetsáypa, tsam cigne. Ocmi costeñneactij jém Pablo y Silas iwiñjom. ³⁰Ocmi itop jém Pablo y Silas. Icwác. Inímáy:

—Mipixiñtam, éti wiap aynwat iga aciacputtap?

³¹Jesic jém Pablo y Silas inímáy: —Cupici tánOmi Jesucristo. Jesic miciaacputpa, ciacputtapim itumpiy jém ityajwiip inícticim.

³²Jesic moj inmadáy Dios inmati jém carcelero con itumpiy jém ityajwiip ificim. ³³Jeetim hora, tsuucim, danam cuquejne, jém carcelero icheáy jém Pablo y Silas icoowaji. Jesic jeetí rato achinnyajta jém pixiñ con itumpiy jém ityajwiip ificim. ³⁴Ocmi ininic ificim jém Pablo y Silas iga acwicyajtap. Agui maymay jém pixiñ con itumpiy jém ityajwiip ificim porque icupicyaj Dios.

³⁵Icuquejama jém juezyaj icutsatyaj jutén jém policía iga inímáyin jém carcelero iga icutsigáyin jém Pablo y Silas.

³⁶Jesic ocmi jém iwatnewiip cuenta jém cárcel inmadáypa jém Pablo:

—Apiimíy jém juezyaj iga mancutsigáyin. Siip puttaamim. Chogoyñicsim.

³⁷ Pero jém Pablo inímáy:

—Aunque aichám aRomapic, acótstamta jém pixiñtam iwiñjom ni da i aciipin. Acotta cárcel. ¿Que ijisyajpa iga siip ayamcutsigayyajtooba? Da wiap. Más wi iga miñyajiñ jeeyaj iga acutsigayyajpa iyaac.

³⁸ Jém policía nic inmadayyaj jém juezyaj. Jesic tsam pimi cinyaj jeeyaj cuando imatonaj iga Romapic pixiñtam. ³⁹ Jesic miñyaj jém juezyaj iga iwágaypa perdón jém Pablo y Silas iga tsam imalwadáy. Icnucsay iga puññ jém atebet. ⁴⁰ Cuando yajum puññ cárcel jém Pablo y Silas, nic jém Lidia iticciim. Nic iamyaj jém tantiwitam. Inquimyaj ti wiap iwatyaj. Ocmi nicyajum.

Cujñáypa jém Tesalónicapic pixiñtam

17 Jesic jém Pablo y Silas nasyaj jém atebet de Anfópolis y Apolonia. Ocmi núcyaj jém atebet Tesalónica jut it tum jém judíos isinagoga. ² Juuts siempre jém Pablo tigiyapa jut antuumaneyaj. Tucunasemana inquejáypa Dios inmafi cada jecuyjama. ³ Inquejáy jém pixiñtam jut jayñeta jém Dios inmafi. Inmadáypa iga tienes que yaachwattap jém Cristo y ocmi acpistap. Inímáytim:

—Yíptim mismo Jesús siip manañmadáypa, je jém Cristo.

⁴ Jesic algunos jém Israelpic pixiñtam icupicyaj, inpitsyaj jém Pablo y Silas. Icupicyajtim jáyan jém griegopic pixiñtam jém ijisyajpáppic Dios y wafi jém

witampic yomtam jém jixiywiip.

⁵ Ocmi jém judíos, jém dapic icupicyajpa jém wibic anmafi, tsam najajoypa. Antuumayaj con algunos jém malopic pixiñtam jém dapic yoxayajpa, jém witwidoypáppic calle. Ictsucumyaj tum mijpic bulla iga icujñáypa jém pixiñtam. Innácsayyaj jém Jasón itic. Imétstip jém Pablo y Silas iga itopyajpa iga ininicyajpa jém pixiñtam iwiñjom. ⁶ Pero cuando da ipát jém Pablo ticjom, matsyajta jém Jasón con algunos jém tantiwitam. Ijicteñyaj hasta jém anjagooyicim. Jém pixiñtam pimi anweyjajpa. Nimyajpa:

—Yíbam pixiñtam icujñayñeyaj icuwiiti yip naxyucmi. Siip núcneyajum yim. ⁷ Yip Jasón ipictsoñne iticciim. Itumpiy de jeeyaj da iwatyajpa juuts nimpá jém Romapic anquímayooyi. Nimyajpatim iga it tungac rey, jém Jesús.

⁸ Jesic jém pixiñtam con jém anjagooyiyaj tsam pimi kujñayyaj cuando imaton ti nimyajpa. ⁹ Jesic jém Jasón con icompañeroyaj ichiiyaj tumiñ jém anjagooyi iga odoy más idiñ jém bulla. Ocmi cutsigayta.

Jém Pablo y Silas nicpa jém atebet Berea

¹⁰ Jesic jeeti tsuu jém tantiwitam icutsatyaj jém Pablo y Silas iga nicyajiñ jém atebet Berea. Ocmi cuando núcyaj, tigiyaj jém judíos isinagoga. ¹¹ Pero jém Bereapic pixiñtam más da maloyaj que jém ifyajwiip jém atebet Tesalónica. Tsam maymayyaj, iwipictsoñyaj

jém Dios in̄mafi. Cada jama icuyujcayajpa jém aṇmafi jém jayñewiip, icuámyajpa siiga numa jesaneum juuts in̄ímáy jém Pablo. ¹²Jeeyucmi tsam jáyaṇ de jeeyaj icupicyaj. Icupicyajim jáyaṇ jém griegopic yomtám y pixiñtam jém w̄itampic. ¹³Pero jém judíos jém ityajwiip Tesalónica, cuando ijodónayaj iga jém Pablo in̄matpa Dios in̄mafi Berea, nicyaj jemíc iga icujíñayajpatim jém pixiñtam. ¹⁴Jesic jém tantiw̄itam jém ityajwiip Berea jicsciy icutsat jém Pablo jém lamar aṇṇaca. Pero jém Silas y Timoteo tsíyyaj jém attebet Berea. ¹⁵Jém iwagananicnewiip jém Pablo ininicyaj hasta jém attebet Atenas. Cuando setyaj, jém Pablo icutsadáy aṇmafi jém Silas y Timoteo con jeeyaj. In̄ímáy iga: Jicsciy m̄iñi, ḁa mijáypa.

Jém Pablo íf jém attebet Atenas

¹⁶Iganam jém Pablo in̄jócpa jém Silas y Timoteo, iix iga jém ityajwiip jém attebet Atenas agui icupicyajpa jém watnas. Tsam jáyaṇ ityaj. Jesic jóyñe jém Pablo iṇnamajom. ¹⁷Jeeyucmi aṇmatyajpa jém Pablo con jém ityajwiip jém sinagoga, jém judíos, con jém tuṅgac pixiñtam jém iṇsyajpáppic Dios. Cada jama aṇmatyajpatim jém Pablo con jém pixiñtam jém ipátneyajwiip plaza. ¹⁸Jemum ipátayaj algunos jém pixiñtam jém icuyujcanewiip jém epicúreospic in̄químayooyi con jém icuyujcanewiip jém estoicospic in̄químayooyi. Jeeyaj moj aṇmatíyaj con jém Pablo. Nimyajpa:
—¿Ti nimtooba yíp p̄ixiñ tsam aṇmattero?

Tuṅgac jém pixiñtam nimyajpa:
—Quénam tum najíyoypaap de tuṅgac dios.

Nimyajpa jem̄pic porque jém Pablo in̄matpa jém Cristo in̄químayooyi iga pis jém Jesús de juí íf jém caaneyajwiip. ¹⁹Ocmi jém pixiñtam ininicyaj jém Pablo tum lugar in̄ñyi Areópago juí siempre aṇtuumayajpa iga accuyujópa. Jém pixiñtam icwácayaj jém Pablo. In̄ímáy:

—Aichtam an̄jodónatooba tíapaap yíp jom̄pic aṇquímayooyi jém michpic inimiñ. ²⁰Mich anaṇmadáypa tuṅgac j̄ixi jém ḁapic quemán ammaton̄ta. An̄jodónatooba tí nimtooba.

²¹Porque itump̄iy jém Atenaspic pixiñtam con jém juum̄pic pixiñtam jém ityajwiip jem, tsam iw̄ianjamyaj jém jom̄pic j̄ixi iga imaton̄yajpa y iga in̄matyajpa.

²²Ocmi jém Pablo teñchucum jém pixiñtam aṇcucmi jém ityajwiip jém Areópago. In̄ímáy:

—Mimichtam, miit̄taṇwiip Atenas. Ánix iga tsam jáyaṇ diosyaj in̄ñjstampa. ²³Cuando anas juí íf w̄ati jém in̄dios, ampát tum altar juí jayñeta yíp aṇmafi. Nimpa jém letra: “Jém dios jém ḁapic i iixpicpa.” Siip manañmadáypa de jém Dios, jém ḁapic in̄ixpict̄ampa mimichtam.

²⁴Yfbam Dios iwat jém nas con itump̄iy jém ityajwiip yíp naxyucmi. Imiichi jém siṇ y jém nas. ḁa siiba jém masticjom jém iwatnewiip jém pixiñtam. ²⁵Jém pixiñtam ḁa wiap iyoxpátayaj yíp Dios iga ichiiba titam itogóyáy. Porque je inií itump̄iy cosa. Tachiiba tamvida

tantumpiytam. Tachiibatim jem sawa iga tasaupicpa. Tachiiba itumpiy cosa.

²⁶De tum pixiñ ictsucum iga ityaj itumpiy jem naciónyaj jem ityajwiip icuwiti de yip naxyucmi. Ijspa juí itpa jem naciónyaj y jutsaj ityaj.

²⁷Dios iwadáypa jempic porque ixunpa iga icuámiñ jem pixiñtam iga waiñ ipát. Numa Dios da juumi it con taichtam. ²⁸Porque yip naxyucmi tanwaganaitpa Dios. Je tachiiba tamvida y tampimi. Tum de mimichtam jem inijmatciwiñ nimpá iga: “Taichtam Dios tamantam.” ²⁹Siiga Dios tamantam, da wiap tanjista iga tanJatun Dios jex juuts tum watnas jem watnetawiip de oro, plata o tsa, jem ijixquimpáppic jem pixiñtam iga iwatpa. ³⁰Dios da ijísáy itánca jem wiñcipic pixiñtam porque jeeyaj da ijodon ti wi tanwat. Pero siip Dios ipimáy itumpiy jem pixiñtam icuwiti de yip naxyucmi iga icucacyajiñ ijixi. ³¹Porque Dios ichac tum jama iga iciipinpa itumpiy jem pixiñtam, jem ityajwiip yip mundo. Iwiciipinpa con tum pixiñ jem iccámnewiip juuts juez. Tanquejay tantumpiytam iga numa iwatpa jempic cuando pis yip pixiñ de juí it jem caaneyajwiip.

³²Jesic cuando imatonjaj jeeyaj iga pis tum pixiñ caanewiip, algunos agui ixicayajpa. Pero jem tungac nimyajpa:

—Tungac jama ammatonjtooba eybic ti miñimpa.

³³Jesic put jem Pablo juí antuumaneyaj. Nic. ³⁴Pero algunos jem pixiñtam nic itúnjy jem Pablo. Icupictim jem Cristo inquímayooi.

Itúnjy jem Dionisio tum Areópagic pixiñ, y tum yomo inñyi Dámaris con tungac más.

Jem Pablo nicpa jem attebet Corinto

18 Ocmi jem Pablo put jem attebet Atenas. Nic jem attebet Corinto. ²Jemum ipát tum judío inñyi Aquila. Nay jem attebet Ponto. Yaguiñ miñ de jem naxyucmi de Italia. Iwaganamiñ iwichomo Priscila. Putyaj jem naxyucmi de Italia porque jem Romapic anjagooyi jem Claudio ipimáy itumpiy jem Israelpic pixiñtam iga pudiñ jem attebet Roma. Jesic jem Pablo nic ijooyáy jem Aquila y Priscila. ³Jeetim yoxacuy iwatyajpa juuts iwatpa jem Pablo. Jeeyucmi nicpa iwaganaityaj. Wagayoxayajpa. Iwatyajpa jem puctuctic. ⁴Cada jeecuy jama jem Pablo nicpa inquejajy jem antuumaneyajwiip jem sinagoga. Iccupicyaj jem judíos con jem tungac pixiñtam jem dapic je de Israel.

⁵Mu ixetyaj jem Silas y Timoteo de jem Macedonia jem Pablo inmadáypa jem judíos con itumpiy ijixi iga Jesús je jem Cristo. ⁶Pero jeeyaj tsam ijóixiyajpa jem Pablo. Tsam imalmalnímayyaj. Jesic Pablo icuxicsáy iyooti juuts tum seña. Inñmáy:

—Michtam iniif la culpa siiga micaaba y da impictsonpa jem vida jem dapic cuyajpa. Ich da anai la culpa. Dende siip nicpa ananmadáy jem tungac pixiñtam jem dapic je de Israel.

⁷Jesic put jem sinagoga, nic tum pixiñ iticciim inñyi Justo.

Jém sinagoga aṇṇaca íf jém ífíc. Yíp pìxiñ tsam ijìspa Dios. ⁸Jém sinagoga injagooyi iñiyi Crispo. Icupicím jém tánQmi con ífumpiy jém ífaywiip íficcím. Jesic tsam jáyaṇ jém Corintopic pixiñtam mu imatoṇyay tí nimpa jém Pablo, icupicyajím jém Cristo y acchiṇyajta. ⁹Jesic tum tsuu jém Pablo iix tum poñ. Jém tánQmi iñímáy jém Pablo:

—Odo y cñi. Seguido aṇṇati ich anaṇṇati. Odoy tsaci iga ininmatpa. ¹⁰Ich maṇwaganait mimich jeeyucmi da i wiap mimalwadáy. Tsam jáyaṇ ampixiñtam anaít yíp attebet.

¹¹Jesic jemigam tsíy jém Pablo tum amtiy y medio jém attebet Corinto. Inquejáypa jém pixiñtam jém Dios inṇati.

¹²Jém tiempo jém gobernador Galión injacpa jém naxyucmi de Acaya. Jesic jém judíos aṇtuumayaj iga imatsyajpa jém Pablo. Ocmi nanicta jém aṇjagooyicím.

¹³Iñímayyaj jém gobernador:

—Yíp pìxiñ inquejáy jém pixiñtam iga ijìsyajiñ Dios con tungac aṇquímayooyi jém dapic jex juuts aichtam anaṇquímayooyi.

¹⁴Jesic jiytooba idíc Pablo cuando jém Galión iñímáy jém Israelpic pixiñtam:

—MiIsraelpic mipixiñtam, siiga tsam mijpic tájca iwat yíp pìxiñ o siiga accaoyñe, jesic mammatónjáypa tí miñimpa. ¹⁵Pero siiga nada más ininṇacatámpa michfam ininṇadayooyi y jém ininquímayooyi y jém inDios iñiyi, jesic witsactaami iñyaac. Da aṇciipiṇtooba jexpic cosa.

¹⁶Jesic topyajta jém aṇjagooyicím. ¹⁷Cuando putyay, jesic jém griegopic pixiñtam imatsyay jém Sóstenes jém sinagoga injagooyi, icótsyay jém gobernador iwiñjom. Pero jém Galión da iwadáy caso.

Jém Pablo set eybic jém Antioquía

¹⁸Jemum tsíy jém Pablo jáyaṇ tiempo. Ocmi inquímuyaj jém tantiwitam, tigiypa barcojom con jém Priscila y Aquila iga nicyajpa jém naxyucmi de Siria, jém attebet Cencrea. Antes que tigiypa jém barcojom, icujeebáy icobac juuts tum seña iga iccupacpa juuts ijìycámayñe Dios. ¹⁹Ocmi núcyaj jém attebet Efeso. Jemum ichacyaj jém Priscila y Aquila. Jesic tigiy jém sinagoga jém Pablo iga inquejáypa Dios inṇati jém judíos porque jemum aṇtuumanejay.

²⁰Jém pixiñtam icunucsayyaj jém Pablo iga tsíyñ más jáyaṇ tiempo con jeeyaj, pero Pablo da ijíc.

²¹Cuando nictoobam jém Pablo, inquím jém pixiñtam. Iñímáy:

—Wí iga anicpa Jerusalén iga anacnasa jém siṇ jém miñpáppic. Pero eybic miñpa mánámta siiga Dios iwianjam.

Ocmi tigiy barcojom jém attebet Efeso. Nic Cesarea. ²²Cuando núc jém Cesarea, nicím Jerusalén iga idioschiyajpa jém Dios ipixiñtam. Ocmi nic jém attebet Antioquía.

²³Jesic jáy ífi juna jama Antioquía. Ocmi put eybic. Nic yim jeexic cada tumtum tiganjoj juí oyñe wiñfi. Nas icuwífi jém naxyucmi de Galacia y Frigia. Iyoxpátpa jém Dios ipixiñtam iga odoy ichaguñ jém Dios inṇati.

**Jém Apolos najíyóypa
jém attebet Efeso**

²⁴Jesic jeefim tiempo núc jém attebet Efeso tum judío iníyí Apolos. Nay jém attebet Alejandría. Tsam wíap inijíyóy. Tsam iwícutiíyíypa jém Dios inmatí. ²⁵Tsam iwícutiyujcane tí ixunpa tanJatun Dios iga tanwatpa. Inmatpa Dios inmatí con itumpiy íanama. Iwíanquejáypa jém pixiñtam jém tánQmi Jesucristo inquímayooyi. Mex da iwíjodoj jém anquímayooyi, no más íjodoj jém Xiwan inquímayooyi jém acchínoypaap. ²⁶Jém Apolo tigiy jém sinagoga, moj inmat jém Dios inmatí. Je da cñpa. Pero cuando jém Priscila y Aguila imatonyaj, ininicyaj jém Apolo tungac áneyimi. Iwíanquejáypa iga más iwícutiíyíypa jém tanJatun Dios inmadayooyi.

²⁷Jesic cuando nictooba jém Apolo jém naxyucmi de Acaya, jém tantíwítam jém ityajwiip Efeso tsam iyoxpátaypa. Ijáyáy tum toto jém ityajwiip Acaya iga wípictonjain jém Apolo. Jesic ocmi cuando núcneum Acaya jém Apolo, tsam iyoxpát jém icupicneyajwiip Cristo, jém ipictonneyajwiip jém Dios itóyooyi. ²⁸Iwíanquejáypa jém judíos jém pixiñtamanjom iga da wíputne jém inquímayooyi. Tsam wíquejpa jém mígooyi y jeeyaj da wíap inyam. Inquejpa con Dios inmatí jém jayñewiip iga numa Jesús je jém Cristo jém injócyajpápic.

Jém Pablo nicpa Efeso

19 Iganam íf jém Apolo jém attebet Corinto, naspa jém

Pablo jém tiganjojoyaj jém ityajwiip jém cotsiganjom jém naxyucmi de Galacia y Frigia. Ocmi núc Efeso. Jemum ipát algunos jém icupicneyajwiip Cristo. ²Jém Pablo icwác jém pixiñtam. Inímáy:

—¿Que impictonjta jém Dios íAnama cuando moj incupic Cristo?

Nimyajpa:

—Da ammatonjta siiga íf jém Dios íAnama.

³Jesic jém Pablo icwác. Inímáy:

—¿Í iníyimi micchintamta?

Nimyajpa:

—Acchintamta juuts acchínóypa jém Xiwan jém acchínoypaap.

⁴Jém Pablo inímáy:

—Jém Xiwan icchñpa jém pixiñtam juuts tum seña iga icucaguiñ jém íjixi. Inímáytim iga icupiguiñ jém miñpáppic ocmi, je jém Jesucristo.

⁵Jesic yaj imatonyaj, acchinyajtap jém tánQmi Jesús iníyimi. ⁶Jém Pablo ichicunúc cada tumtum icobacyucmi, jesic ipictonjaj jém Dios íAnama. Moj jiyi tungac anmatími. Inmatyajpa jém jixi jém ichiñewiip Dios. ⁷Ítyaj jem con itumpiyyaj como doce jém pixiñtam.

⁸Jáy íti jem jém Pablo tres meses. Tigiy jém sinagoga, da cñpa inmat. Chocoyimi inquejáypa jém pixiñtam jutsap injac Dios yíp naxyucmi. ⁹Pero algunos tsam maloyaj íanama, da icupicyaj. Tsam imalmalnímayyaj jém tánQmi inquímayooyi jém pixiñtam iwiñjom. Jesic jém Pablo ichaganputyaj jeeyaj. Ininic jém icupicnewiip Cristo tum escuela jém Tiranno imíichi. Jemum

accuyujóypa cada jama. ¹⁰Jemum tsíy wisten amíy. Jempigam ítumpiy jém ítayjwiip jém naxyucmi de Asia imatoņyay jém tánŌmi inquímayooyi. Miñyay jém judíos con jém tuņgac pixiñtam jém griegopic. ¹¹Dios ichi ipimi jém Pablo iga wiañ iwat jém mįjtampic milagro. ¹²Siiga jém Pablo ichicpa tum pañuelo o tum puctucu y ocmi cutsadaytap tum mimnewiip iga ichiguñ, jesic pispa. Putpatim jém mal espíritu.

¹³Íf idic jem algunos jém judíos jém nicyajpáppic yim jeexic, jeeyay ítopyajpa jém mal espíritu. Ítopyajtoobatim idic jém Jesucristo inñiyimi. Inñáypa jém imatsnewiip jém mal espíritu:

—Siip mampiimíypa. Jém Jesús inñiyimi jém inmatpáppic jém Pablo, puti de jem.

¹⁴Íf idic tum judío inñiyi Esceva, cobacpic panij. Iniit siete ijaymanic, iwatyajpatim jempic. ¹⁵Jesic tum jama cuando ítopyajpa idic tum mal espíritu, jįypa jém mal espíritu, nimpa:

—Ich ánixpicpa jém Jesús. Ánixpicpatim jém Pablo. Pero mich, čmįjapaap?

¹⁶Ocni jém pxiñ jém iniitwiip jém mal espíritu yóyquimpa, moj añajiyay con jém ítopyajpáppic idic. Como tsam iniit ipimi jém iniitwiip jém mal espíritu, icoñwíy; más wıap que jém sietepic, jém ítopyajpáppic idic. Tsam pimi malwadayajta. Poyyay icusiciyay hasta iticim, coowaneyaj.

¹⁷Ítumpiy jém ítayjwiip jém Efeso ijodónayaj, jém judíos con jém griegopic. Tsam cįnyay. Tsam pimi

icujípyay jém tánŌmi Jesús. ¹⁸Jesic jáyay jém icupicneyajwiip Cristo miñ inmadáyayyay Dios jém itañca itam iwatne pecam. ¹⁹Miñyay jáyay jém nawatyay. Inimiñyay jém ilibroyaj. Miñ inooquetyaj jém pxiñtam iwiñjom. Ocni ijįsyay jutsay ivale jém libro. Ivale cincuenta mil tumiñ de plata. ²⁰Jempam tsam jáyayap jém Dios inmatı, tsam wıquejpa jém tánŌmi ipimi.

²¹Ocni cuando nas ítumpiy yıpyay cosa, jém Pablo ijįs iga nicpa jém naxyucmi de Macedonia y Acaya y ocni hasta Jerusalén. Nimpa:

—Wiñti anicpa Jerusalén, ocni anictoobatim jém attebet Roma.

²²Jesic jém Pablo icutsat jém naxyucmi Macedonia wisten jém icuyoxayajpaap jém Timoteo y Erasto iganam tsíy jém Pablo juna jama jém naxyucmi de Asia.

Cujñayyay jém ítayjwiip Efeso

²³Jeetim tiempo tsam inçayajpa jém Dios inquímayooyi. Jém ñapic icupicpa Cristo pimi ijóyixpa jém wibic añquímayooyi. ²⁴Tum pxiñ inñiyi Demetrio ictsucum jém pleito. Yıp pxiñ tum platero, iwat tum xutu mastic iwatnas. Jém watnas en forma de jém dios inñiyi Diana imastic. Yıp pxiñ con icompañeroyaj icoñwıyyajpa jáyay tumiñ con jém iyoxacuy.

²⁵Aņtuumayajpa con jém tuņgac pxiñtam jém iwatyajpáppic jexpictim yoxacuy, nımayajta:

—Mantıwıtam, michtam inwıjodon iga tsam tawııtpa con yıp yoxacuy. ²⁶Sıp inñixneta y

immatoꞛneta tí nímpa yíp Pablo. Síp inmat iga jém diosyaj, jém watnetawiiip ciimi, da je nunta dios. Tsam icupicyajpa jáyaꞛ pixiñtam, da no más yíim Efeso, pero icupicyajpañim icuwíti jém naxyucmi de Asia. ²⁷ Da wí siiga togoypa jém tanyoxaji. Da wí siiga tsíypa jém tammastic juuts tum cosa da para tí wí. Da wí siiga jém pixiñtam mojpá ijóyixyaj jém tandios Diana, jém siippic ijisyajpa itumpiy jém ityajwiip Asia y icuwíti de yíp naxyucmi.

²⁸ Cuando imatoꞛyaj tí nímpa jém Demetrio, jesic tsam jóyyaj jém pixiñtam. Tsam pimi aꞛweyjajpa. Nímajpa:

—Tsam wí jém tandios Diana, jém tanjístampáppic yíim Efeso.

²⁹ Jesic cujínayyaj jém pixiñtam icuwíti jém atebet. Itumpiy de jeeyaj poyimi nicyaj jém mijpic aꝼi juñ iwatyajpa jém asamblea. Matsyajta jém Gayo y Aristarco jém Pablo icompañeroyaj, Macedoniapic jeeyaj. Nanicyajta poyimi hasta juñ aꝼtuumayajpa jém Efesopic pixiñtam. ³⁰ Jém Pablo tigiyooba idic juñ aꝼtuumaneyaj jém pixiñtam iga icupujpa jém wisten. Pero jém icupicneyajwiip Dios da ijágáy. ³¹ Íttim jem jutén jém Pablo iamigoyaj, jém Asiapic anjagooyiyaj. Jeeyaj icutsadáy aꝼmañi jém Pablo iga odoy tigíyíñ jém mijpic aꝼi.

³² Tsam jáyaꝼ jém pixiñtam aꝼtuumaneyaj, tsam pimi aꝼweyjajpa. Tum nímpa tum cosa y tungac nímpa tungac cosa. Porque tsam cujínayyaj jém pixiñtam. Casi da i ijodonj tíiga aꝼtuumaneyaj.

³³ Jesic algunos jém ityajwiip jem

inmadayyaj jém Alejandro tíiga aꝼtuumaneyaj jém pixiñtam. Jesic jém judíos iyácteñ ininic jém Alejandro jém pixiñtam iwiñjom iga ijyáyíñ. Jesic jém Alejandro iwat seña con ici iga odoy jiyajíñ jém pixiñtam porque icupujtooba jém wisten pixiñ. ³⁴ Pero cuando icutiyyiyaj jém pixiñtam iga judío jém Alejandro, jesic tsam pimi aꝼweyjajpa dos hora. Nímajpa: —Tsam wí tandios, Diana, jém tanjístampáppic yíim Efeso.

³⁵ Jesic ocmi jém secretario injiyjac jém pixiñtam. Cuando cuyaj iga aꝼweyjajpa, inímáy: —MiEfesopic mipixiñtam, da i ni tum pixiñ jém dápic ijodonj iga taichtam taccámnetá iga tanwattámpa cuenta jém tammastic juñ íf jém tandios Diana y juñ íf jém iwatnas jém actiñnewiip sinyuemi. ³⁶ Da i wiap iním iga migooyi. Jesic odoy jiytaami más. Odoy tí wattaami siiga da wiñti inñispa tí inwatpa. ³⁷ Porque yíp wisten pixiñ da icujiyne jém indios Diana ni da imalnímáyne. ³⁸ Yíp Demetrio con icompañeroyaj siiga i ijóyixpa, wiap iquejajwadáy jém juezciim. Jeeyucmi íf jém juez iga iciipinpa jém pleito. Jemum wiap iwítsacyaj. ³⁹ Siiga algo más inñuntámpa, wí iga ininjóctámpa hasta cuando tanjuumawattámpa jém tananjagooyi. ⁴⁰ Siip wiap i taquejajwadáypa iga tarebelde porque tanjuumata sin anjagooyi. Da tí wiap tannim siiga tacwáctamtap tíiga íf yíp bulla.

⁴¹ Yaj nímim jempic, jém secretario icuyaj jém junta.

**Nicpa jém Pablo jém
Macedonia y Grecia**

20 Cuando cuyaj jém bulla, jesic jém Pablo inwejay jém icupicneyajwiip Cristo iga ichiiba jixi. Ocmi inquímaj, nanuusajta. Nic jém Pablo jém naxyucmi de Macedonia. ² Juť quej nicpa, inquejay jém tantiwitam tí wıap iwatyaj. Inmadayyaj tsam jáyan aḡmaťi. Cuando yaj icuwiťxet jém Macedonia, núc jém naxyucmi de Grecia. ³ Jemum tsý tres meses. Cuando tigiyťooba idíc jém barcojom iga nicpa jém Siria, imaton iga algunos jém judíos imétsyajpa jutsap iccaayaj. Jeeyucmi jém Pablo ijis iga setpa puymi. Nasp eybic jém naxyucmi de Macedonia. ⁴ Jesic jutén jém iamigoyaj itúnjıyyaj jém Pablo. Nicyaj jém Sópater, tum Bereapic pıxiñ, y Aristarco. Nicyajťim tum Tesalónicapic pıxiñ inıyi Segundo, tum Derbepic pıxiñ inıyi Gayo y Timoteo. Nicyajťim jém Tíquico y Trófimo, tsucumneyaj jém naxyucmi de Asia. ⁵ Yıpyaj tantiwitam anjagóy miñıcyaj, jemıgam ananjócyajpa jém attebet Troas. ⁶ Cuando nas jém sıñ iga cúttap jém caxťánañi sin levadura, jesic atsucumta jém Filipos, atigiyťa barcojom. Awıťta barcojom cinco día hasta anúcta jém attebet Troas. Jemıgam anactsý jém ánamigoyaj jém tsucumneyajwiip wiñťi. Jemum atsýťa siete día.

**Jém Pablo nicpa joyi
jém attebet Troas**

⁷ Jém wiñťipic jama de jém semana, aḡtuumayaj jém

icupicneyajwiip Cristo iga iwécyajpa jém caxťánañi. Jém Pablo moj accuyujoooyi. Nictooba Pablo jém tungac jama jeeyucmi accuyujóypa hasta cugaptsu. ⁸ Aḡtuumaneta tum cuarto jém yucmıpic piso. Jemum tsocpa jáyan jucti. ⁹ Itťim jem tum woñjaychıxi inıyi Eutico. Coñ jém ventana yucmi. Como jém Pablo tsam jáyan hora inmat jém Dios inmaťi, imats moñi jém jaychıxi, jesic jooban nas jém tucuten piso iyucmi. Cuando pıḡta, caaneum. ¹⁰ Jesic quet jém Pablo, icunúc noco, innuusáy. Inımáj jém itıyajwiip jem: —Odooy cıḡtaami. Da caane, vivo. ¹¹ Ocmi Pablo quım eybic jém yucmıpic piso. Iwéc jém caxťánañi, wıcyaj. Jesic seguido moj inmat jém Dios inmaťi hasta cuquej. Ocmi nic jém Pablo. ¹² Jesic nanicta jém jaychıxi itıccıim, vivojam. Agui maymayyaj iga da ca.

Nicpa Pablo jém attebet Mileto

¹³ Aichťam anjagóypa anicta barcojom hasta jém attebet Asón iga jemıgam ampıcnaspa jém Pablo. Jempıgam aḡwatneta trato. Nic jém Pablo puymi. ¹⁴ Cuando anactsýťamta jém attebet Asón, tigiy barcojom jém Pablo, awaganicta jém attebet Mitilene. ¹⁵ Jesic aputta de jem, jém tungac jama anumnas jém attebet Quío. Tungagam jama anúcta jém attebet Samos. Amoḡta noco jém attebet Trogilio. Tungac más jama anúcta jém attebet Mileto. ¹⁶ Jém Pablo ijis iga anumnastampa jém attebet Efeso iga da ajáyťampa jém naxyucmi de Asia. Agui jıcsıy

nictooba Jerusalén iga ictsíyíñ jém siñ de pentecostés siiga wiap.

Jém Pablo ichi jixi jém anjagooyiyaj

¹⁷ Cuando anúcta jém Mileto, jém Pablo inwejáy jém Dios ipixiñtam injagooyiyaj jém ifyajwiip Efeso.

¹⁸ Cuando núcneyaj, iñímáy jém Pablo:

—Michám inñjodon̄ tí anwatne dende jém wiñtipic jama cuando anúc jém naxyucmi de Asia. ¹⁹Ítumpiy tiempo cuando manwaganait̄ta mimichám, tsam ancyoxa jém tánQmi. Da anacuj̄ptā anyaac. Tsam p̄imi anyácne. Tsam acut̄tstā porque jém judíos ijisyaj jutsap accaayaj. ²⁰Pero ich da antsac iga manañmadáy ítumpiy jém Dios inmāti jém tsampic miyoxpátpa. Manañquejáy jūt an̄tuumaneyaj jáyañ jém pixiñtam y manañquejáȳtim iñtic̄iim.

²¹ Anañmadáy jém judíos con jém dápic je judíos iga icucacyajiñ ijixi jém Dios iwiñjom y iga icupicyajiñ jém tánQmi Jesucristo. ²² Siip anicpa Jerusalén. Ap̄imíy jém Dios iAnama. Da anjodon̄ tí acnascat̄ap jem̄ic. ²³ No más cada tigan̄joj jūt ich anicpa, jém Dios iAnama acjodón̄ap iga ayaachwattap, apaj̄tap. ²⁴ Pero da anwadáypa caso. Ni dátim an̄c̄iñpa iga accaat̄ap. Da tí cuwatcuy jém amvida. Ich amaymay siiga anaccupacpa jém anyoxacuy y siiga anwatpa juuts ap̄imíy jém tánQmi Jesús iga anañmatpa jém wibic anmāti iga Dios tsam tatoypa.

²⁵ Siip ich anw̄ijodon̄ iga ni tum de mimichám, jém

manañmadayñewiip jém Dios inmāti, da eybic ánixtámpa.

²⁶ Jeeyucmi siip tsam

mannímaytooba iga ich da anai la culpa de ninguno de mimichám siiga mitogoypa y da impictson̄pa jém vida jém dápic cuyajpa.

²⁷ Manw̄ianmadáy ítumpiy jém Dios inmāti. Da tí anañécne ni uxaj. ²⁸ Siip nawattamtaji cuenta mimichám iñyaac. Minjagooyítam jém miccámnewiip Dios iAnama, wattaami cuenta jém Dios ipixiñtam jém ijuyñewiip jém tánQmi Cristo con iñiipiñ. ²⁹ Ich anjodon̄ iga cuando anicneum, miñyajpa jém migoyyajpaap iga ictogoypa jém Dios ipixiñtam juuts tum lobo tsam malo iccaaba jém borrego. ³⁰ Mimichám̄an̄jom tsucumpa algunos jém migoypaap. Mojpa imigóyáy jém icupicnewiip Cristo iga ictsacpa jém Dios inmāti iga iccupiguiñ jém migooyi. ³¹ Jesic nawattamtaji cuenta. Jīstaami iga tres am̄tiy oy manañmadáy jém Dios inmāti tsuuc̄iim y siñi. P̄imi manañquím hasta awejpa iga odoy i mictsaguiñ jém Dios inmāti.

³² Siip man̄ciij̄uñcotpa jém tan̄jat̄uñ Dios icij̄jom iga miwattámiñ cuenta y iga miyoxpátpa con jém wibic anmāti iga tsam tatoypa Dios. Jém anmāti tsam miyoxpátpa iga más inw̄icupicpa. Miyoxpátpa iga impictson̄pa jém herencia con ítumpiy jém cuáyñewiip ianama. ³³ Da man̄cusúníyáy jém iñtumiñ, plata y oro, ni jém impuct̄ucu.

³⁴ Michám inw̄ijodon̄ iga ich ayoxa an̄ciimi iga odoy tí atogóyáyiñ ni ich ni jém anwaganait̄wiip.

³⁵Siempre manañquejayñeta iga wi iga tayoxap iga tanyoxpátpa jém yaachayajpáppic. Jištaami tí nímpa jém tánOmi Jesús cuando ním: “Más tamaymay iga tachióypa que iga tachiítap.”

³⁶Cuando yaj nímí jempic, jém Pablo costēñeactij, moj iñwejpát Dios con itumpiy jém ityajwiip jem. ³⁷Agui weyjajpa, itumpiy nanuusyajta, inñacatsútsyaj jém Pablo. ³⁸Tsam anyácneyaj jém pixiñtam porque nímpa jém Pablo iga da nunca iixyajpa eybic. Ocmi nic ijagañtsacyaj hasta tigiy barcojom.

Jém Pablo nicpa Jerusalén

21 Cuando antsacta jém tantiwitam, atigiyta jém barcojom. Anumnic hasta jém attebet Cos. Jém tungac jama anicta jém attebet Rodas y de jem anicta jém attebet Pátara. ²Jém attebet Pátara ampátta tum barco jém nicpáppic Fenicia. Jemum atigiyta, anicta. ³Jesic anastámum, ánix jém isla de Chipre. Tsíy tum lado aññaymi. Anumnic hasta jém naxyucmi de Siria. Jemum anúc porque jém barco ichacnaspá jém ichimi jém puerto de Tiro. ⁴Jemum ampátta jém icupicneyajwiip Cristo. Atsíyta con jeeyaj siete día. Dios iAnama icjodóna jém icupicneyajwiip Cristo tí inñascaaba jém Pablo. Jeeyucmi nímayta jém Pablo iga odoy niguiñ Jerusalén. ⁵Pero cuando núc jém siete día, mojum aniquíam. Itumpiy jém icupicneyajwiip Cristo con iyomtám y con ichixtam nic ajagañtsacta añsícmi de jém attebet,

jém lamar añnaca acosteña, moj anañwejpátta Dios. ⁶Ocmi anañquímtamta, ananuustamta. Aichfam aquímta barcojom. Jeeyaj setyajum iticmi.

⁷Atsucumta jém Tiro, anicta hasta jém attebet Tolemaida. Jemum atsac jém barco, moj aniquíam puymi. Jesic jém attebet Tolemaida andioschi jém tantiwitam, atsíyta con jeeyaj tum jama. ⁸Jesic icuquejama atsucumta aichfam con jém Pablo, anicta jém attebet Cesarea. Anúcta jém Felipe iticciim. Je tsam wiap inmadáy Dios inmatí jém pixiñtam jém dápicnam icupicne. Yíp pixiñ tum de jém siete jém iyoxpátpáppic jém apóstolyaj. Jemum atsíyta iticciim. ⁹Jém Felipe iniit cuatro iyommanic da jaayiyñeyaj. Dios iyoxpátta iga inmatyajpa tí miñpa. ¹⁰Watña jama aítta jem cuando núc tum Judeapic pixiñ inñiyi Agabo, tum profeta, wiaptim inmat tí miñpa. ¹¹Miñ aámta. Ipiğáy jém Pablo imijpactsencuy, jém icinturón. Natsenta iyaac jém pixiñ. Ichen ici y ipuy. Jesic nímpa jém Agabo: —Nímpa jém Dios iAnama iga jém attebet Jerusalén jém judíos ichénaypa así yíp cinturón iomi, ocmi ciijuñcotta jém tungac pixiñtam icijom.

¹²Cuando ammatonja tí nímpa jém pixiñ, jesic aichfam con jém tantiwitam jém ityajwiip Cesarea anjyactsíyta jém Pablo iga odoy niguiñ Jerusalén. ¹³Pero jém Pablo anímayta:

—¿Tiiga miwejtampa, tiiga antsiganjácwattampa? Ich anjícpa iga atsentap y da solamente iga

atsentap, anjícpařim iga accaatap Jerusalén jém tánOmi Jesucristo icuyucmi.

¹⁴Como dá amatoŋ jém Pablo ři annímayřa, jesic antsacta. Annímayřa iga wati juuts ixunpa jém tánOmi.

¹⁵Cuando cupac jém jama iga aifřa jém Cesarea, aŋwřsacta jém antraste, atsucumta. Anicta jém atbet Jerusalén. ¹⁶Aŋwagananicta algunos jém Cesareapic pixiřtam jém icupicneyajwiip Cristo. Ininicyajřim tum Chiprepic pixiř iřiřyi Mnasón. Yřp pixiř tsam wiřigam icupicne Cristo. Jém Mnasón iniřif řic Jerusalén. Jemum anucta, acwřctamta, y acmonřtamta.

Jém Pablo nicpa ijooyáy jém Jacobo

¹⁷Cuando anucta Jerusalén, jém tantřwitam tsam awřpřctsonřta, agui maymayyay. ¹⁸Jesic icuquejama Pablo nic ijooyáy jém Jacobo. Awagananictařim aichřtam. Aŋtuumařneyajřim jem řtumpřy jém wiřayřtam jém inřacyajpáppic jém Dios ipixiřtam. ¹⁹Jém Pablo idioschi. Ocmi inřmadáy parejo jém aŋtuumařneyajwiip jutsap iwřwadáy Dios jém tuřgac pixiřtam jém řapic je de Israel cuando oy inřmadáy jém wibic aŋmaři.

²⁰Cuando imatoŋyay, tsam icujřpyaj Dios. Nřmayřa jém Pablo:

—Mantřwi, řxi iga tsam jáyaŋ miles de jém judřos icupicneyaj jém Jesucristo inřquřmayooyi. řtumpřy de jeeyaj nřmyajpa iga dá wř iga tantsapca jém Mořsés inřquřmayooyi. ²¹Iřodóŋařneyaj iga mich inřquejáy řtumpřy jém judřos, jém juumřpic nicneyaj,

iga odoy icupiguřiř jém Mořsés inřquřmayooyi. Inřquejáyřim iga odoy iwadáyiř imanictam jém marca de circuncisióŋ y odoy iwadiř jém wiřicpic costumbre.

²²¿Jesic ři wřap taŋwatta?

Porque cuando imatoŋyay jém pixiřtam iga miřucne, tienes que micutuumařayajpa. ²³Jesic wati juuts řiip mannřmáy. ři yřim con aichřtam cuatro pixiř. Jeeyaj iccupactooaba juuts iřřycámáy Dios.

²⁴Wagananřci, wagachiřtaami juuts nřmpa jém tařcostumbre, yojóyaayř jutsaŋ iwatpa gasto. Jesic ocmi wřap iřpyay icobac. Jempřgam icutiřyayajpa řtumpřy jém tantřwitam iga inřwiřpařim jém Mořsés inřquřmayooyi y iga inřcupicpařim mex mich. ²⁵Pero jém tuřgac pixiřtam, jém řapic de Israel, jém icupicneyajwiip Cristo, anřayayře iga odoy iwadiř jém Israelpic costumbre. No más annřmáy iga odoy icúdiř jém animat imayři jém accaatawřiip jém watnas iwřŋřom ni odoy icúdiř jém nřřpiř ni odoy icúdiř jém animatyaj jém pencanewřiip y odoy pejooyi.

Matřta Pablo jém mařticřom

²⁶Jesic jém Pablo ininř jém cuatro pixiřtam. Icuquejama wagaacchiřyajtř con jeeyaj juuts nřm jém Israelpic costumbre. Ocmi řiřyay jém mřřpic mařticřom iga queřiř iga cupacpa iwatyaj jém costumbre y juchř ichacyajpa jém ofrenda cada tumřtum de jeeyaj.

²⁷Cuando cuyajtooba jém siete día, algunos jém judřos, jém miřřneyajwiip de Asia, řixyay jém Pablo jém mřřpic mařticřom. Jesic

iccujñayaj ífumpiy jém pixiñtam jém ífaywiip jem. Imatsyaj jém Pablo. ²⁸Pimi anweyjajpa.

Nimyajpa:

—MiIsraelpic mipixiñtam, ayoxpaati. Yíbam jém pixiñ jém inquejaypáppic jém pixiñtam juñinquej contra tannación, contra jém tananquímayooyi y contra jém tammastic. Tungac más tánca iwat. Inimiñ tammasticjom jém tungac pixiñtam jém griegoyaj. Inimiñ jém táncaiywiip jém wibic tammasticjom.

²⁹Nimpa jempic porque iixyaj iga jém Pablo iwaganasiiba Jerusalén tum Efesopic pixiñ iniyi Trófimo. Jeeyucmi jeeyaj injampa iga inioy jém mijpic masticjom. Pero da inioy.

³⁰Jesic kujñayaj ífumpiy jém pixiñtam icuwíti jém attebet. Miñyaj poyimi. Icutuumacayaj jém Pablo. Imatsyaj. Ijicputyaj jém masticjom. Jicsciy injpajaj jém mastic. ³¹Íccaayajpa idic jém Pablo. Cuando acjodónata jém coronel iga tsam kujñayaj jém pixiñtam icuwíti jém Jerusalén, ³²jesic jeeti rato jém coronel intuumawat isoldado cada grupo con icapitán. Nicyaj poyimi hasta juí íf jém pixiñtam. Cuando iixyaj iga núcyaj jém coronel con isoldado, jesic ichacyaj iga icótspa jém Pablo.

³³Jesic jém coronel icunúc. Matsta jém Pablo. Ipiimíy jém isoldado iga ichéniñ con wisten cadena. Ocmi icwácpa, nimpa:

—¿Mich, miñapaap? ¿Tí inwatne?

³⁴Pero jém pixiñtam pimi jiyajpa. Tum nimpa tum cosa y tungac nimpa tungac cosa. Jém coronel da wiap icutiíyí tí

nimyajpa porque tsam íf bulla. Jesic ipiimíy jém isoldado iga ininiguíñ jém cuartel. ³⁵Cuando núcyaj juí químyajpa jém cuartel, jém soldado icópne ininicyaj jém Pablo porque agui imalwadayyajtooba jém pixiñtam. ³⁶Porque ífumpiy jém pixiñtam jém miñyajpáppic ítuuñançim pimi jiyajpa, nimyajpa iga accaataiñ jém Pablo.

Nacupujtap jém Pablo jém pixiñtam iwiñjom

³⁷Iganam cottap Pablo jém cuartel inímáy jém coronel: —Mannímaytooba idic tum anmatí.

Jesic jém coronel inímáy: —¿Que mich wiap ininimat jém griegopic anmatí? ³⁸¿Jesic mich da je jém miEgiptopic mipixiñ, jém dapicnam peca ictsucum tum rebelión, jém ininicnewiip jém titsinaxyucmi jém cuatro mil pixiñtam, jém accaoyajpaap?

³⁹Jesic Pablo inímáy:

—Ich ajudío. Anay jém attebet Tarso. Ich apertenece jém más mijpic attebet de jém naxyucmi de Cilicia. Manwágáypa tum favor. Ajígaayi iga ananmadáypa yíj pixiñtam.

⁴⁰Ocmi jém coronel ijígáy iga inmadáypa jém pixiñtam. Teñchucum jém Pablo jém escalerayucmi. Iwat seña con ici iga odoy i jýiñ. Jesic cuando dam i jýya, moj jýyi jém Pablo jém hebreopic anmatími. Inímáy:

22 —Mantiwitam, miñjagooyítam, amatónaayi iga anacupujtap.

²Cuando imatoŋyaj iga jiyŋa jém Pablo jém hebreopic aŋmatími, jesic mástím da jiyŋaj. Inínmáy jém Pablo:

³—Ich ajudío. Anay jém attebet Tarso jém naxyucmi de Cilicia. Amíja yíim Jerusalén. Ich accuyuj jém maestro Gamaliel. Aŋcuyujca jém wiñcpcic tanaŋquímayooyi jém tachiiñewiip jém wiñcpcic tanjatunwewetam. Tsam aŋwadáy caso iga aŋcuyoxap Dios con itumpiy ánanama juutsím mimichám iŋwattámpa yíp jama. ⁴Ich pecam tsam anacpoy jém icupicneyajwiip yíp jomipic aŋquímayooyi hasta anaccaaba. Ammatspa pìxiñ y yomtam, aŋcotpa cárcel. ⁵Jém cobacpic pañij aŋjagooyi con itumpiy jém tanaŋjagooyiyaj tsíyyaj juuts testigo porque achiiyaj jém toto iga wiap amméts jém icupicneyajwiip yíp jomipic aŋquímayooyi. Anic jém attebet Damasco iga ammatspa jém pìxiñtam y anamiñpa preso Jerusalén iga chiifap castigo.

Pablo iŋmatpa jutsa micupic Cristo

(Hch. 9:1-19; 26:12-18)

⁶Pero cuando aniqui tunjom, como cugapjama, anúctooba jém attebet Damasco, tsam pìmi tsoepa tum jucti sinyucmi. Acuyicquej juť aniqui. ⁷Acutiŋ naxyucmi. Amatoŋ tum jiyi. Anímáy: “¿Saulo, Saulo, íiga anacpoypa?” ⁸Ocmi anacwác. Annímáy: “¿Mijapaap, mánQomi?” Jesic anímáy: “Ich aJesús de Nazaret jém michpic síp inicpoy.” ⁹Jém ityajwiip con aich iixyaj jém jucti. Tsam pìmi cinyaj. Imatoŋyaj jém jiyi, pero da icutiixiyŋaj íi

anímáy. ¹⁰Jesic ich annímáy: “¿MánQomi, íi wiap aŋwat?” Jém tánQomi anímáy: “Tsucumi, niçi Damasco, jemum miñímayfap itumpiy cosa íítam ansunpa iga iŋwatpa.” ¹¹Como jém jucti ichoca acáchfiwat, ajicteñyay jém aŋwagananicpáppic hasta anúcta Damasco.

¹²Jemum íi idíc tum pìxiñ iníyi Ananías. Tum wiðic pìxiñ. Iwatpa itumpiy juuts nimpa jém Moisés iŋquímayooyi. Itumpiy jém judíos, jém ityajwiip Damasco, tsam iwixiyajpa. ¹³Jém Ananías miñ aám. Acunúc, anímáy: “Mantiwi Saulo, ámquiimi.” Jesic anámquímáy, jeetí rato wiawum mu ánixixóy. ¹⁴Jesic jém Ananías anímáy: “Jém tanJatuŋ Dios jém icupicnewiip jém wiñcpcic tantúmmitam, micupiŋ iga iníjodóŋaiñ íi ixunpa Dios iga iŋwatpa. Micupiŋ iga iníxpa jém Cristo, iga immatoŋpa íi miñímáypa. ¹⁵Michíypa juuts testigo para je iga iniŋmadáypa itumpiy jém pìxiñtam icuwíti yíp naxyucmi íi iníxñe y íi immatoŋne. ¹⁶Siip odoŋ aŋjooci, tsucumi, chiñi. Aŋwejpaati tanJatuŋ Dios jém Cristo iníyimi iga miccáyáypa jém iníñañca.”

Jém Pablo iŋmat jutsa micutsatta jém tungac pìxiñfamanjom

¹⁷Cuando aset Jerusalén atigiy jém miŋpic maŋticjom iga anaŋwejpátpa Dios. Jemum ánix tum poñ. ¹⁸Ánix jém tánQomi. Anímáy: “Jicsiy puti yíp Jerusalén porque yípyaj pìxiñtam da iwadáypa caso iga iniŋmadáypa ich anaŋmafi.” ¹⁹Ocmi annímáy:

“MánQmi, jeeyaj ijodoŋyaj iga jáy amméts jém pixiñtam jém micupicnewiip cada sinagoga. Ammatsyajpa iga aŋcotpa cárceel. Tsam aŋcótŋyaj. ²⁰ Cuando accaata jém Esteban, jém iŋmatpáppic mich iniŋmafi, ich asiibafim. Ich aif de acuerdo iga accaata. Aŋwadáy cuenta jém iyooŋiyaj jém iccaaneyajwiip.” ²¹ Pero jém tánQmi anímáy: “Nicsim. Maŋcutsatpa juumi iga iniŋmadáypa ich anaŋmafi jém tuŋgac pixiñtam jém ďapic je de Israel.”

Jém Pablo íf jém coronel iciijom

²² Cuando imatoŋyaj iga nimpa jém Pablo iga iŋmadáypa Dios iŋmafi jém juumipic pixiñtam, pimi jóyŋeyaj jém Israelpic pixiñtam. Moj jiyiyaj pimi. Niŋmyajpa: —Accaatáin yíp pxiñ. Da wí iga tsíypa vivo.

²³ Tsam pimi aŋweyjajpa. Ítopyaj iyooŋi, ipatsquetyaj naxyucmi. Ipatsquímuyajpa pótpót. ²⁴ Jeeyucmi jém coronel ipiimíy jém isoldado iga ininicyajiñ jém cuartel. Ipiimíy iga cótstáin jém Pablo iga iŋmađiñ tiiga iccujíñáy jém pixiñtam y tiiga tsam jiyajpa jeeyaj acontra de jém Pablo. ²⁵ Pero cuando tsenneta jém Pablo iga cótsta, inímáy jém capitán jém ítwiip jem:

—¿Que mich wiap iŋcótŋ tum Romapic pxiñ jém ďapic i iciipiŋne?

²⁶ Cuando imatoŋ jém capitán, nic inímáy jém coronel:

—Cuidado iga immalwadáypa yíp pxiñ porque Romapic.

²⁷ Jesic miñ jém coronel, icwác jém Pablo:

—¿Que numa mich miRomapic mipixiñ?

Nimpa jém Pablo:

—Numa, ich ajeam.

²⁸ Jém coronel inímáy:

—Ich tsam jáyaŋ tumiñ anyoj iga atsíy juuts aRomapic apixiñ.

Jesic nimpa jém Pablo:

—Pero ich aRomapic porque anay jém Roma inaxyucmi.

²⁹ Jesic jeeti rato jém icótsyajpáppic idic ichacyaj. Jém coronel tsam ciŋpatim iga ichenne cuando ijodóŋa iga Romapic pxiñ.

Aŋwejayta Pablo jém aŋjagooyiyaj iwiñjom, jém Sanhedrín

³⁰ Jesic icuquejama jém coronel ijodóŋatooba tiiga jém judíos iquejajwadáypa jém Pablo. Iccáyáy jém cadena. Jesic iŋtuumawat ítumpiy jém cobapic panij con jém Sanhedrín. Jesic nanicta jém Pablo jém aŋjagooyiyaj iwiñjom.

23 Jesic jém Pablo iámmats jém Sanhedrín, inímáy:

—Mantiwitam, ich anjodŋ iga hasta siip aŋwatne juuts ixunpa Dios. Da tí aŋciŋpa jém Dios iwiñjom.

² Jesic jém Ananías, jém cobapic panij, ipiimíy tum policia, jém ítwiip nocojom jut íf jém Pablo, iga ítojáyin ijip. ³ Jesic jém Pablo inímáy jém panij:

—Dios micótŋpa mimich. Mich tsam minimigóyaytap. Jemum micoñ iga aŋciŋpa juuts nimpa jém aŋquímayooyi, ¿jesic tiiga iŋwatpa acontra jém aŋquímayooyi iga aŋcótŋ?

⁴ Jesic jém ífyajwiip jem inímáy jém Pablo:

—Odoy malnímaayi jém cōbacpic panij jém iccámnewiip Dios.

⁵Jém Pablo iñímáy:

—Mantiwítam, da anjodon siiga cōbacpic panij. Nímpa jém Dios inmatí juť jayñeta: “Odoy malnímaayi jém ininjagooyi jém injacpáppic jém pixiñtam.”

⁶Ocmi jém Pablo icutiíyíy iga wísten partido íť jem juť aņtuumaneyaj. Íť jém fariseoyaj, íťtim jém saduceoyaj. Jesic pimi jiyja iga imatoņyajiñ. Nímpa:

—Mantiwítam, ich afariseopic apixiñ. Jém anjatun con anjatunwewe fariseopic pxiñ. Siip anquejajwadayta porque aņcupicpa iga pispa jém caaneyajwiip.

⁷Cuando yaj nimi jém Pablo, moj aņajiyaj jém fariseoyaj con jém saduceoyaj. Nawécayjta jém pixiñtam juť aņtuumaneyaj.

⁸Porque jém saduceoyaj nímajpa iga da pispa jém caaneyajwiip. Datim icupicyajpa iga íť jém siņyucmi pixiñtam ni jém espíritu, pero jém fariseoyaj icupicyajpa iga íť íťumpiy jexpic cosa. ⁹Jesic tsam pimi jiyajpa íťumpiy jém pixiñtam. Jesic teñchucum algunos jém accuyujoypaap de jém fariseopic aņquímayooyi. Nímpa:

—Yíp pxiñ da tí mal iwatne. Wiip ijyáy tum siņyucmipic pxiñ o tum espíritu. Da tanićtampa acontra de Dios.

¹⁰Jesic tsam pimi aņajajpa. Jém coronel cįpa iga ichichañsajajpa jém Pablo. Jeeyucmi ipiimíy jém isoldado iga íťopyajpa pimimi jém Pablo jém pixiñtam iciijom y iga ininigiñ eybic jém cuartel.

¹¹Jeefim tsuu jém tánOmi iwiñquejáy jém Pablo jém cuartel. Iñímáy:

—MiPablo, camamwati iñanama. Juuts inijmat ich anaņmatí yíp Jerusalén tienes que inijmatpaťim jém atebet Roma.

Ijisyajpa jutsap iccaayaj jém Pablo

¹²Jesic icuquejama algunos jém judíos iwatyajpa de acuerdo iga iccaayajpa jém Pablo. Nímajpa iga: “Da tawicpa ni da tanicpa hasta que tanaccaaba jém Pablo.” ¹³Íťyaj más de cuarenta pixiñtam jém nímnejajwiip jempic. ¹⁴Ocmi nic íámyaj jém panij aņjagooyi con jém wiđaytam de Israel. Iñímajyay:

—Aichtam animneta iga siip da awicpa ni da anicpa hasta anaccaaba jém Pablo. ¹⁵Siip mimichtam con jém Sanhedrín wágaytaami jém coronel iga jōymi inimiñiñ michtam iņwiñjom. Nímanťaayaji iga chocoyi iņciipįpa. Jesic aichtam aítťampa listo iga anaņteñťampa tunjom antes que núcpa juť miíťta.

¹⁶Pero jém Pablo iyomťiwi imanic ijodōņa iga aņteñťap tunjom. Jesic nic inmadáy iachi jém cuartel. ¹⁷Ocmi jém Pablo iņwejáy jém capitán jém iwatnewiip cuenta. Iñímáy:

—Nanići yíp jaychixi juť íť jém coronel. Iniít tum aņmatí iga iñímáypa.

¹⁸Jesic jém capitán ininic jém jaychixi juť íť jém coronel, iñímáy:

—Jém preso, jém Pablo, aņwejáy. Iwác iga manamíñáyíñ yíp jaychixi. Iniít tum aņmatí iga miñímáypa.

¹⁹ Jesic jém coronel imatsáy ici jém jaychixi. Ininic aparte. Iñímáy: —¿Tí annímáytooba?

²⁰ Jém jaychixi iñímáy: —Jém judíos ityaj de acuerdo iga joymi miwágayyajpa iga ininiguñ jém Pablo jém Israelpic anjagooyi iwiñjom. Nímanjaayap iga iciipinpa chocoyi. ²¹ Pero odoy cupici porque más de cuarenta jém pixiñtam injeñyajpa tunjom. Iwatyaj acuerdo iga da wícpa ni da nícpa hasta iccaaba jém Pablo. Siip ityajum listo. Injócneyaj iga injutsonpa.

²² Ocmi jém coronel inquím jém jaychixi, iñímáy: —Odoy i anmadaayi juuts annímáyne.

Cutsatta jém Pablo jém gobradorciim

²³ Jém coronel injejáy wisten jém icapítan. Ipiimíy iga nawítsacyajtaiñ dosciento soldado jém nicyajpáppic puymi y setenta jém nicyajpáppic cawajyucmi y dosciento soldado jém ininicyajpáppic jém lanza. Iñímáy iga nicyajjiñ jém atebet Cesarea tsuuciim a las nueve.

²⁴ Ipiimíy iga imétsayyajiñ cawaj iga icquímcaaba jém Pablo y iga iwíwadiñ cuenta hasta que núcpa juú it jém gobernador Félix. ²⁵ Jém coronel ijay tum toto, icutsadáy jém gobernador Félix con jém isoldado. Nimpa jém toto:

²⁶ “Ich aClaudio Lisias. MiFélix, tsam wibic migobrador. Siip mandioschiiba. ²⁷ Jém judíos imatsne idíc yíp pixiñ. Iccaatooba idíc. Anjucupuj con jém ansoldado.

Cuando anjodóna iga Romapic pixiñ, ²⁸ anjodónatooba tiiga iquejajwadayyajpa, jesic ananic juú anjuumaneyaj jém Israelpic anjagooyiyaj. ²⁹ Ampát tiiga iquejajwadayyaj. Iwat algo en contra jém Israelpic anquímayooyi. Pero da inii ífánca iga iccaayajpa ni dátim wí iga ipajyajpa. ³⁰ Anjodóna iga jém judíos ijisyajpa iga iccaayajpa. Jeeyucmi mancutsadáypa yíp pixiñ. Ampimíyitim jém iquejajwadayñewiip iga nicyajjiñ mich inwiñjom. Jesánam manjáyáy.”

³¹ Jesic jém soldado iwatyaj juuts ipimíy jém coronel. Tsuuciim ininicyaj jém Pablo hasta jém atebet Antípatris. ³² Jesic icuquejama jém soldado, jém nicneyajwiip puymi, setyaj eybic jém icuartel. Jém tungac soldado, jém nicneyajwiip cawajyucmi, seguido iwagananicayajpa jém Pablo. ³³ Cuando núcyaj jém atebet Cesarea, iciijunodáy jém toto jém gobernador iciijom. Ininicyaj jém Pablo jém gobernador iwiñjom. ³⁴ Cuando yaj imay jém toto jém gobernador, icwác jém Pablo iga juúpic pixiñ. Cuando ijodóna iga nay jém naxyucmi de Cilicia, ³⁵ jesic iñímáy:

—Mammatónjáypa jém íñasunto cuando miñpa jém miquejajwadayñewiip.

Jesic jém gobernador ipimíy iga nanictaiñ jém palacio de Herodes iga wattaiñ cuenta.

Nacupujta Pablo jém gobernador Félix iwiñjom

24 Ocmi cuando nasne cinco día, núcyaj Cesarea jém

cobacpic pañij jém Ananías con algunos jém Israelpic anjagooyiyaj. Inimiñyajtım tım abogado inñiyi Tértulo. Miñ iquejajwadayyaj jém Pablo jém gobernador iwiñjom.

²Cuando namiñta jém Pablo, jesic jém Tértulo moj iquejajwadáy. Nímayta jém gobernador:

—Iyucuipdios, migobernador, iga tsam tawiñta. Da i jém pleito. Tsam wiap ininjac yıp naxyucmi porque tsam mijixiý. ³Icuwiñi yıp naxyucmi anjodonjam iga mich tsam anwiwadayta. ⁴Pero iga odoy manactogóyayıñ jáyañ tiempo, mançunucsáypa iga amatónaayi tım rato ti mannímáypa. ⁵Yıp pixiñ tsam pimi malo, juť quej ictsucum iga iccujíñáypa jém judíos iga nawécyajtap. Yıp pixiñ jém cobacpic jém grupo nazareno. ⁶Ininictooba idic jém tunçac pixiñ jém tançaiywiip jém mijpic masticjom. Jeeyucmi ammatsta. Ançiipinçtooba idic con aichtampic anañquímayooyi. ⁷Pero jém coronel Lisias tigiy con isoldado, pimimi ifop. ⁸Inímáy jém iquejajwadayñewiip iga nicyajiñ iquejajwadáy mich inwiñjom. Siip mich mismo wiap inçiipin iga injodonjain numa tiiga anquejajwadayñeta.

⁹Jém judíos, jém miññeyajwiip jém gobernadorcim, nımyajtım iga numa. ¹⁰Ocmi jém gobernador iwadáy seña jém Pablo iga jıyıñ. Jesic nımpa Pablo:

—Ich amaymay iga wiap ançutson jém aquejajwadayñewiip mich inwiñjom. Anjodon iga jáyañ amtiy michıy iga minjagooyi yıp naxyucmi. ¹¹Siiga inicwácpa yıp

pixiñtam, jeam miñmadáypa iga apenas doce día anúcne Jerusalén iga anañwejpátpa Dios. ¹²Da apát juť sıp anaña jém pixiñtam, ni ðatım apát iga sıp ançujíñáy jém itıyajwiip jém mijpic masticjom, ni tım sinagoga, ni tunçac parte de jém attebet.

¹³Yıpyaj ða wiap awiñpacchi juuts nımyaj iga ich anwatne.

¹⁴Pero ich manañmadáypa iga numa ançuyoxap jeetim Dios jém ijsneyajwiip jém wiñicpic anjatunwewetam. Ich aıt de acuerdo con jém jomipic anquímayooyi, pero jeeyaj nımyajpa iga miçgooyi. Ich ançupicpa itumpiy jém ijaychacnewiip jém wiñicpic anmatciwiñ y jém Moisés inquímayooyi. ¹⁵Ich anañjocpațım juuts jeeyaj iga Dios icpıspa jém caaneyajwiip, jém wıtampic y jém malopic. ¹⁶Jeeyucmi siempre anwadáypa caso iga anwiwatpa. Jesic ða ti ançinpa jém tanJatun Dios iwiñjom ni jém pixiñtam iwiñjom.

¹⁷Cuando tsam wiñigam anicne, jesic aset eybic anticmi iga anyoxpátpa jém antıwıtam jém yaachayajpáppic y iga antsacpațım tım ofrenda. ¹⁸Iganam sıp anwat jempic, algunos jém judíos, jém miññeyajwiip de Asia, apát jém mijpic masticjom. Anwatne jém costumbre iga acuáyıñ. Da anamiñ jáyañ pixiñtam ni da i jém bulla.

¹⁹Más wı meega miñ aquejajwadáy jém Asiapic judíos siiga iniıt algo encontra para ich. ²⁰Wııtım meega yıpyaj pixiñtam, jém miññeyajwiip yiim, miñmadáypa mimich ti mal

aṅwatne, siiga apádáy antánca cuando aciipin jém panij anjagooyi iwĩñjom. ²¹Da tí aṅwat no más pĩmi ajiy cuando aít jém anjagooyi iwĩñjom, annímáy: “Siip aciipintap porque aṅcupicpa iga pispa jém caaneyajwiip.”

²²Jém Félix iwicutiitiiyí jém jomipic aṅquímayooyi. Cuando yaj imatoṅ tí nĩmpa jém Pablo, jém Félix ipoychac jém asunto; da iciipin. Nĩmpa:

—Cuando miñpa jém coronel Lisias iga acjodónap tí inwatne, jesic yajpa aṅwĩtsac jém asunto.

²³Ocmi jém gobernador Félix ipiimáy jém capitán iga seguido iwatpa cuenta jém Pablo jém palacio. Pero ijícpa iga tigiypa jém iamigoyaj iga miñpa iám y ichiiba iwícuyú títam ifogóyay.

²⁴Jesic tunḡac jama más, miñgacum eybic jém gobernador Félix con iwichomo Drusila, tum Israelpic yomo. Inwejáy jém Pablo iga inmadáyĩñ jutsap micupic jém Jesucristo. ²⁵Pero Pablo inmadáy iga Dios ixunpa iga taṅwĩwadiñ, ixunpañim iga tum pĩxiñ nanjactap iyaac iga odoy imalwadiñ. Inmadáyitim iga núcpa jama iga Dios iciipinpa itumpiy jém pĩxiñtam. Jesic cuando imatoṅ, jém Félix tsam pĩmi cĩṅ. Inímáy jém Pablo:

—Siip poyñicsim. Cuando anaítpa lugar manañwejáy eybic.

²⁶Ijĩspañim jém Félix iga jém Pablo ichiiba tumiñ iga cutsigayfaiñ. Jeeyucmi waćciy inwejáy iga aṅmatpa con je. ²⁷Wisna amítay inasca así jém Pablo. Ocmi jém Félix putum de

gobernador. Jém Porcio Festo jeegagam tsíy iga gobernador. Pero jém Félix, como ixunpa iga iwĩxiñ jém judíos, da ifop jém Pablo.

Aṅwejayfá Pablo jém gobernador Festo iwĩñjom

25 Yaguiñ núc jém naxyucmi jém gobernador Festo. Nas tucunajama, put jém attebet Cesarea, nic Jerusalén. ²Jém panij anjagooyiyaj con jém anjagooyiyaj de jém judíos, nic iámyaj jém gobernador. Iquejajwadáypa jém Pablo. ³Iwágayyaj tum favor jém gobernador. Nĩmyaj:

—Maṅcunucsáypa, ayoxpaati, cuntsati jém Pablo Jerusalén.

Nĩmyaj jempic porque ijĩsyajpa iga inṅteñyajpa tunjom iga iccaaba.

⁴Pero jém gobernador Festo icutsoṅ. Nĩmpa:

—Jém Pablo tsíy preso Cesarea. Ich anyaac da jáyñe anicpa jemíc. ⁵Jeeyucmi mannímáypa, wĩ siiga algunos de mimichám minjagooyitám tawaganictámpa Cesarea. Siiga jém pĩxiñ iwat algun tánca, jesic jemigam wiap inquejajwadáy.

⁶Jesic jém Festo cuando iyaj ocho o diez día Jerusalén, set eybic Cesarea. Icuquejama nicum coñi jém oficina juť ciipínóypa. Ipiimáy jém soldado iga inimíñiñ jém Pablo. ⁷Cuando jém Pablo tigiy jém oficina, icunúcyaj jém judíos, jém miññeyajwiip de Jerusalén. Moj iquejajwadayyaj iga tsam mĩjtampic tánca iwatne. Pero da i wiap miwiñpacchi. ⁸Jesic nacupujtap jém Pablo. Nĩmpa:

—Ich da tí mal aṅwatne contra jém judíos inquímayooyi, ni contra

jém mǎjpic mástic, ni contra jém Romapic anjagooyi.

⁹Jém gobernador Festo ixunpa iga iwǎixyajiñ jém judíos, jeeyucmi icwác jém Pablo, nǎmayta:

—¿Que iñxunpa iga mañcutsatpa Jerusalén iga jemigam micǎipǎntaiñ?

¹⁰Pablo icutson, iñmáy:

—Ich aít yǎim juť cǎipǎnǎyapa jém gobernador. Yǎp oficina jém Romapic anjagooyi imiichi. Yǎim tienes que acǎipǎntap. Mich iñwǎjodorǎ iga da ammalwadayñe jém judíos. ¹¹Siiga tsam pǎimi ammalwatne, wǎi iga ampictsonpa jém castigo iga accaatap. Pero siiga da quejpa jém antǎnca juuts jeeyaj aquejajwadayñe, jesic da i wǎp acǎijucot jém Israelpic pǎixiñtam iciñjom. Añwácpa iga jém Romapic anjagooyi iyaac acǎipǎriñ.

¹²Cuando yaj añmatǎiyaj con jém ichiipǎppic jǎxi jém gobernador Festo, iñmáy jém Pablo:

—Iñwác iga micǎipǎriñ jém Romapic anjagooyi, siip jemigam miñcpa.

Añwejayta jém Pablo jém rey Agripa iwiñjom

¹³Cuando da wañña jama nasne, núc Cesarea jém rey Agripa con iyomo Berenice. Miñ idioschi jém gobernador Festo. ¹⁴Ítyaj Cesarea wañña jama. Jesic jém Festo iñmadáy jém rey tí iñasca jém Pablo. Iñmáy:

—Yǎim í tǎm pǎixiñ ichac preso jém Félix cuando put de gobernador.

¹⁵Cuando aoy Jerusalén jém panij anjagooyiyaj con jém iwǎdaytam de jém judíos, añmadayyaj tí iwatne yǎp pǎixiñ. Awágáy iga

anchiñ castigo. ¹⁶Ich añcutson iga taichtam jém taRomapic, da tanaiña jém costumbre iga tanchiiba castigo tǎm pǎixiñ siiga da wiñti iwiñpacchiiba jém iquejajwadayñewiip iga wǎp inicupujta iyaac. ¹⁷Jeeyucmi cuando núcyaj yǎim jém Israelpic anjagooyiyaj, da jáypa añcǎipǎñ. Icuquejama acoñ juť acǎipǎnǎyapa, anañwejay jém pǎixiñ. ¹⁸Pero cuando núc yǎim jém iquejajwadaypǎppic, da iniquímyaj quejaj iga imalwatne juuts ich añjǎspa idic. ¹⁹No más tsam jóyñe iga inimiñ tǎm jomipic añquímayooyi y iga iñmatpa de tǎm pǎixiñ iñǎyi Jesús. Accaata, pero siip nǎmpa jém Pablo iga pisneum. ²⁰Ich da añcutiǎyǎ tí añwatpa con yǎicxpǎ asunto. Jesic anacwác jém Pablo siiga iwǎanjam iga añcutsatpa Jerusalén iga jemigam wǎtsactǎiñ. ²¹Pero como je iwác iga cǎipǎntaiñ jém Romapic anjagooyiciim, jém Augusto, ich ampǎimǎy iga tsǎyiñ preso hasta wǎp añcutsat jém Romapic anjagooyiciim.

²²Jesic jém Agripa iñmáy jém gobernador Festo:

—Ich agui ammatonǎtooba tí nǎmpa yǎp pǎixiñ.

Jém Festo iñmáy:

—Joymi immatonpa.

²³Icuquejama jém rey Agripa con iwichomo Berenice núcyaj jém palacio. Agui wǎi cuyajneyaj. Iwaganamiñyaj jém soldado iñjagooyiyaj con jém más mǎjpic anjagooyiyaj de jém attebet Cesarea. Jém gobernador Festo ipiimǎy isoldado iga inimñiñ jém Pablo.

²⁴Jesic moj jǎyi jém Festo. Nǎmpa:

—Mirey Agripa, con iñtumpiytam miitwiip yim. Yibam jem pixiñ. Tsam jáyan jem judíos iquejajwadayne contra je. Iquejajwadáy Jerusalén y iquejajwadáytim yim Cesarea. Da ichacpa iga nimyajpa iga accatañ. ²⁵Ich animpa iga da ti iwatne iga iccaayajpa. Pero iyaac iwác iga icipíñ jem Romapic anjagooyi jem Augusto. Jeeyucmi anjis iga aņcutsatpa jem. ²⁶Pero como da ampádáy itañca iga anjáyypa jem tanaņjagooyi jem Romapic, jeeyucmi anamiñ mich iņwiñjom, mirey Agripa, iga iņcipíñ. Jesic siiga quejpa ti mal iwatne, wiap anjáyay jem tanaņjagooyi jem itwiip Roma. ²⁷Ich animpa iga da wiap aņcutsat tum preso jem tanaņjagooyicim siiga da anjáyypa tiiga quejajwadayñeta.

**Jém Pablo iņmatpa ti iwatne
jém rey Agripa iwiñjom**

26 Ocmi jem rey Agripa iñimáy jem Pablo:

—Wiap annimáy iñyaac ti iņwatne. Jesic jem Pablo icquím ici, moj iņmat así:

²—Mirey Agripa, agui amaymay iga wiap anaņmat mich iņwiñjom iga anacupjtap juuts aquejajwadayne jem judíos. ³Ich agui amaymay porque mich iņwiixpicpa itumpiy jem judíos icostumbre. Injodonťim jutsap iņacayaj jem iņquímayooyi. Jeeyucmi maņwágáypa iga amatónaayi chocoymi.

**Pablo iņmatpa ti iwat antes
que icupicpa Cristo**

⁴Itumpiy jem judíos ijodonjaj juuts jáy aņwat dende atsixiñam jem naxyucmi juť anay y jem

Jerusalén. ⁵Jeeyaj iwijodonjaj y wiap iņmat siiga iwianjamyaj iga ich aņcuyujca jem fariseopic aņquímayooyi jem más tañcapic taņwat de itumpiy jem aņquímayooyiyaj. ⁶Yim siip aciipjtap porque anaņjócpa iga Dios icpispa jem caaneyajwiip juuts ijycámáy jem wiñcipic anaťuņwewetam. ⁷Itumpiy jem Israelpic pixiñtam, jem doce tribu, iņjocyajpatim jem promesa. Jeeyucmi anjistampa Dios y aņcuyoxatampa tsuucim y siñni. Siip, manrey Agripa, jem Israelpic pixiñtam aquejajwadayne porque anaņjócpa jeetim promesa. ⁸¿Tiiga iñjispá iga Dios da wiap icpis jem caaneyajwiip?

**Pablo pecam icpoypa idic jem
icupicneyajwiip Cristo**

⁹Pecam ich anyaac anjispatim iga ammalwadáypa jem pixiñtam jem itúņypáppic jem Jesús de Nazaret. ¹⁰Jempigam aņwat Jerusalén con jem toťo jem achiiñewiip jem paņij anjagooyiyaj. Ampaj tsam jáyan jem icupicneyajwiip jem Cristo, jesic miccaayajta jeeyaj, ich aiť de acuerdo. ¹¹Waťi veces anchi castigo iga ichaguñ iga icupicpa jem Cristo. Jempam aņwat itumpiy jem sinagoga. Tsam pimi anjóxypa idic. Tsam ammalwadáy, anacpóyiy juumi hasta jem tungac naxyucmi.

**Pablo iņmatpa eybic jutsa micupic
Cristo**

(Hch. 9:1-19; 22:6-16)

¹²Jeeyucmi anic jem atbetet Damasco. Jem paņij anjagooyiyaj acutsat con tum toťo. ¹³Pero

cuando aniqui tunjom, mirey Agripa, como cugapjama ánix tum jucti sinyucmi. Más pimi tsocpa que jem jama. Actsíy jem ichoca con jem anwagananicpáppic.

¹⁴Jesic antumpiytam acutiñta naxyucmi. Jesic ammatoñ tum jiyi, anímayta jem hebreo anmatimi: “¿Saulo, Saulo, tiiga ammalwadáypa? Inyaac siip minimalwadáyta; juuts iwatpa jem buey cuando inepa jem ichenócyu inqini, inyaac miniccoowatpa.” ¹⁵Ocmi ich annímáy: “¿Mijapaap, mánQmi?” Jesic anímáy: “Ich aJesús jem síppáppic ammalwadáy. ¹⁶Tsucumi. Manwiñquejáy iga mancupin iga anujoxap. Michíypa juuts testigo iga inimatpa ti inix siip y ti inixpa ocmi. ¹⁷Manyoxpátpa iga odoy mimalwadayyajiñ jem Israelpic pixiñtam y jem tungac pixiñtam jem dápic je de Israel. Siip mancutsatpa iga nicpa inimadáy ich anamatí jem tungac pixiñtam jem dápic je de Israel. ¹⁸Mancutsatpa iga inictojáypa iixcuy iga odom más wítyajiñ piichcim, pero wítyajiñ juctiantsoajom. Mancutsatpim iga inictsacpa jem tungac pixiñtam jem Wocciwiñ ipimi iga ipictónñ jem Dios ipimi. Inimadáypa ich anamatí iga acupiguiñ aich, jesic wadáyta perdón jem ífanca. Jesic Dios imanigayjpa con los demás jem cuáyñewiip ínama.”

Pablo iwatpa juuts inímáy Jesucristo

¹⁹Jeeyucmi, mirey Agripa, anwatpa juuts anímáy cuando Dios anquejáy jem poñ. ²⁰Wiñti

oy anamadáy jem anmatí jem ítyajwiip jem attebet Damasco, ocmi anic Jerusalén y icuwiñi jem naxyucmi de Judea. Ocmi anic juí íf jem tungac pixiñtam jem dápic je de Israel. Anímáy iga icucaguiñ ijixi y iga ichaguiñ iga imalwatpa y mojpa iwíwat iga quejiñ iga cucacneum ijixi. ²¹Jeam anañnúc. Jeeyucmi amats jem judíos jem mijpic masticjom. Iwatyay tum trato entre jeeyaj iga accaayajpa. ²²Pero Dios tsam ayoxpát. Hasta siip dá antsacne iga anamatpa Dios inmatí. Anamadáypa cualquier pixiñtam jem mijpic anjagooyi y jem dápic cargojy. Ich anamatpa no más juuts nimpa jem wiñcipic amatciwiñ y jem Moisés cuando inmatyajpa ti miñpa. ²³Jeeyaj nimyaj iga yaachwattap jem Cristo y ocmi accaatap. Je jem wiñtipic icpispáppic Dios de juí íf jem caaneyajwiip. Chiítap jem Israelpic pixiñtam jem wibic jixi iga icutiyyiyajiñ. Chiítapim jem tungac pixiñtam, jem dápic je de Israel.

Por uxañ jem rey Agripa icupicpáim Cristo

²⁴Iganam nacupujtap jem Pablo, tsam pimi jiy jem gobernador Festo. Nimpa:

—iMich, miPablo, tsam miloco!
Iga tsam pimi micuyujne milocojane.

²⁵Pero Pablo icutsoñ. Inímáy:
—Miwibic miFesto da alocojane.
Síp manamadáy jem numapic amatí jem jixiyywiip. ²⁶Yim íf jem rey Agripa. Je tsam iwicutiyyiyapa ítumpiy yípyaj cosa. Jeeyucmi

manwianmadáypa, da aciŋpa. Ich animpa iga iwijodon ifumpiy yíp jomipic anquimayooyi porque da yamwatneta juť da i iixpa. ²⁷Mirey Agripa, ¿que iŋcupicpa juuts nimpa jem wiñicpic aŋmaťciwiñ? Ich animpa iga iŋcupicpa.

²⁸Jesic jem Agripa iñímáy Pablo:
—Por uxañ anaccupicpa Cristo.

²⁹Ocmi Pablo iñímáy:
—Por uxañ o por jáyañ, ich tsam ansunpa iga iŋcupicpa. Da solamente mimich, pero ifumpiy jem siippic amatoŋneyaj. Tsam aŋwianjam iga michíyťampa juuts aich, pero sin cadena.

³⁰Cuando yaj nımı jem Pablo, teñchucumyaj juť coñyaj jem rey, jem gobernador y jem Berenice con ifumpiy jem iwaganaitwiip. ³¹Jesic putyaj jem anjagooyiyaj, nicyaj aparte. Moj nanímayajtaji entre jeeyaj:

—Yíp pixin da ti iwatne iga accaatap ni iga pajtap cárcel.

³²Jem Agripa iñímáy jem Festo:
—Wiap taŋcutsigáy idic yíp pixin meega da iwac iga iciipiniñ jem Romapic anjagooyi.

Nanicta Pablo Roma

27 Jesic icunúcyaj jixi iga acutsattamtap jem naxyucmi de Italia. Jem Pablo con jem tuŋgac presoyaj ciijuŋcotta tum capitán icijom. Iñiyi Julio. Jem batallón iñiyi Augusto. ²Atigiyta tum barcojom. Tsucum jem barco Adramitio. Naspá jem atbeteyaj lamar aŋna jem naxyucmi de Asia. Awaganictampa con jem Aristarco. Je tsucumne jem atbetet Tesalónica jem naxyucmi

de Macedonia. ³Icuquejama anucta jem atbetet Sidón, lamar aŋnaca. Jem capitán Julio tsam iyaachanjam jem Pablo. Ijigáypa iga nicpa íam jem iamigoyaj. Ijigáypaťim iga iyoxpápa y iga ichiiba řítam ifogoyáy.

⁴Atsucumta jem atbetet Sidón. Anasta jem isla de Chipre jem aŋnaymipic lado porque tsam pimi jem sawa. ⁵Anjacta jem lamar jem naxyucmi Cilicia y Panfilia iñuma. Anucta jem atbetet Mira jem naxyucmi de Licia.

⁶Jemic jem capitán Julio ipát tum barco jem tsucumnewiip jem atbetet Alejandría. Nicpa jem naxyucmi de Italia. Jem capitán acotta barcojom. ⁷Waťña jama anictampa chocoymi. Tsam táŋca mu annucta jem atbetet Gnido iñuma. Como tsam pimi jem sawa, da tacnas jem. Jeeyucmi aquetta hasta jem isla de Creta. Anucta jem punto de Salmón iñuma. Anasta noco jem isla de Creta. ⁸Tsam táŋcaap iñic jem barco. Witpa lamar aŋnaca. Ocmi anucta tum lugar iñiyi jem Wibic Puerto, nocojom jem atbetet Lasea.

⁹Tsam jáyañ tiempo anactogoyfa. Siip tsam if peligro iga anictampa barcojom porque nasne jem siñ de ayuno. Núcne jem tiempo cuando tsam poypa jem sawa. Jeeyucmi Pablo ichi jixi jem pixinťam.

¹⁰Iñímáy:

—Mipixinťam, ánixpa iga siip tsam if peligro iga tanicpa barcojom. Wiap ifogoy jem barco con ifumpiy jem carga hasta togoypaťim jem tamvida.

¹¹Pero jem capitán da imatoŋ ti iñímáy jem Pablo. Más icupicpa jem

barco iomi y jém icwifpáppic jém barco. ¹²Casi ifumpiy jém ifyajwiip jém barcojom agui nictooba porque da wicom jém puerto juí aifía iga annascatámpa jém tiempo de pagac cuando tsam poypa jém sawa. Nicyajtooba jém atebet Fenice, tungac puerto, jeefim isla de Creta. Íngammocne anjamtigiyimi. Jemum wiap annascata jém tiempo de susuc.

Tsam íf mal tiempo jém lamar

¹³Jesic moj poyi jém tsapsawa, ijisyajpa iga wicoomap, wiap inicyaj. Tsucum jém barco, moj niqui jém lamar aņnaca jém isla de Creta. ¹⁴Pero da jáy mactsfya tum sawa tsam pimi. Juuts tum ciclón. Jemic iccámayyaj iniyi jém euraquilón. ¹⁵Moj ininic jém barco. Como da wiap anánammoc jém sawa, jesic jém icwifpáppic jém barco ijicpa iga ininicpa. ¹⁶Anasta tum xutu isla iweñtaņ, iniyi jém isla Claudia. Jem da pimi núcpa jém sawa. Tsam taņcaā maampiņta jém lancha jém ijicnewiip jém barco. ¹⁷Cuando yaj ipiņyay jém lancha, moj ichenyaj jém barco con mijpic tipxi iga odoy sámim. Tsam cįņneyaj. Wiip tsfya jém poocyim jém lugar iniyi Sirte. Jesic icquedayyaj ivela. Ijigayyaj iga ininigiñ jém sawa. ¹⁸Icuquejama como tsam pimi poypa jém sawa, jém pixiñtam moj ipatspatsayyaj lamar jém barco ichimi. ¹⁹Jesic núcum tucunajama, aichfam anyaac ampatsáyayta jém barco ifiņcuy con jém itraste. ²⁰Wañña jama íf jém mal tiempo, da aguixta jém jama ni jém matsa. Como tsam pimi actsfy jém sawa,

anjistámpa antumpiyfam iga acucaaytámpa.

²¹Tsam jáyan jama da awicta. Jesic jém Pablo teñchucum jém pixiñtamanjom. Inímáy:

—Mantiwitam, meega iņwadáy caso íf manímáy y da tatsucum jém isla de Creta juí taif idic, jesic da idic tannascaaba yip mijpic yaachaji con yip togoyi.

²²Pero siip camamwattaami inanama. Porque ni tum de mimichfam da micaatámpa aunque yip barco togoypa. ²³Tsumic awiñquejáy tum siņyucmipic pixiñ jém icutsatnewiip Dios, jém ichpic anjacpa y aņcuyoxap.

²⁴Jém siņyucmipic pixiñ anímáy: “MiPablo, odoy cįņi porque tienes que mininúctap jém Romapic anjagooyiciim. Mich iņcuyucmi Dios iciacputyajpa ifumpiy jém pixiñtam jém iņwagananicpaap jém barcojom iga odoy caayajiñ.”

²⁵Jeeyucmi manímáypa mimichfam iga odoy cįņtaami. Porque ich aņcupicpa iga Dios wiap tayoxpát. Ich anjodon iga numa tannascaaba juuts anímáy jém siņyucmipic pixiñ. ²⁶Pero tienes que tananicpa jém barco hasta tananúcpa tum isla.

²⁷Cuando nasne dos semana iga aniquifam, jém sawa ananicta jém lamar iniyi Adria. Jesic como cugapsu jém icwifajpáppic jém barco ijamyajpa iga núctooba naxyucmi. ²⁸Iquípsay jém lamar jutspiy ijojmi. Iniif treinta y seis metro. Cuando wifay uxaj más juumi, eybic iquípsay, iniif veintisiete metro. ²⁹Tsam icįņyaypa iga núcpa jém tsaayucmi, jesic

icquedayaj cuatro iancla jém barco ítutsciim iga ichenyajpa. Tsam anyácneyaj, síp injócyaj iga cuquejiñ. ³⁰ Algunos jém marinero agui quettooba jém barcojom iga poypa. Moj icquet jém lancha, nímantaayap iga icquedápa jém iancla jém icobacciimpic. ³¹ Pero jém Pablo inmadáy jém capitán y jém isoldado:

—Siiga yíp pixiñtam da tsýpa barcojom, michám micucaaytámpa inñumpiytam.

³² Ocmi jém soldado itijucujagáy jém lancha itípxi juť cutsenneta jém barcoyucmi iga cutíñiñ niicim.

³³ Icuquejama jém Pablo inímáy ítumpiy jém pixiñtam iga wícyajiñ. Inímáy:

—Iniitum dos semana da miwícnetá. ³⁴ Jeeyucmi mañcunucsáypa iga miwíctámpa uxaj iga impictsoŋpa impimi porque ni tum de mimichtam da mítogoypa, da togoypa ni tum jém inway jém ítwiip inçobacyucmi.

³⁵ Cuando yaj nimi jém Pablo, imatspacne tum caxtánañi iciijom. Inwejpát Dios jém pixiñtam iwíñjom. Ocmi iwenjac jém caxtánañi, moj wiiqui. ³⁶ Jesic ítumpiy jém pixiñtam icamamwat inama. Mojum wiiquiyaj mex jeeyaj. ³⁷ Aitá jém barcojom adoscientos setenta y seis. ³⁸ Cuando yaj wiiquiyaj, moj ipatspatsayyaj lamar jém trigo iga más xejcýaíñ jém barco.

Po jém barco

³⁹ Icuquejama jém icwítápápic jém barco da ijodonayaj júp naxyucmi itýaj. Iixyaj tum lugar juť

wicom juť wíijom jém pooyañajci. Ijisa siiga wiap ininic jém barco jem. ⁴⁰ Itijucujacyaj jém típxi juť tsenne idic jém ancla, ichacyaj lamar. Iwijáy jém timón itípxi. Icuim jém vela, jém icobacciimpic, iga icwídiñ jém sawa. Jém barco moj puťi jém lamar añaca. ⁴¹ Núc juť it jém corriente, tsý jém barco icobac pooycim, wí cámné, da tsigóypa. Jém ítuts moj iccujagáy jém lamar poa. ⁴² Jesic jém soldado ijisyajpa iga iccaayajpa jém preso iga odoy púañajacyajiñ iga poypa. ⁴³ Pero jém capitán iciacputtooba jém Pablo. Da ijigáy jém soldado iga iccaayajpa jém preso. Ipiimíy jém wiapaap inñijén iga tigíyiñ lamar iga putpa añsicmi. ⁴⁴ Inímáy jém dapic wiap inñijén iga ipiguiñ tabla o tum jaca jém barco icuy iga iyoxpátpa. Asíam cupudayyaj ítumpiyaj añsicmi.

Núc jém Pablo jém isla de Malta

28 Cuando aciiputtámum antumpiytam, anjodónata iga jém isla inñyi Malta. ² Jém jemipic pixiñtam tsam awixáta. Icnúcyaj jucti porque tsam succuc, tsam chijóypa tuj. Anímayta iga: “Miñi mixami.” ³ Ocmi jém Pablo ipin uxaj çipi titsnewiip. Iganam icotpa juctjom, put tum tsañ, ipóyáy jém jucti ipiji. Tijnecám jém Pablo iciiyucmi. ⁴ Cuando jém ityajwiip jem iixyaj iga tijnecám jém tsañ iciiyucmi, nanímayyajta:

—Yíp pixiñ tum accaoypaap. Aunque çiput jém lamar, Dios da iwianjam iga tsýpa vivo.

⁵ Pero Pablo icuxicsáy jém tsañ juctjom. Da tí inasca. ⁶ Jesic jeeyaj

agui injócyaj siiga xiŋpa jém ici o jeéfi rato caaba. Pero ocmi cuando tsam injócyaj, iix iga dá tí iñasca. Jesic icacyaj ijixi. Moj nĩmiyaj:
—Yíp pĩxiñ tum dios.

⁷Jém anjagooyi iñiyi Publio. Injacpa jém isla. Noco íf jém iñas. Tsam awĩpictsoŋta. Achiiíta juí amoŋta juuts aamigotam. Jemum atsíyíta tucunajama. ⁸Mimne idíc jém Publio ijatuŋ. Imatsne jém jawan y jém niipiñtĩ. Tigiy jém Pablo juí wone. Inwejpádáy Dios para je, ichigáy icobac, icpis. ⁹Cuando iixyay tí iwat jém Pablo, jesic miñyajtım itũmpiy jém mimneyajwiip icuwíti jém isla. Acpiŋyajtım. ¹⁰Jesic jém pĩxiñtam tsam awĩixtámpa, tsam acujíptámpa. Ocmi cuando anictooba eybic jém tungac barcojom, jeeyaj achiiíta títam atogóyayíta iganam anictámpa.

Jém Pablo núcpa Roma

¹¹Cuando anyajta tres meses jém isla de Malta, atigiyíta tungac barcojom. Jém barco iñascaítım jém tiempo de succuc jeéti isla. Tsucum jém attebet Alejandría. Jém barcoyucmi íf wisten watnas iñiyi Cástor y Pólux. ¹²Anúcta nianŋaca tum attebet Siracusa. Tucunajama atsíyíta. ¹³Jesic icquĩmayyaj jém barco ivela, moj aniquífam. Anúcta jém attebet Regio. Icuquejama poypa jém tsapsawa, jesic jém tungac jama anúcta jém attebet Puteoli. ¹⁴Jemum ampátta algunos jém tantiwitam. Jeeyaj acunucsayíta iga atsíyítamiñ tum semana con jeeyaj. Ocmi moj aniquífam Roma. ¹⁵Jém tantiwitam jém ityajwiip

Roma, ijodóŋayaj iga anúctamtooba, miñ amétsta tum lugar iñiyi Foro de Apio. Núcyaj algunos hasta jém Tres Tabernas. Cuando iix jém Pablo iga núcyaj jém tantiwitam, moj ichi gracia Dios, más dá ciŋpa. ¹⁶Cuando anúcta Roma, jém capitán iciiŋucot jém tungac presoyaj jém comandante iciiŋom. Pero ijíc iga dá i ipaj jém Pablo. Jígayta iga nic íti tungac áŋeymi con tum soldado jém iwatpáppic cuenta.

Jém Pablo inmatpa jém Dios inmafi Roma

¹⁷Cuando nasne tucunajama, jém Pablo inwejay jém anjagooyiyaj de jém judíos, jém ityajwiip Roma. Cuando anŋtuumaneyajum, nĩmayyajta:

—Mantiwitam, dá ammalwadáy jém Israelpic pĩxiñtam ni dátım anŋwatne en contra de jém wiñicpic tanjatuŋwewetam. Pero amatsta Jerusalén, aciiŋucottá jém gobernador iciiŋom. ¹⁸Cuando yaj aciiŋiŋ, acutsigaytooba idíc porque dá tí apádáy iga accaataiñ. ¹⁹Pero jém judíos dá ijíc iga acutsigaytáñ. Jeeyucmi anwác iga aciiŋiŋiñ jém Romapic anjagooyi mex dá anquejajwadaytooba jém antiwitam jém judíos. ²⁰Jeeyucmi maŋcutsadáy anmafi iga miñi aámtaami iga manaŋmatpa. Ich atsenne con yíp cadena porque anŋcupicpa iga Dios icpispá jém caaneyajwiip. Jesanetiŋ icupicyaj jém Israelpic pĩxiñtam dende wiñigam.

²¹Jesic jém miñneyajwiip Roma iñimáy jém Pablo:

—*Da ampictsonne ni tum toto de jem naxyucmi de Judea iga fi inñascane mimich. Ni tum jem tantiwitam, jem miñneyajwiip jem Jerusalén, da anmadayyaj iga mich immalwatne.* ²² *Agui ammaton̄tooba jem an̄mafi jem michpic inin̄matpa porque an̄jodónane iga jūt quej tsam jóyix̄fap yíp jomipic an̄químayooyi.*

²³ *Jesic jeeyaj icámayyaj tum jama iga miñyajiñ eyb̄ic iga imaton̄yajpa jem Pablo. Cuando núc jem jama, miñyaj tsam jáyañ jem Romapic pixiñtam hasta jem ticciim jūt íf jem Pablo. Dende tsúytim hasta tsuáñ in̄madáy jem pixiñtam jutsap in̄jac Dios jem it̄yajwiip yíp naxyucmi. In̄quejáypa iga Jesús je jem Cristo jem icutsatnewiip Dios. In̄quejáy con jem wiñicpic an̄químayooyi jem ijaychacnewiip jem Moisés y jem wiñicpic an̄matciwiñ.*

²⁴ *Algunos jem pixiñtam icupicyaj jem Pablo in̄madayooyi. Pero jem tungacyaj da icupicyaj.* ²⁵ *Jém dápic iwian̄jamyaj moj niquiyaj. Cuando cunigayyaj, nim jem Pablo:*

—*W̄inim jem Dios iAnama cuando in̄imáy jem wiñicpic tan̄jatun̄wewetam por medio de jem wiñicpic an̄matciwiñ jem Isaías. Yiimpic nim:*

²⁶ *N̄igi nímaayi yíp pixiñtam: Numa immaton̄támpa jem an̄mafi, pero da in̄cutīiȳypa. Numa in̄ix̄fámpa, pero da in̄jodónatámpa.*

²⁷ *Porque yíp pixiñtam ianama tsam p̄imi malo, tsam in̄ejamaton̄pa, jem iixcuy in̄michñe, iga odoy iixóyíñ con iixcuy, ni odoy matón̄óyíñ con it̄atsic, ni odoy icutīiȳyíñ con ianama, ni da icacpa ij̄ixi iga anaccáyáypa it̄ánca.*

²⁸ *Jodón̄ataami iga dende siip Dios icutsadáypa jem tungac pixiñtam jem wib̄ic an̄mafi iga Dios taciap̄utpa. Cutsadaȳfap jem tungac pixiñtam, jem dápic je de Israel. Jeeyaj numa imaton̄yajpa.*

²⁹ *Cuando yajum in̄mat jem Pablo, nicyaj jem judíos. Tsam an̄ayajpa entre jeeyaj.*

³⁰ *Jesic jem Pablo ts̄y wisten am̄t̄iy jem ticciim jem in̄úcsnewiip. Ipic̄ton̄yajpa it̄ump̄iy jem miñpáppic iám.*

³¹ *In̄madáypa jem pixiñtam iga Dios in̄jactoooba jem it̄yajwiip yíp naxyucmi. In̄quejáypa jem tán̄Omi Jesucristo in̄químayooyi. Da cin̄pa jem Pablo, da i imooḡfypa. Jemum cuyaj.*